

MATEO

Kalε Wĩ a Ndε Ayekĩ Mateo Tsεε Ke a

Yesu Kristo Bawanyo Buĩ Kakã Katsa.

^I Ade Yesu Kristo kĩ enye Dawid owa, kĩ Dawid lεmε nye Abraham owa a bawanyo kasinu buĩ nε awĩ a.

^{II} Kito Abraham akũ keyawo Legã Dawid akũ bawanyo a kama kame nye Abraham ma Isak, Isak ma Yakob, ^{III} ade Yakob ma Yuda mo bawaenyole a. Yuda mo otsõ Tamai ma Perez mo Zera. Perez ma Hezron, Hezron lεmε ma Aram. ^{IV} Aram ma Aminadab, Aminadab ma Naheson, ^V ade Naheson ma Salmon a. Salmon mo Rahab ma Boaz, ade Boaz mo Rut ma Obed a. Obed ma Isai, ^{VI} ade Isai lεmε ma Legã Dawid a.

Kito Dawid akũ kenawo loko a kĩ bipili Israelfo ndom benamena Babilonia tite akũ a ni, ade bawanyo a kasinu buĩ nε awĩ a.

Dawid mo otsole a kĩ kufe enye Uria otsõ a ma Salomo. ^{VII} Salomo ma Rehoboam, Rehoboam ma Abiya, Abyia ma Asa. ^{VIII} Asa ma Yosafat, Yosafat ma Yoram, Yoram ma Uziya. ^{IX} Uziya ma Yotan, Yotan ma Ahaz, Ahaz lεmε ma Hezekiya. ^X Hezekiya ma Manase, Manase ma Amon, Amon ma Yosiya, ^{XI} ade Yosiya ma Yekoniya mo ye bawaenyole a.

^{XII} Kito Israelfo kamuniki kato Babilonia keyawo Yesu kama loko a, bawanyo a kasinu buĩ nye Yekoniya ma Sealtiel, Sealtiel ma Zerubabel,

XIII Zerubabel lеме ma Abihud. Abihud ma Elyakim, Elyakim ma Azur, **XIV** ade Azur ma Zadok, Zadok ma Akim, Akim lеме ma Elihud. **XV** Elihud ma Eleazar, Eleazar ma Matan, ade Matan ma Yakob. **XVI** Yakob ma Yosef a kī ekōã Maria a, kī ema Yesu a kī bave Kristo a.

XVII Foesũ kito Abraham akũ keyawo Dawid akũ ni, bawanyo ewua-ana lena ne kasinu a kame. Ade kī kito Dawid akũ kenawo loko a kī Babiloniafo pili Israelfo ndom benamena be tite akũ a, bawanyo ewua-ana lena ne kasinu a kame. Kī kito loko a na keyawo Kristo kama ni, bawanyo ewua-ana lena ne kasinu a na lеме kame.

Yesu Kama Akũ Foletsa.

XVIII Ade ayekī Yesu Kristo kama foletsa a ya ne foe kame a ne awĩ a. Bitinya oma Maria bekpa Yosef, lеме fomō baapi ye a, Maria mó eyi osũ kī etsẽmō kōma kī kuto Hũhũ Kpalewa a kame. **XIX** Ayekī Yosef nye oti kpĩĩ ne Baguma ane, ade etáwe kī yado Maria konyoã ne bati ane sũ ni, ewe kī yasĩ ye ne kabela kame. **XX** Kī ekakōna fukĩĩ akũ a, boe Olate a ode foto onyane odi nye ye akũ etsa ye ne koda kame, ebi ye kī, “Yosef, Dawid obi, tavila Maria kakōã, kitonekĩ Hũhũ Kpalewa a kame kōma a to. **XXI** Yaama obinyole, ote ye dī kī Yesu, kitonekĩ ye aanye ye bati etomena tokpa kame.”

XXII Foletsa kīĩ flee ya ne foe kame, ayekī letsa a kī Baguma le eyi etsãmēna ye onukpẽ onyene akũ a foya ne foe kame kī, **XXIII** “Oyitsõ kī enyĩna onyole aatsãmō kōma, ema obinyole. Baave ye Imanuel,” kī de kayo nye, “Baguma deĩ mō boe.”

XXIV Foesũ kĩ Yosef nyinya a, ekõã Maria nde ayekĩ Baguma ode foto onyane bi ye a. XXV Leme Yosef mo Maria táta mo akũ nde otsõ mo onyo aye, kenawo loko a kĩ ema ye obinyole a. Ade Yosef te ye dĩ kĩ Yesu a.

II

Anyansãfo To Suwa Kadekõ Beya.

I Bema Yesu ne Betlehem ne loko a kĩ Herodes kanya legã ne Yudea tite akũ a. Owi tábuna mo banyole badi kĩ bekole fotsa ne fusibii kadã akũ to suwa kadekõ beya ne Yerusalem, II ade beyavia kĩ, “Ndia bema obisẽ a kĩ yaanya Yudafo legã a? Bomó ye lisibii kĩ lide ne suwa kadekõ, ade boya kĩ bóasum ye a.” III Kĩ Legã Herodes nu fukĩ a, owole bole ye mo odi nye odi ne Yerusalem a. IV Foesũ eve basofonokoẽ mo mbla batsane a flee ekpota evia be kĩ, “Ne ndia baama Kristo a?” V Bekpa mbuaye kĩ, “Ne Betlehem ne Yudea tite akũ, kitonekĩ ade letsa kĩ Baguma onukpẽ onyene tsele eyi kĩ,

VI ‘No Betlehem ne Yuda tite akũ,
nné omato kabii kolaa ane
ne Yuda temato tekpale tekpale a kame.
Kitonekĩ no kame mo okpane a kĩ,
yaakpa yi bati Israelfo a aane eto.’ ”

VII Foesũ Herodes ve anyansãfo a kĩ bito suwa kadekõ a enamena kabelakõ, ade evia be loko paa a kĩ lisibii a ne a. VIII Ke liti a, enye be osi kĩ bena Betlehem mo oledo kĩ, “Minaawe obisẽ a kawe wĩ. Nte mimó ye ni, mifõ ñnyi loko a yi malo nnaasum ye.”

IX-X Foesũ bedzakũ, ade kĩ banaa ne osi a, bemó lisibii moape a kĩ bemó ne suwa kadekõ a. Kĩ bemó de lomõ a, kawõle de be paa. Lenya be lotõ tĩĩ lenafõ ledza ne kako a kĩ obisẽ a deĩ a lolõ nyange. **XI** Kĩ biwo ne kola a kame a, bemó obisẽ a mo õma Maria, ade bike aduli bisum ye a. Bibinya be futetsa a kĩ fonye sika ngbã, lifii mo klubõũ bekpa ye.

XII Baguma nye etsa be ne koda kame kĩ betabuki benaa Herodes sekẽ, foesũ bimuniki betsa osi bebã bedzakũ benaa õto.

Yosef Lomõ Maria Mo Yesu Benaa Egipte.

XIII Kĩ anyansãfo a dzakũ a, ode foto õnyane odi nye ye akũ etsa Yosef ne koda kame ebi ye kĩ, “Herodes aatsã ewe obisẽ a kĩ yako ye, foesũ yidza kakpã obisẽ a mo õma milo minaa Egipte tite akũ. Mina ne awã kenaawo lokõ a kĩ maabi no kĩ mimuniki miya.”

XIV Lenye lenye a na, Yosef yidza ekpã obisẽ a mo õma bilo benaa Egipte tite akũ. **XV** Edzi ne awã kenawo kĩ Herodes ku. Fukĩĩ ya lomõ ayekĩ letsa a kĩ Baguma onukpẽ õnyene le eyi a foya ne foe kame kĩ, “Nve yĩ obi ntomena Egipte tite akũ.”

Herodes Fõ Bekõ Kubisẽẽnyole Ne Betlehem.

XVI Kĩ Herodes mó eyi õsũ kĩ anyansãfo a kĩ bito suwa kadekõ a bu ye tekõasia a ni, ena kalõkpa paa. Foesũ edo bati kĩ benaako kubisẽẽnyole a kĩ kote futeli nviã keka, keyawo akõkõa ame akũ a flee ne Betlehem, mo ye temato kĩ tifuã a flee kame. Herodes ve futeli nviã kĩ fuketimo lokõ a kĩ bibi ye kĩ lisibii a ne a. **XVII** Adeke foletsã a kĩ

Baguma Onukpě Ǿnyene Yeremia le eyi a ya ne foe kame kī,

^{XVIII} “Fwola né ne Rama,
kabe mo ayoloho fwola foane.

Rahel kabe ye babi,
ade yaátuno kī bedola ye owole a,
kitonekī ye babi ku.”

Yosef, Maria Mo Yesu Muniki Bito Egipte.

^{XIX} Kī Herodes ku a, ode foto onyane odi nye ye akū etsa Yosef ne koda kame ne Egipte, ^{XX} ade ebi ye kī, “Yidza, karpā obisē a mo oma mimuniki minaa Israelfo tite akū, kitonekī bikī bewe kī bako obisē a ku.”

^{XXI} Foesū Yosef kpā obisē a mo oma bimuniki beya ne Israel tite akū. ^{XXII} Leme kī Yosef nu kī bidzina Arkelao legā ne olega Herodes kadzakō ne Yudea a, evila awā kanaa. Baguma buki enye foe etsa ye ne koda kame kī etanaa awā, foesū edzakū enaa Galilea amantam kame, ^{XXIII} ade enadzi ne omato a kī bave Nazaret a kame a. Foesū foletsa a kī Baguma onukpě banyene a le biyi a ya ne foe kame kī, “Baave ye kī Nazaretni.”

III

Yohanes Mui Ǿwolane a De Letsā Ne Ǿwole Kame Kadani Akū.

^I Ne fuwi a na kame a, Yohanes Mui Ǿwolane a ya ne Yudea kosa a kame, ade eyi letsā kade kayo ne Baguma foletsa a akū a. ^{II} Ele kī, “Midani mi towole kame, kitonekī Baguma legākanyakō a fuā!” ^{III} Yohanes nyé oti a kī Baguma Onukpě Ǿnyene Yesaya le kodzela ne ye akū eyi kī, “Odi lamena fwola kaboa ne kosa kame kī,

‘Milola boe ɔlate a osi.
Mifĩ ye akũ eyo kpĩ!’ ”

IV Yohanes do tetadie kĩ bekɔa ɔponkɔpoku tetsã benɔ, ade ekɔa ɔyae ovoli abɔsɔ eboomu kate a. Ye funitsã nye koolo mɔ kɔsã. **V** Bati kato Yerusalem, Yudea tite flee mɔ tite a kĩ tifuã Yordan ɔwɔ a flee akũ kaya ne ye sekẽ. **VI** Benye be tɔkpa betsa ade Yohanes wɔla be mui ne Yordan ɔwɔ a kame a.

VII Kĩ Yohanes mó Farisifo mɔ Zadukifo beble-bee kĩ baya ne ye sekẽ kĩ ewɔla be mui a, ebi be kĩ, “Mi bati kĩ mila nde bɔe kpa! Owei lekpa mi kɔde kĩ milo ne sɔto kavele a kĩ Baguma aayamena a kame? **VIII** Mikena fɔtsa a kĩ fɔatsa kĩ midani mi tɔwɔle kame. **IX** Mitakɔna kĩ minye Abraham bawa sũ, míapuli milo sɔto kavele a. Mabi mi kĩ Baguma aapuli efɔ boe kĩ ledani babi mɔ bawa ekpa Abraham. **X** Bike kasoã kɔkɔe ne futse tɔbɔle akũ kĩ baatsua. Kutse nye kutse kĩ kɔáwũ babi wĩ ni, baakpeli koe beta bido ne fi luwotu kame.

XI “Yĩ kɔ̃ ni, nkɔa mui mawɔla mi mui fɔtsa kĩ midani tɔwɔle kame, leme oti a kĩ yaaya ne yĩ liti a, aakɔa Hũhũ Kpalɛwa mɔ fi ewɔla mi mui. Edeĩ kɔbẽ kɔlaa ebẽ yĩ, ade ntáfeta kĩ mawũnya mpabua ne ye abɔa malo a. **XII** Enɛɛ ye kɔvela ne awe kĩ yaakɔa ewe ye kamɔne. Yaafila ye kamɔne eko ne oli kame, leme yaapila afafa a ne fi kĩ fɔádĩ da a kame.”

Yohanes Wɔla Yesu Mui.

XIII Ne lɔkɔ a na kame a, Yesu to Galilea ɛya ne Yohanes sekẽ ne Yordan ɔwɔ a abuí kĩ ewɔla ye mui. **XIV** Leme Yohanes we kĩ Yesu edani adzuni.

Ebi Yesu kī, “Nɔ a kī kenε kī awɔla yī mui a ni, nɔ mbom lɛya nε yī sekē?”

^{XV} Lεmε Yesu kpa ye mbuayε kī, “Finyaakō fō fɔna lomɔ, kitonεkī ade osi kī akū bóatsā bɔkena fɔtsa a kī Baguma awε a.” Foesū Yohanes tunɔ nε foe akū.

^{XVI} Kī Yohanes wɔla Yesu mui eyua a, εnε nε mui a kame letaleta, ade ode binya ekpa Yesu, εmɔ Baguma Hūhū kī yaka ndε mblɔduma aye eyadzi nε ye akū. ^{XVII} Ade odo odi nε eto ode εlε kī, “Ade yī mɔawε Obi kī maátunɔ ye kalε nε awī a, yawo yī anε.”

IV

Abonsam Só Yesu Edā.

^I Ade Hūhū Kpalεwa a kpā Yesu enamena kɔsa kame kī Abonsam εsɔ ye εdā a. ^{II} Kī Yesu dzi katanya, lenye mɔ suwa fuwi tena flee a, kɔlε kɔ ye. ^{III} Ade Abonsam ya nε ye sekē ebi ye kī, “Nte Baguma obi anε ni, kekō bi boe kī bedani bekena abodoo.”

^{IV} Lεmε Yesu kpa mbuayε kī, “Katselε Kpalεwa a lε kī, ‘Nné funitsā odi sū oti adzi nkpā, mbom edzi nkpā nε kalε nye kalε kī kanε kato Baguma onukpē kame a akū.’ ”

^V Ade Abonsam kpā Yesu enamena Yerusalem, ɔmatɔ Kpalεwa a kame a. Ekɔa ye enadzela nε Asɔli Kɔla ode kako geī a, ^{VI} ebi Yesu kī, “Nte Baguma obi anε ni, venya kaka kanaadza nε tite, kitonεkī Katselε Kpalεwa a lε kī,

‘Baguma aakpa ye ode foto banyanε ɔlɛdo nε nɔ akū,
kī baakaε nɔ nε be awε kame,

ayekĩ oláatula ne de akũ.' "

VII Yesu kpa mbuaye kĩ, "Leme Katsela Kpalewa a buki kele kĩ, 'Taso boe Olate no Baguma a odã.' "

VIII Ade Abonsam buki ekpã Yesu enamena otó geĩ odi kaleté, ade enye katinya kame fogã kanyakõ flee, mo foe akũ obu etsa ye a. **IX** Abonsam bi ye kĩ, "Maakoa fukĩ flee nkpa no, nte aake aduli osum yĩ."

X Yesu kpa ye mbuaye kĩ, "Satana, dzakũ ne yĩ akũ! Katsela Kpalewa a le kĩ, 'No Olate Baguma odi kene kĩ akena no akũ okpa lokoa osum ye leme.' "

XI Ade Abonsam dzakũ efone Yesu mo ode foto banyane yabumo ye a.

Yesu Yi Ye Adzuma Kayo Ne Galilea.

XII Kĩ Yesu nu kĩ bipi Yohanes bido ne kola a, edzakũ enaa Galilea tite akũ. **XIII** Etánaadzi ne Nazaret omato a kame, mbom enadzi ne Kapernaum, omato ne Galilea owo lutubu baũ a owẽ. Awã deĩ ne Zebulon mo Naftali amantam a kame. **XIV** Foya lomo nde ayekĩ Baguma Onukpẽ Jnyene Yesaya le eyi a kĩ,

XV "Zebulon tite mo Naftali tite,
osi kĩ enaa mpo abuĩ mo Yordan owo liti
Galilea, bikĩ benyé Yudafó tite!

XVI Bati a kĩ bidzi ne otũ kame a
mó ohaĩ kpale.

Ade bikĩ bidzi ne tite kĩ wuda nya te akũ a,
ohaĩ a né ekpa be."

XVII Kito loko a na, Yesu yi letsã kade kayo kĩ, "Midani mi towole kame, kitonekĩ Baguma legãkanyakõ a fuã!"

Yesu Vɛ Kɔfɔabi Banyɛnɛ Ɛna Kĩ Bɛyaatomɔ Ye.

^{XVIII} Kĩ Yesu tsɛ Galilea ɔwɔ lutubu baũ abuĩ yanaa a, ɛmɔ bawaeɲnyole nviã kĩ benye kɔfɔabi banyɛnɛ. Ade be nye Simon kĩ bave Petro mɔ ɔwaɛ Andrea, kĩ bekata tesau ne lutubu baũ a kame. ^{XIX} Yesu bi be kĩ, “Miyatomɔ yĩ lokɔa maakena mi bati banyɛnɛ.” ^{XX} Ne awã naa, befone be tesau awe bitomɔ ye.

^{XXI} Yesu naa lotɔ ade ɛmɔ bawaeɲnyole nviã bebã, Yakobo mɔ Yohanes kĩ benye Zebedeo babi. Bena ne be okolo kame bemɔ ɔlega Zebedeo bekalola be tesau. Yesu vɛ be, ^{XXII} ade letaleta befone okolo a mɔ be ɔlega awe biyi, bitomɔ ye a.

Yesu Tsa Fɔtsa, Ɛle Baguma Fɔletsa, Ɛtsa Bati Fɔsɔ Lemɛ.

^{XXIII} Yesu tsã emini ne Galilea tite flee akũ ɛkatsa fɔtsa ne Yudafɔ fɔtsenakɔ a. Ede letsã ne Kale Wĩ akũ ne Baguma legãkanyakɔ a akũ, ade ɛtsa fɔsɔ ahɔlo ahɔlo flee a. ^{XXIV} Ye akũ fɔletsa gba ne Siria tite flee akũ, foesũ bati kpã be a kĩ basɔ fɔsɔ ahɔlo ahɔlo a bema ye, bati kĩ bideĩ ne fɔsɔ mɔ ɔhau kame, bikĩ hũhũ kpa deĩ ne be kame, bikĩ odeto fɔsɔ kaha be, mɔ abafã ame, ade Yesu tsa be flee a. ^{XXV} Bati kodabu baũ kĩ bito Galilea tite akũ, mɔ Tematɔ Ewua kame, Yerusalem ɔmatɔ, Yudea tite akũ mɔ Yordan ɔwɔ liti tite akũ a yatomɔ ye.

V

Yesu Le Baguma Fɔletsa Ne Ɔto Akũ.

- I Kĩ Yesu mó bati kɔdabu a, ede enaa ɔto akũ enakena akũ edzi. Ye fɔtsa bakolene a yakpota ne ye sekẽ. II Ade edo be fɔtsa katsa awe kĩ,
- III “Baguma hila bikĩ binyina kĩ benye ahiãfo ne Baguma ane a,
kitonekĩ be la Baguma legãkanyakõ a.
- IV Baguma hila bikĩ babe konya a,
kitonekĩ Baguma aadɔla be tɔwɔle.
- V Baguma hila bikĩ bedɔla be akũ a,
kitonekĩ ade be aanya tite akũ adzapadie a.
- VI Baguma hila bikĩ Baguma kawɛ akũ kakena kole mo ɔmɔado ako be a,
kitonekĩ Baguma aafõ biwĩ!
- VII Baguma hila bikĩ bamɔ bati konya a,
kitonekĩ ade be Baguma aamɔ konya a!
- VIII Baguma hila bikĩ be tɔwɔle teĩ ne ye odi akũ,
kitonekĩ ade be aamɔ Baguma a!
- IX Baguma hila bikĩ bakena lukudɔ ne bati kayite,
kitonekĩ Baguma aave be kĩ ye babi!
- X Baguma hila bikĩ batomɔ be liti, ne ye kawɛ akũ kakena sũ a,
kitonekĩ be la Baguma legãkanyakõ a!
- XI “Baguma hila mi nte bati avĩna mi, katomɔ mi liti, kale tuwuli kpa ne mi akũ, ne yĩ sũ. XII Mimɔ kawɔle, mitu osee, kitonekĩ mideĩ kɔtokase kpale ne ode. Ade ayea bitomɔ Baguma onukpẽ banyene a kĩ benya mi lotɔ a liti a.

Yesu Bats Badone a La Nde Ledeme Mo Jhaĩ.

XIII “Mila nde ledeme mikpa batidziwa flee. Leme nte ledeme yela de ɔmene ni, osi odima lelãa kĩ baatsã bibuki bido de ɔmene. Ledani fɔtsa pupulidza foesũ bata de kawula lɔkɔa bati asumini de.

XIV “Mila nde ohaĩ mikpa batidziwa flee. Beláapuli bekola omato kĩ bitsua ne oto akũ. XV Odima látena osedza kakoa loda katsa ye, mbom yakoa ye kate ne osedza otse akũ ne awã kĩ yaakpale foko ekpa odi nye odi ne toto a kame. XVI Ade ayea kene kĩ mi osedza etẽ ne bati ane, ayekĩ baamo fotsa wĩ a kĩ miakena a, lokoa bimuni mi Olega ne ode a.”

Yesu Tsa Fotsa Ne Mose Mbla a Akũ.

XVII Ade Yesu buki ele kĩ, “Mitakona kĩ ñya kĩ mayaafone Mose mbla a mo Baguma onukpẽ banyene fotsa katsa a awe. Ntaya kĩ mayaafone foe awe, mbom ñya kĩ mayaakena foe fokpola. XVIII Mabi mi ne onokoli kame kĩ ayekĩ tite mo ode táwo tã kĩ ni, beláafone katsele kabii ñye ke akũ letsa kabii ne mbla a kame awe, mboente letsa nye letsa ya ne foe kame. XIX Foesũ odi nye odi kĩ yaafum mbla kabii adi, etsa bati bebã leme bekena lomo ni, yaanya obisẽ kolaa ne Baguma ode legãkanyakõ a. Leme odi nye odi kĩ ekena ne mbla a akũ, mo etsa bati bebã leme kĩ bekena foe lomo ni, yaanya onokõ ne Baguma ode legãkanyakõ a. XX Foesũ mabi mi kĩ miapuli miwo ne ode legãkanyakõ a, nte miakena ne Baguma kawe akũ kaba mbla batsane mo Farisifo a.

Yesu Fotsa Katsa Ne Kalokpa Kana Akũ.

XXI “Minu kĩ kokoe a, bibi bati kĩ, ‘Tako oti, ade odi nye odi kĩ edi awu ni, baadzemo ye.’ XXII Leme finyaa mabi mi kĩ odi nye odi kĩ ena kalokpa ne owaẽ akũ ni, baadzemo ye. Odi nye odi kĩ eve owaẽ kĩ, ‘Okosia’ ni, baakpã ye

benamena ne Ɔmaĩ banokõẽ ane bedzemo ye, ade odi nye odi kĩ eƳe ɔwaẽ kĩ, ‘oyae’ ni, efeta ekpa ode fi luwotu a kame kanaa. ^{XXIII} Foesũ nte ɔƳe kĩ akɔa nɔ afolibɔ fɔtsa ɔnaate ne afolibɔ atenyɛ akũ ɔkpa Baguma, mɔ ote ane kĩ awaẽ nee nɔ kalɔe ni, ^{XXIV} fɔne nɔ afolie fɔtsa a awɛ kayi ne afolibɔ atenyɛ a lotɔ ne awã, kamuniki kanaalɔla mi mɔ ye kayite tã fɔmɔ ayakɔa nɔ afolie fɔtsa ɔkpa Baguma.

^{XXV} “Nte odi sama nɔ ne fɔletsɔ kadzekõ ni, boã mbodi milɔla mi kayite ne lokɔ a kĩ lideĩ fɔmɔ baave kale a. Nte nné aye mɔ miwo fɔletsɔ kadzekõ a, oti a aakɔa nɔ edo ne fɔletsɔ ɔdzene awɛ. Fɔletsɔ ɔdzene a lemɛ aakɔa nɔ ekpa polisifɔ ade baado nɔ ne kɔla a. ^{XXVI} Mabi nɔ ne ɔnokɔali kame kĩ ade awã aana flee kɛnaawo lokɔ a kĩ ose kɔtɔ a flee oyua a.

Yesu Fɔtsa Katsa Ne Kɔtsõ Mɔ Kɔnyɔ Liti Kane Akũ.

^{XXVII} “Minu kĩ bele kĩ, ‘Batsõ mɔ banyɔ betane bakɔba liti.’ ^{XXVIII} Lemɛ finyaa mabi mi kĩ odi nye odi kĩ emó osole, mɔ ekɔ ye odo ni, eƳe ye kɔkɔe ne ye ɔwɔle kame. ^{XXIX} Foesũ nte nɔ somɔna linebi afõ akɛna tɔkpa ni, bole de kata kamuni. Fɔnene fɔkpa nɔ kĩ ayela nɔ sukɛna kakɔ kadi kɛba kĩ baata nɔ oti mɔa bido ne fi kĩ fɔádĩ kame. ^{XXX} Nte nɔ somɔna kɔkɔɔ afõ akɛna tɔkpa ni, tsua koe kata kamuni. Fɔnene fɔkpa nɔ kĩ ayela nɔ kɔkɔɔ mɔa kɛba kĩ beta nɔ oti mɔa a flee bido ne fi kĩ fɔádĩ a kame.

Yesu Fɔtsa Katsa Ne Kɔtsõ Mɔ Kɔnyɔ Kasĩ Akũ.

XXXI “Bele leme kī, ‘Odi nye odi kī yaasī ɔtsō ni, kene kī ekpa ye kotsō kasī ovoli.’ XXXII Leme finyaa mabi mi kī nte onyole odi sī ɔtsō ne foletsa bebā akū keba kī nné ye liti kanε sū ni, onyole a fō otsole a boa adɔpaa nte ebuki enadzi konyo bebā. Ade ayea onyole bebā a kī yaakoã ye a leme boa adɔpaa a.

Yesu Fɔtsa Katsa Ne Fubo Kalɔ Kakpa Baguma Akū.

XXXIII “Minu leme kī bibi kɔkɔε bati a kī, ‘Mitatu mi fubo, mbom mikena ne fubo a kī milɔ mikpa boe ɔlate a akū.’ XXXIV Leme finyaa mabi mi kī mitalɔ fubo nte miakena nhihie adi. Mitatani ode, kitonekī Baguma legākpo yanε. XXXV Mitatani tite kitonekī Baguma aboa kakekō tane iye mitani Yerusalem, kitonekī enye Legā Kpale a ɔmato. XXXVI Tatani nɔ lɔlɔ malo, kitonekī ɔlāapuli ɔdani ɔlɔlɔ mɔape malo sekena suwovoe iye ɔwɔwa. XXXVII Mikō mile kī, ‘Oo,’ iye ‘Oowo.’ Kale bebā kī miale ne kakī liti to Oti Kpa a sekē.

Yesu Fɔtsa Katsa Ne Tɔkpa Kakena Kase Tɔkpa Kɔtɔ Akū.

XXXVIII “Minu kī bele kī, ‘Linebi ne linebi kadokō, lɔdō ne lɔdō kadokō.’ XXXIX Leme finyaa mabi mi kī mitakena tɔkpa mise tɔkpa kɔtɔ. Nte odi bale nɔ awe ne somona ɔlɔtɔ ni, fō ebale nɔ ne seba ɔlɔtɔ leme. XL Ade nte odi sama nɔ ne foletsa kadzekō kī yate nɔ atadie anyanglede ni, fō ete nɔ atadie wulaa a leme. XLI Nte oti kī edeī otumi he nɔ kī lɔ ye fɔtsa mɔ kuvū mitsā lisikū mɔa ni, lɔ foe mitsā fusikū nviã. XLII Nte odi wā

nɔ litsedi ni, kpa ye, nte odi we kɔ̃ yave litsedi ne nɔ sekẽ ni, kpa ye eve.

Yesu Fɔtsa Katsa Ne Bakesĩne Kale Kawe Akũ.
 XLIII “Minu kɔ̃ beɛ kɔ̃, ‘We nɔ okɔba kale, kakesĩ nɔ bakesĩne.’ XLIV Leme finyaa mabi mi kɔ̃ miwe mi bakesĩne kale ade mibɔa mpaɛ ne bikɔ̃ bitomɔ mi liti a lolɔ, XLV ayekɔ̃ miadani boe ɔlega ne ode a babi. Kitonekɔ̃ ye afɔ̃ suwa ata kakpa bati wɔ̃ mɔ bati kpa flee, ade yafɔ̃ oni ako kakpa bati kɔ̃ badã kpɔ̃ mɔ bikɔ̃ baadã kpɔ̃ a flee a. XLVI Nte miawe bikɔ̃ bawe mi kale odi a, kɔtokase kɔodabe miána? Tɔgɔle batene malo akena foe lomɔ! XLVII Ade nte mi bakɔba odi miado onukpẽ ni, litsa mitene kakena? Amamufɔ̃ malo akena foe lomɔ! XLVIII Foesũ midã kɔ̃ mikpɔla nde ayekɔ̃ mi ɔlega ne ode a leme kpɔla a.

VI

Yesu Fɔtsa Katsa Ne Seme Kale Kakena Akũ.
 I “Midã kadã wɔ̃ kɔ̃ milãakena mi ɔsum fɔtsa a ne kanade ane ayekɔ̃ bati aamɔ letsa a kɔ̃ miakena a. Nte mikena foe ne bati ane ni, milãana kɔtokase mitomena mi ɔlega ne ode a sekẽ. II Foesũ nte ote ohiãni fɔtsa ni, tade letsã ne foe akũ nde ayekɔ̃ ane kame keke fɔtsa bakenane a akena ne be fɔtsenakɔ̃ mɔ toblonu ane a. Bakena foe ayekɔ̃ bati aamu be. Mabi mi pefee kɔ̃ bete be kɔtokase a flee kɔkɔɛ. III Foesũ nɔ kɔ̃ nte akena seme kale okpa ohiãni ni, tafɔ̃ nɔ okɔba paa malo linyi letsama ne foe akũ. IV Foesũ nɔ futetsa a fɔna ne kabela kame, lokɔa nɔ ɔlega a kɔ̃ yamɔ fɔtsa ne kabela kame a, aase nɔ foe kɔto.

Yesu Fɔtsa Kasa Ne Mpaebɔ Akū.

V “Nte miabɔa mpae ni, mitakena nde ane kame keke fɔtsa bakenane a aye. Bawe kayidza kadza kabɔa mpae ne Yudafo fɔtsenakɔ̃ mɔ toblonu fɔbalikɔ̃ ayekĩ odi nye odi aamɔ be. Mabi mi ne ɔnokɔali kame kĩ bete be kɔtɔkase a lodo kɔkɔe. VI Leme nte abɔa mpae ni, wo ne nɔ kɔla kame, kabale kɔla a lɔkɔa kabɔa mpae kakpa nɔ ɔlega a kĩ bɔámɔ mɔ ane a, lɔkɔa Aga a kĩ yamɔ fɔtsa a kĩ akena ne kabela kame a aase nɔ kɔtɔ.

VII “Nte miabɔa mpae ni, mitale fɔletsa beble-bee kĩ fɔlá kayɔ nde ayekĩ amamufɔ akena a. Be bakɔna kĩ nte be mpaeɔ deĩ lugo a mɔ Baguma aatse be. VIII Mitakena mi akū nde be, kitonekĩ mi ɔlega nyina letsa a kĩ lisĩ mi kɔkɔe fɔmɔ miavia ye malo. IX Foesũ mibɔa mpae kĩ,

‘Boe ɔlega kĩ edeĩ ne ode,
nɔ dĩ akū lekpalɛ.

X Nɔ legākanya lɛya.

Bekena nɔ kawɛ ne tite akū,
nde ayekĩ bakena ne ode a.

XI Kpa boe daa funitsã a kĩ busĩ nviã a.

XII Kɔa boe tɔkpa a kĩ bɔkɛna a kate boe,
nde ayekĩ bɔakɔa kate bikĩ bekɛna tɔkpa
ne boe akū a.

XIII Takpã boe ɔnamena sɔhuisse kame,
mbom nye boe katomena Oti kpa a awe.
Fɔya lomɔ.’

XIV “Kitonekĩ nte mikɔa bati tɔkpa a kĩ bekɛna ne mi akū mite be ni, mi ɔlega ne ode a leme aakɔa mi tide a ete mi. XV Leme nte mitákɔa bati tɔkpa mite be ni, mi ɔlega ne ode a leme lelákɔa mi tɔkpa a ete mi.

Yesu Fɔtsa Katsa Ne Onukpě Kasui Akũ.

^{XVI} “Nte miasui onukpě ni, mitakena ane kame kusuu nde ayekĩ ane kame keke fɔtsa bakenane akena a. Bakena ane kame kusuu ayekĩ bati aamo kĩ basui onukpě. Mabi mi ne onokɔali kame kĩ beɛ be kotokase a flee kɔkɔe. ^{XVII} Nte asui onukpě ni, vɔle ane, do kugua ne lolɔ kame kasela tɔlɔ, ^{XVIII} ayekĩ bati bebã lelányi kĩ asui onukpě. No ɔlega a, kĩ baámɔ mɔ ane a odi aanyi, ade ɔlega a kĩ yamɔ fɔtsa ne kabela kame a aase no foe koto a.

Ode Legākanyakō Nye Akū Kana Fɔtsa Kakpɔtakō.

^{XIX} “Mitawe akū kana fɔtsa miyi akū ne tite kĩ akū, awã kĩ fupuka mɔ nkandɔlɔ aabula foe kade, ade bayekpane leme abubuli kɔla kawo kaye foe a. ^{XX} Mbom miwe akū kana fɔtsa miyi akū ne ode, awã kĩ fupuka mɔ nkandɔlɔ lelábubula foe kade, ade bayekpane leme lelápuli bubuli biwo biye foe a. ^{XXI} Kitonekĩ awã kĩ no fɔtsa mɔ kɔya deĩ ni, ade awã no ɔwɔle leme deĩ a.

Oti Ane Nye Ye ɔsedza.

^{XXII} “Otidziwa banebi nye ye ɔsedza. Nte no banebi amɔ kamɔ wĩ ni, no oti mɔawe a flee aana ne ohaĩ kame. ^{XXIII} Leme nte no banebi lenéne ni, no oti mɔawe a aana ne ɔtũ kame. Foesũ nte ohaĩ a kĩ edeĩ ne no kame a nye ɔtũ ni, no oti mɔawe kame aake ɔtũ paa.

Yesu Tsa Fɔtsa Ne Baguma Liti Katomena Mɔ Akū Kana Fɔtsa Liti Katomena Akũ.

XXIV “Odima leláapuli esum balate nviã, ki-tonekĩ yaakesĩ om̄oa lok̄oa ewe oyade a kale, ãye yaakoa akũ emenam̄o om̄oa esupa oyade a. Onok̄oali nye kĩ oláapuli osum Baguma m̄o katinya kame fotsa. XXV Ade foesũ mabi mi kĩ mitaha akũ ne letsa a kĩ míanya, mim̄oa midzi nkpã akũ, ãye tilima a kĩ míasua akũ ãye midzi a akũ. Mb̄oee nkpã táte k̄oya eba funitsã, ãye mb̄oee oti m̄oawe a táte k̄oya eba tilima m̄o tetadie? XXVI Midã k̄ov̄olabi, k̄oádu funitsã, k̄oák̄pota funitsã kako ne tili kame, leme mi Òlega ne ode a ad̄oola koe! Mb̄oee mitáte k̄oya miba k̄ov̄olabi? XXVII Mi kame owei aapuli ek̄oa luwi m̄oa ete ne ye nkpã fuwi akũ nte eti eha ye akũ bo aye malo?

XXVIII “Lok̄oa nde sũ miaha akũ ne tilima m̄o tetadie akũ? Midã ayekĩ lup̄o kame futse ako nhuile kabo ane, foák̄ena adzuma, foát̄ae tileti kan̄o tilima kakpa akũ. XXIX Leme mabi mi kĩ Legã Salomo m̄o ye akũ kana fotsa a flee malo táhehe f̄ole kadã nde nhuile k̄ĩ kame am̄oa. XXX Nte Baguma keele lup̄o kame tuwĩ lom̄o, kĩ tideĩ nkpã nviã, ade kunya tiku, bipila te ne luwotu kame a ni, eláakeele mi eba te? Mi katekado adã kabii paa!

XXXI “Foesũ mitakaha akũ mikale kĩ, ‘Litsa bóanya, litsa bóam̄oa ãye litsa bóasua akũ?’ XXXII Ade fuk̄ĩ bame liti amamuf̄o atom̄ena a. Mi Òlega ne ode a nyina kĩ fotsa k̄ĩ flee s̄i mi. XXXIII Mif̄o ane eȳool̄e mi eba ne Baguma ode legãkanyak̄o a liti katom̄ena m̄o fotsa a kĩ ewe etom̄ena mi sek̄e kĩ mikena a akũ, lok̄oa yaakoa fotsa bebã k̄ĩ flee ebu ekpa mi. XXXIV Foesũ

mitaha akũ ne kunya akũ, kunya luwi a aana de mɔawe ɔhau. Luwi nye luwi kame ɔhau pone ekpa de.

VII

Yesu Fɔtsa Katsa Ne Bati Bebã Kadzɛmena Akũ.

^I “Mitadzɛmɔ bati bebã fɔfɔ Baguma lɛmɛ lɛdzɛmɔ mi, ^{II} kitonɛkĩ ayekĩ midzɛmɔ bati bebã a, ade aye Baguma lɛmɛ aadzɛmɔ mi a, ade mbla a kĩ mikɔa midzɛmɔ bati bebã a, ye mɔape a yakɔa ɛdzɛmɔ mi malo a.

^{III} “Nde sũ adã sukuluku kĩ sideĩ ne awaẽ linebi kame lɛmɛ aámɔ luvokũ a kĩ lideĩ ne nɔ mɔawe linebi kame a? ^{IV} Nde aapuli obi awaẽ kĩ, ‘Make nɔ aduli, fɔ ãnye sukuluku ne nɔ linebi kame’ ne lɔkɔ a kĩ luvokũ deĩ ne nɔ mɔawe linebi kame a? ^V Nɔ anɛ kame keke fɔtsa ɔkenanɛ! Nya lɔtɔ kanye luvokũ a ne nɔ linebi kame lɔkɔa aapuli ɔmɔ yededeede ɔnye sukuluku ne awaẽ linebi kame a.

^{VI} “Mitakɔa fɔtsa a kĩ foe akũ kpale mikpa bakpete, baadani beyaadɔ mi. Mitata mi fulitsa kĩ fɔte kɔya miko baplakuo, kitonɛkĩ baasumini foe bibula kade.

Mivia Fɔtsa, Miwe Fɔtsa, Mibɔa Oponu a.

^{VII} “Mivia fɔtsa lɔkɔa baakpa mi, miwe fɔtsa lɔkɔa míamɔ foe, mibɔa oponu lɔkɔa baabinya bekpa mi. ^{VIII} Kitonɛkĩ odi nye odi kĩ ɛwã fɔtsa ni, yana foe. Odi nye odi kĩ ɛwe litsedi ni, yaamɔ de, ade odi nye odi kĩ yabɔa oponu ni, baabinya bekpa ye.

IX “Mi kame obilega ɔɔdabe deĩ kĩ nte obi via ye abodoo ni, yaabɔe de edo ne ye awe? X Ìye nte evia ye kafɔabi kĩ yaakɔa kɔe ekpa ye? XI Nte mi a kĩ minye bati kpa a, minyina ayekĩ miate mi babi fɔtsa wĩ a ni, titi eni mɔ mi ɔlega ne ode leláakɔa ye fɔtsa wĩ pii ekpa bikĩ bavia ye a? XII Foesũ letsa nye letsa a kĩ miawe kĩ bati bebã bekena bekpa mi ni, mi malo mikena foe lomɔ mikpa be. Ade fukĩ Mose mbla a mɔ Baguma onukpẽ banyene fɔlets a atsa a.

Mitsã Onyukpẽ Manɛwa a Kame Miwo.

XIII “Mitsã onyukpẽ manɛwa a kame miwo, kitonẽkĩ onyukpẽ a kĩ esa a mɔ osi a kĩ edzele a anaa kawɔ kame, ye akũ katsã lelá ɔsĩ, ade bati pii lemɛ tsẽ ye akũ a. XIV Lemɛ onyukpẽ a kĩ yanaa nkpã kame a manɛ, ade osi a kĩ ewaa enaa a awã akũ katsã deĩ ɔsĩ, ade bati sukuloo lemɔ ye a.

Kutse Nye Kutse Mɔ Koe Babi Kĩ Kɔawũ.

XV “Midã mi akũ kadã wĩ ne fɔvã tunukpẽ banyene akũ. Baya ne mi sekẽ miamɔ nde baveli aye, lemɛ ne be kamekame ni, bela nde kulikii kĩ kude adõ. XVI Míakɔa be fɔkenatsa minyi be. ɔɔɔabi lãwũ akutu, ade ɔtatsue lãwũ asãã babi a. XVII Kutse wĩ awũ babi wĩ, ade kutse kpa lemɛ awũ babi kpa a. XVIII Kutse wĩ leláapuli kuwũ babi kpa, ade ayea kutse kpa lemɛ leláapuli kuwũ babi wĩ a. XIX Lemɛ kutse nye kutse kĩ kɔáwũ babi wĩ ni, batsua koe kata kado ne fi kame. XX Foesũ fɔvã onukpẽ banyene a fɔkelatsa míakɔa minyi be.

Owei Aanaa Ode Legākanyakō a Kame?

XXI “Nné odi nye odi kī yave yī kī, ‘Boe ɔlate! Boe ɔlate!’ aanaa ode legākanyakō a kame, mbɔente bikī bakena ne Nda kawε akū a odi aanaa awā. XXII Nte Kadze Luwi a wo ɔto a, bati pii aave yī kī, ‘Boe ɔlate! Boe ɔlate! Nné no dī akū bole Baguma foletsas, boblomena hūhū kpa butomena bati kame, ade bokena awāwā fotsa pii leme a?’ XXIII Ade awā mo maabi be kī, ‘Inyina mi kou. Midzakū ne yī anε kame, mi tokpa bakenane!’

Yesu Fotsa Katsa Ne Fola Bakene Nviã Akū.

XXIV “Foesū odi nye odi kī yatse yī foletsas kī mo ekena ne foe akū ni, ela nde onyansani kī eke ye kola ne de mo osi akū. XXV Oni kpale ko, ade towo yili, owe vū mo osi mo osi eyaboa kola a, leme kotaveli, kitoneki bike koe ne de mo osi akū. XXVI Leme odi nye odi kī yatse yī foletsas kī mo yaakena ne foe akū ni, ela nde odzimbifo kī eke ye kola ne da kame. XXVII Oni kpale ko, towo yili ade owe mo osi vū eyaboa kola ade kuveli, kotogbloo, kububuli a!”

Yesu Tsa Fotsa Mo Otumi.

XXVIII Kī Yesu yua foletsas kī kale a, akū dzuli bati kodabu a ne ye fotsa katsa a akū. XXIX Kitoneki etsa fotsa nde oti kī edei otumi, kī fotana nde mbla batsane a fude.

VIII

Yesu Tsa Onyole Odi.

I Kī Yesu ka eto katobii a akū yaya a, bati kodabu kodabu pii tomo ye. II Ade awā mo

onyole odi kī yaso foso ngbā, kī bati avila a, yake aduli ne ye ane kame, ebi ye kī, “Boe ɔlate, nte fonye no kawε ni, aapuli ofo foso kīi lewo ne yī akū.”

III Yesu yo awe eta ye ade ebi ye kī, “Mawe lomɔ. No akū ekpale.” Ade letaleta foso a wo ne ye akū a. IV Ade Yesu bi ye kī, “Tse! Tabi odima kadima, mbom dā osi kpīi kanaa osɔfo sekē, kafō esela no akū edā, lokoa kaboa afolie a kī Mose mbla tsa a, fofō odi nye odi enyi kī osae.”

Yesu Tsa Roma Sodzafo Onokɔɛ Odi Osumune.

V Ke liti a, kī Yesu wo ne Kapernaum omato kame a, Roma sodzafo onokɔɛ odi yake ye aduli kī, VI “Boe ɔlate, yī osumune waa ne kola yaso, yaapuli ekuna akū, ade elamo lubo kamɔ paa a.”

VII Yesu kpa ye mbuaye kī, “Maaya iyaatsa ye.”

VIII Leme sodzafo onokɔɛ a bi ye kī, “Boe ɔlate, ntakpola kī awo ne yī toto kame. No kō le kale moape lokoa yī osumune a aasae. IX Yī malo inye oti kī ndeī ne banokɔɛ kayo, ade ndeī sodzafo ne yī malo kayo a. Nte mbi be kame odi kī, ‘Naa’ ni, yanaa, ade nte mbi obebā leme kī, ‘Ya’ ni, yaya. Nte mbi yī osumune leme kī, ‘Kena fukī’ ni, yakena foe.”

X Kī Yesu nu fukī a, fokena ye wāwā, ade ebi bati a kī bitomɔ ye a kī, “Onokɔali mabi mi kī ntámɔ odima ne Israel kī edeī katekado kīi odu. XI Mabi mi pipipi kī bati pii aato suwa kadekō mo suwa katomukō beyaadzi ne opunu akū mo Abraham, mo Isak mo Yakob ne Baguma legākanyakō a kame. XII Leme Baguma aata bikī

be mbom la legākanyakō a ewula ne otū kame, awā kī baabe, beba adō.”

XIII Ke liti a, Yesu bi sodzafō ɔnokōē a kī, “Naa kōla! Fōaya ne foe kame nde ayekī ɔte odo a.” Ade ye ɔsumune a sae ne lōkō a na pɛpɛɛɛ kame a.

Yesu Tsa Bati Pii Fōsō.

XIV Kī Yesu naa Petro toto kame a, emō kī Petro nyina waa ne okena akū yaso atilili. **XV** Yesu pi ye ne kōkpō ade letaleta atilili a dō ye, eyidza ete opunu ekpa ye a.

XVI Kī olobe wo ɔto a, bati kpā bikī hūhū kpa deī ne be kame a bema Yesu. Eblōmena hūhū kpa a etomena be kame mō kale mōape, ade etsa basone a flee leme a. **XVII** Fukī ekena kī ya ne foe kame nde ayekī Baguma Onukpē ɔnyene Yesaya le eyi kī,

“Ye mōawe lekōa boe lubo kamō,
mō fōsō ahōlō ahōlō ete ne ye akū!”

Bati Kī Bewe Kī Baatomō Yesu.

XVIII Kī Yesu mō bati kōdabu pii a kī kusinya ye a, ebi ye fōtsa bakolene a kī befō binyina benaa ɔwō lutubu baū a liti. **XIX** Ade mbla batsane a kame odi ya ne ye sekē eyabi ye kī, “Fōtsa ɔtsane, maatomō nō nnaa kakō nye kakō kī aanaa.”

XX Yesu kpa ye mbuaye kī, “Kulikii deī fudzikō, kōvōlabi leme deī fōtsōe, leme Otidziwa Obi a lelā awā kī yate lōlō malo.”

XXI Ye fōtsa bakolene a kame ɔmōa leme bi ye kī, “Boe ɔlate, maatomō nō, leme fō nnaabila nda tō.”

XXII Ade Yesu kpa ye mbuaye kī, “Tomɔ yī. Fone bikī bidzi nkpā nde kaku biku a awe bibila be mɔawe banɔkpa.”

Yesu Dina Ɔwe Kɔbɛ Onukpɛ.

XXIII Yesu wo ne ɔkɔlo odi kame ade ye fotsa bakolene a tomɔ ye a. **XXIV** Letaletɔ ɔwe mɔ ɔsī odi do kavū awe ne ɔwo lutubu baū a akū, kabɔa mui kako ne ɔkɔlo a kame, kī fɔfɔ kite sukuloo ɔkɔlo a adoomu, leme Yesu kɔ waa tida. **XXV** Ye fotsa bakolene a nadzela ye, ade bibi ye kī, “Boe Ɔlate, tɛ boe o-o! Buku buyua!”

XXVI Ade Yesu bi be kī, “Nde sū libe wo mi lomɔ? Mi katekado lepɔne kolaa!” Adeke eyidza edza, ewūni ne mui mɔ ɔwe a akū kī bekena dīi, ade awā flee kena dīi a.

XXVII Odi nye odi kena saa, ade bekavia akū kī, “Oti ɔdabe odu nye okīi? Ɔwe mɔ mui malo atse ye ɔledo!”

Yesu Tsa Banyole Nviā Badi Kī Hūhū Kpa Deī Ne Be Kame.

XXVIII Kī Yesu nawo Gadara tite akū ne ɔwo lutubu baū liti a, bati nviā kī hūhū kpa na ne be kame né bito fɔke kī babila banɔkpa kame beyatselamɔ ye. Ayekī be akū deī libe sū ni, odima lapuli katsā awā osi a katɛ. **XXIX** Ade letaletɔ bebɔa fɔwɔla kɔɔba kī, “Nɔ Baguma Obi, litsa deī ne bɔmɔ nɔ kayite? Kaya ɔya kī ayaakena boe tenya fɔmɔ lɔkɔ wī a aawo ɔto mbɔɛɛ?”

XXX Awā fuā kako a kī baplakuo kɔdabu baū kudi dza kɔkadɛ a. **XXXI** Hūhū kpa a ke Yesu aduli kī, “Nte aablɔmena boe ni, fɔ bonaawo ne baplakuo kɔdabu ne akīi a kame.”

XXXII Yesu bi be kī, “Minε minaa.” Foesū benε benawo nε baplakuo a kame. Ade baplakuo kodabu a flee wula atse kliklikli beka lowotuni gei a biwo nε lutubu a kame, bemoa mui biku a. XXXIII Bayae akū badāmenane a lo benaa omato kame benale foletsa a kī foya a flee nε banyole nviā a kī hūhū kpa na nε be kame a akū. XXXIV Foesū omato a kame bati flee né kī banaadā Yesu, ade kī bemó ye a, bike ye aduli kī edzakū nε be tite akū enaa.

IX

Yesu Tsa Onyole Odi Kī Eveliveli.

I Yesu de ewo nε okolo a kame emuniki etsā mui a anε enaa ye awe omato kame. II Nε awā a, bati badi boε oti odi kī eveliveli bewola nε okena akū bema ye. Kī Yesu mó be katekado a, ebi oti a kī eveliveli a kī, “Yī obi, nō owole eka edzi! Nkoa nō titikpa nte nō.”

III Adeke Yudafo mbla batsane badi bi be akū kī, “Onyole kī ale fubusuotsa!”

IV Kī Yesu mó letsa a kī bekakona a, ele kī, “Nde sū miakona tokpa nε mi towole kame? V Foletsa kī foodabe léla osi mo kale, ‘Nkoa nō titikpa nte nō,’ mbōεε kī, ‘Yidza katsā?’ VI Leme kī míanyi kī yī Otidziwa Obi, ndei kobē kī makoa bati titikpa kate nε katinya kī kame sū ni, midā o-o!” Foesū ebi oti a kī eveliveli a kī, “Yidza kadza, boε nō okena kanaa nō awā!” VII Onyole a yidza edza, edzakū enaa ye awā. VIII Kī bati a mó fukī a, libe wo be ade bimu Baguma nε ayekī ekoa kobē kī odu ekpa batidziwa.

Yesu Vε Mateo Kī Eyaatomō Ye.

IX Yesu dzakũ ne awã, ade kĩ etsẽ yanaa a, emó ɔgɔle ɔtenɛ odi kĩ bave Mateo kĩ edzi ne ye ɔgɔle katekõ. Ebi ye kĩ, “Tomɔ yĩ.” Ade Mateo yidza etomɔ Yesu a.

X Kĩ Yesu kanya ne Mateo awã a, tɔgɔle batene pii mɔ tɔkpa bakenane bebã yadzi ne opunu akũ, bibumɔ Yesu mɔ ye fɔtsa bakɔlene a benya.

XI Farisifo a badi mó foe ade bivia ye fɔtsa bakɔlene a kĩ, “Nde sũ mianya kamɔa mɔ tɔgɔle batene mɔ tɔkpa bakenane?”

XII Yesu nu letsa a kĩ bekale a, ade ekpa be mbuaye kĩ, “Basonɛ lisĩ bekpa tutsonu ɔkenane, nné bikĩ bideĩ akũ ɔsĩ. **XIII** Minaawe Katselɛ Kpalɛwa a kale kĩĩ kayɔ, ‘Seme kale kakena mawe, nné bayae afɔlie kabɔa mawe.’ Ntáya kĩ mayaave bikĩ badã kpĩĩ, mbom ñya kĩ maave tɔkpa bakenane.”

Bivia Yesu Fɔletsɛ Ne Onukpẽ Kasui Akũ.

XIV Ke liti a, Yohanes Mui Ɔwɔlanɛ a fɔtsa bakɔlene ya ne Yesu sekẽ ade bivia ye kĩ, “Nde sũ bɔmɔ Farisifo bɔawe onukpẽ kasui, lɛmɛ nɔ fɔtsa bakɔlene a kɔ lásui onukpẽ kɔũ?”

XV Yesu kpa be mbuaye kĩ, “Kakɔna miakɔna kĩ obolitsõ ɔnyɔ bakɔba aadzi ne ayɔlɔhɔ kame ne lɔkɔ a kĩ edeĩ ne be kame a? Fɔláanya lomɔ. Lɛmɛ luwi a aaya kĩ baakpã obolitsõ ɔnyɔ a bedzakũmena ne be sekẽ, ade lɔkɔ a na kame mó baasui onukpẽ a.

XVI “Odima lákɔa limakũ vɔẽ kataɛ atadie kɔɛ, kitonekĩ limakũ vɔẽ a aavele lɔkɔɛ a lebẽ, lɔkɔa ɔkɛ baũ aawa eba ɔkɔɛ a.

XVII “Ade ayea odima lákɔ waĩ vɔẽ ne ɔyae ovoli kuvũ kɔɛ kame a, kitonekĩ ɔyae kuvũ a aayili

kobē, waĩ a liwula, ade ɔyae kuvũ a leme aabu kade a. Mbom bako waĩ vɔē ne ɔyae kuvũ vɔē kame lɔkoa foe atsu nviã a flee leláabu kade.”

Yesu Tsa Otsole Odi Mo Yairo Obitsole.

^{XXVIII} Kĩ Yesu kale kɔdzela a, Yudafɔ katsenakɔ ɔnɔkɔē odi ya ne ye sekē, ade eke aduli ne ye ane kame, ebi ye kĩ, “Yĩ obitsole ku finyaakĩ, leme yaate awe ne ye akũ ayekĩ yaanyinya.” ^{XXIX} Ade Yesu yidza bemɔ ye fɔtsa bakolene a bitomɔ ye benaa a.

^{XX} Otsole odi kĩ babɔane kawula ye futeli ewua-nviã flee natsã Yesu liti, eta ye atadie sɔtobi.

^{XXI} Ele ne ye lolɔ kame kĩ, “Nte nsila nta ye atadie odi pe, maasa.”

^{XXII} Kĩ Yesu dani emó otsole a, ebi ye kĩ, “Yĩ obi, nɔ ɔwɔle eka edzi. Nɔ katekado tsa nɔ.” Otsole a akũ de ɔsĩ ne lɔkɔ a na peperepe kame.

^{XXIII} Ke liti a, Yesu tomɔ ɔnɔkɔē a biwo ne ye toto kame. Kĩ emó tukutɔnɔ basãne mo bati beblebee a kĩ belamena kabe yoo a, ^{XXIV} ebi be kĩ, “Mi flee mine, kabisēētsole a táku, mbom tida kewaa!” Ade bati a flee memɔ ye a. ^{XXV} Kĩ beblomena bati a benemena a, Yesu wo ne kabisēē a sekē ne kola a kame. Epi ke ne kɔkpo ade kinyinya kiyidza kedza a. ^{XXVI} Fɔletsa kĩ gba ne tite a na akũ flee.

Yesu Tsa Banekune Nviã Badi.

^{XXVII} Kĩ Yesu to awã yanaa a, banekune nviã badi tomɔ ye ne liti bekabɔa fɔwɔla kɔɔba kĩ, “Dawid obi, mo boe kɔnya!”

^{XXVIII} Kĩ Yesu wo ne toto kame a, banekune a ya ne ye sekē, ade evia be kĩ, “Mite mido kĩ maapuli ntsa mi?”

Bekpa mbuaye kī, “Oo, boe ɔlate!”

XXIX Foesū Yesu kɔa awe eta be banebi ele kī, “Fɔya ne foe kame nde ayekī mite mido a.”

XXX Ade be ane binya bemó fɔkɔ a. Yesu si be mbla mɔ ɔsī kī, “Mitabi odima fukī!” XXXI Leme bedzakū ne awā benagbamena fɔletsa a ne Yesu akū ne tite a amantam a flee kame.

Yesu Tsa Omumu Odi.

XXXII Kī banyole a ne banaa a, bati badi kpā oti bebā kī yaápuli ele kɔdzela, kitonekī hūhū kpa deī ne ye kame a bema Yesu. XXXIII Kī Yesu sila eblomena hūhū kpa a ne ye kame a, epuli ele kɔdzela. Fɔkena bati kɔdabu a wāwā, ade bele kī, “Botámɔ tō fukī odu ne Israel.”

XXXIV Leme Farisifo a le kī, “Hūhū kpa a legā lekpa ye kobē enee yablomena hūhū kpa.”

Bati Kɔdabu a Akū Kó Yesu Kɔnya.

XXXV Yesu mini ne temato mɔ tukula a kame. Etsa fɔtsa ne fɔtsenakō a, ele Kale Wī a ne ode legā kanyakō a akū, ade etsa fɔso ahɔlo ahɔlo leme a. XXXVI Kī emó bati kɔdabu a, be akū kɔ ye kɔnya, kitonekī kipiā be, belá obumenane ade begba biko nde baveli kī belá ɔkpāne a. XXXVII Foesū ebi ye fɔtsa bakolene a kī, “Fudutsa a kī baaveli a pone, leme adzuma bakenane a lepóne. XXXVIII Foesū mike kɔba ɔlate a kī ye fudutsa baaveli a aduli, kī edo adzuma bakenane beyaakpota foe.”

X

Yesu Nye Fɔto Banyane Ewua-nviā.

^I Yesu ve ye fotsa bakolene ewua-nviã a ekpota, ade ekpa be kobẽ kĩ beblomena hũhũ kpa bitomena bati kame, betsa foso fudi nye fudi a.

^{II} Fɔto banyane ewua-nviã a buĩ nye. Ɔtonyade, Simon kĩ bibuki bave Petro, mo owaẽ Andrea,

Yakobo mo owaẽ Yohanes kĩ benye Zebedeo babi,

^{III} Filipo mo Bartolomeo mo Toma,

Mateo ogole ɔtene a,

mo Alfeo obi Yakobo mo Tadeo,

^{IV} Simon kĩ epili ye kade lolɔ,

mo Yuda Iskariot kĩ ye lenye Yesu ekpa a.

Yesu Do Fɔto Banyane Ewua-nviã a Fɔto.

^V Yesu do bati ewua-nviã kĩ fɔto mo ɔledo kĩ, “Mitanaa bikĩ benyẽ Yudafɔ a tite akũ ãye miwo

ne Samariafɔ temato kame. ^{VI} Mbom minaa Israelfɔ a kĩ bela nde baveli kĩ beyela osi a sekẽ.

^{VII} Minaade letsã kĩ, ‘Baguma ode legãkanyakõ a fuã!’ ^{VIII} Mitsa basone, midzela banokpa bidzi

nkpã, mitsa bikĩ baso foso ngbã, miblomena hũhũ kpa mitomena bati kame. Mite kobẽ kĩ

kɔa, foesũ mikɔa mikpa faa. ^{IX} Mitabɔe sika sidima mile ne mi fuvũ kame. ^X Odima etabɔe

ositsãne kuvũ, atadie ayade, mpabua ayade ãye otse kĩ bake katsã ele ne osi a akũ. Kefeta kĩ bekpa adzuma okenane letsã a kĩ esĩ a.

^{XI} “Nte miwo ɔmato ãye akula adi kame ni, miwe oti odi kĩ yaatuno ete mi, lokɔa mise ne ye

sekẽ, mina ne awã kenaawo kĩ miadzakũ. ^{XII} Nte miwo ne toto tidi kame ni, miwõna te kame bati

a kĩ, ‘Lukudo lena ne mi akũ.’ ^{XIII} Nte toto a kame bati a te mi mo kawole ni, mifõ mi lukudo

kawõna a kekaho ne be akũ. Leme nte betãte mi

ni, mifõ mi lukudo kawõna a kimuniki keya ne mi sekẽ. **XIV** Awã kĩ bati tãte mi ni, mine ne omato a kame lokoa miyo mi aboa akũ kudu miko be. **XV** Mabi mi onokwali a kĩ ne Kadze Luwi a akũ a, Baguma aamõ Sodom mõ Gomora bati konya eba omato a na kame bati.

Yesu Bi Ye Fõtsa Bakolene a Lubokamõ a Kĩ Baamõ a.

XVI “Midã, mado mi nde baveli aye ne kulikii kame, foesũ minyi kadi nde boe aye, midõla akũ boee nde mbloduma aye. **XVII** Midã mi akũ kadã wĩ, kitonekĩ bati aakoa mi bido ne foletsa badzene awe, ade baabo mi ne Yudafõ fotsenakõ a. **XVIII** Ade ne yĩ sũ baakpã mi benamena omã banokõ mõ fogã ane, lokoa fõnya adansie kĩ miadi ne Kale Wĩ a akũ mikpa be mõ bikĩ benyẽ Yudafõ a. **XIX** Nte bekpã mi benamena foletsa kadzekõ ni, mitaha akũ ne letsa a kĩ miãle mõ ayekĩ miãdzela a akũ. Nte loko a wo oto a, Baguma aakpa mi foletsa a kĩ miãle a, **XX** kitonekĩ nnẽ mi aale kodzela, mbom mi Olega Hũhũ a aale kodzela etsãmena mi akũ.

XXI “Bati aakoa be moawe bawaẽ bekpã kĩ beko, ade balega leme aakena foe lomõ ne be moawe babi akũ, ade babi aayidza bedza ne be bamane akũ befõ beko be a. **XXII** Bati flee aakesĩ mi ne yĩ sũ, leme oti a kĩ yaadza pintii kenaawo kawũna ni, Baguma aakpa ye nkpã. **XXIII** Nte bitomõ mi liti ne omato odi kame ni, milo minaa obebã kame. Mawe kĩ minyi kĩ milãayua adzuma kakena ne Israel temato a kame fomõ Otidziwa Obi a aaya.

XXIV “Fɔtsa ɔkolene odima lebé ye fɔtsa ɔtsane, ade ɔsumune leme lebé ye ɔlate a. XXV Kene kī fuwī ɔkolene kī yayaakena nde ye fɔtsa ɔtsane, ade ɔsumune leme kī yayaakena nde ye ɔlate a. Nte beve kola ɔnokɔẽ odi kī hūhū kpa flee legã a, buĩ kpa badabe beláave kola babi?”

Oti a Kī Kene Kī Bivila.

XXVI “Ne foe sū mitavila bati. Letsa nye letsa kī bekɔa bekɔla finyaa ni, baanye de kanya, ade kale a kī bekɔla ni, kaane binu ke. XXVII Letsa a kī mabi mi ne ɔtū kame a, mile de ne suwa ketee, ade letsa a kī minu ne kabela kame a, mide ke letsã ne kanade. XXVIII Mitavila bati a kī bako oti sukena leme beláapuli beko ɔkla a, mbom mivila Baguma a kī yaapuli ewola oti sukena mo ye ɔkla flee ne fi luwotu kame a. XXIX Kaple moape miakɔa kaya funitatae nviã, leme koe kame kamape malo láto ne tite kī fonyé mi ɔlega ne ode a kawe. XXX Mi kɔ Baguma kã mi lolɔ tolɔ malo flee. XXXI Foesū mitavila, kitonekī mite koya miba funitatae beblebee.

Yesu Kame Kabinya Mo Ye Kasĩ.

XXXII “Odi nye odi kī yaabɔa yĩ dĩ ne bati ane kī ye ode mane ni, yĩ malo maakena foe lomɔ nkpa ye ne Nda ne ode a ane. XXXIII Leme nte odi sĩ yĩ ne bati ane ni, yĩ malo maasĩ ye ne Nda ne ode a ane.

Bati Kayite Aasẽ Ne Yĩ Sũ.

XXXIV “Mitakɔna kī lukudo nkɔa ñyamena ne katinya kame. Oowo, ntáya mo lukudo, mbom kopã nkɔa ñyamena. XXXV Ñya kī makena ‘babinyole biyidza bedza ne balega akũ,

babitsole liyidza bedza ne bama akū,
babi batsō biyidza bedza ne be nyina amε akū.

XXXVI Oti bakesīne aanya ye moawe tōtō kame bati.’

XXXVII “Odi nye odi kī yawε ɔlega ĩye ɔma kale kaba yī ni, etákpola kī yanya yī fotsa ɔkolene, ade ayea odi nye odi kī yawε ye obinyole ĩye obitsole kale kaba yī ni, etákpola kī yanya yī fotsa ɔkolene. XXXVIII Odi nye odi kī etábɔε ye asendua etomo yī ne liti ni, etákpola kī yanya yī fotsa ɔkolene. XXXIX Odi nye odi kī εwe kī yapili ye nkpā ni, yaayela ye, lemε odi nye odi kī yaayela ye nkpā ne yī sū ni, yaana nkpā kī elá kawūna a.

Baguma Aase Bati Kɔtɔ.

XL “Odi nye odi kī etε mi ni, etε yī malo, ade odi nye odi kī etε yī ni, etε oti a kī edo yī a. XLI Odi nye odi kī etε Baguma onukpē ɔnyene ne kī enye Baguma onukpē ɔnyene sū ni, yaana kɔtɔkase a kī Baguma aakpa ye a kame. Ade odi nye odi kī etε oti wī ne ayekī enye oti wī sū ni, yaana tsefā ne kɔtɔkase a kī Baguma aakpa oti wī a odu. XLII Mite mido kī odi nye odi kī yaakpa bikī bitomo yī kī kame obisēde moa mui dowa kɔɔpu moape malo ni, yaana foe kɔtɔkase.”

XI

Yohanes Mui Ɔwɔlane a Do Batɔ Ne Yesu Sekē.

¹ Kī Yesu do ye fotsa bakolene ewua-nviā a foto eyua a, edzakū ne awā enaa temato a kī tifuā a kame kī yanaatsa fotsa, ede letsā ne Baguma foletsā a lemε akū.

II Kĩ Yohanes Mui Ɖwolanɛ a, kĩ ɛwaa kɔla a nu letsa a kĩ Yesu lamena kakɛna a, edo ye fɔtsa bakɔlɛnɛ a badi nɛ Yesu sɛkɛ, III kĩ bɛnaavia ye kĩ, “Nɔ nyɛ oti a kĩ Baguma lɛ eyi kĩ yaaya a, mbɔɛɛ kĩ bɔdā oti bɛbā anɛ?”

IV Yesu kpa be mbuayɛ kĩ, “Mimuniki minaabi Yohanes letsa a kĩ mimó mɔ letsa a kĩ minu a. V Banɛkunɛ mó fɔkɔ, bikĩ biveliveli yidza bɛtsɛ, bikĩ basɔ fɔsɔ ngbā akū kpalɛ, batɔsɪnɛ anu fɔkɔ, bɛdzɛla banɔkpa bidzi nkpā, ade bɛlamɛna ahiāfɔ Kale Wĩ a kabi a. VI Baguma hila oti a kĩ ɛtámɔ nfumusɔ adima nɛ yĩ akū!”

VII Kĩ Yohanes batɔ a dzakū a, Yesu yi kayɔ mɔ kɔdzɛla kalɛ nɛ Yohanes akū kabi bati kɔdabu a kĩ, “Kĩ minɛ minaa Yohanes sɛkɛ nɛ kɔsa kamɛ a, litsa minaadā? Kɔɔkaɛ kĩ ɔwɛ abɔa katomɛna katɛmɛna mbɔɛɛ? VIII Litsa koū minɛ minaadā? Oti kĩ ɛkɛɛɛ ye akū mɔ fɔtsa mɔ kalɛ yanɛ? Bikĩ bado tɛtadiɛ mɔ kɔya ni, fɔgā tɔtɔ kamɛ bana. IX Mibi yĩ letsa a sū koū miti minɛ a? Kĩ míámɔ Baguma onukpɛ ɔnyɛnɛ mbɔɛɛ? Nuwĩ mifɔ nti mbi mi, mimó oti a kĩ ɛbɛ Baguma onukpɛ ɔnyɛnɛ malo. X Kitonɛkĩ Yohanes akū mɔ Katsɛɛ Kpalɛwa a lɛ kĩ,

‘Dā, maado yĩ fɔtɔ ɔnyanɛ ñnyamɛna nɔ lotɔ, yaalɔla osi nɛ nɔ lotɔ.’

XI Mabi mi nɛ ɔnɔkɔali kamɛ kĩ Yohanes Mui Ɖwolanɛ a bɛ otidziwa odi nyɛ odi kĩ edzi nkpā tɔ. Lɛmɛ oti kĩ ɛnyɛ obisɛ kɔlaa nɛ ode lɛgākanyakɔ a bɛ Yohanes. XII Kito Yohanes letsā kade lɔkɔ keyawo nviā kĩ ni, bati yidza bɛdza nɛ Baguma ode lɛgākanyakɔ a akū mɔ ɔsĩ mɔ ɔsĩ, bɛlamɔ mbɔdi kabɔa lɛmɛ kĩ basua de kaya osi.

XIII Keyawo Yohanes kaya loko a, Baguma onukpẽ banyene a flee mo Mose mbla a le foletsa biyi ne Baguma ode legākanyakõ a akũ. **XIV** Nte miawe kĩ miate be foletsa mido kõ ni, minyi kĩ Yohanes nye Eliya a kĩ bele biyi kĩ yaanya loto eya a. **XV** Oti a kĩ edeĩ soto kĩ sanu tuwuli ni, etse!

XVI “Finyaa, litsa maakoa nviã bati nkõnamo? Bela nde babisẽ kĩ bikoni ne koyaato bagulo. Baboa fowola kabi be bakoba kĩ,

XVII ‘Bosã obolitsõ tonõ bokpa mi,
leme mitáto.

Bosã tukutonõ bokpa mi,
leme mitábe.’

XVIII Kĩ Yohanes ya a, etánya etámõa waĩ, leme bati le kĩ, ‘Hũhũ kpa deĩ ne ye kame!’ **XIX** Kĩ Otidziwa Obi a ya a, yanya, yamõa, ade bati le kĩ, ‘Midã onyakpane mo bave onõane, togole batene mo tokpa bakenane okoba.’ Leme oti fokelatsa kame bamo ye nyansã.”

Temato a Kĩ Tetáte Bido a.

XX Temato a kĩ te kame Yesu kena ye awāwā fotsa pii a kame bati tādani towole kame, foesũ ekã temato a ane ele kĩ, **XXI** “Bõbõe makpa nõ Korasin! Bõbõe makpa nõ Betsaida! Nte awāwā fotsa a kĩ nkena ne mi kame a mo Tiro mo Sidon temato kame nkena foe ni, kufe te kame bati dani towole kame kókõe bidzi tikpekpe, betsela bato.

XXII Mabi mi ne onõkõali kame kĩ ne Kadze Luwi a akũ ni, Baguma aamo Tiro mo Sidon bati konya eba mi! **XXIII** Ade nõ Kapernaum! Owe kĩ abõe nõ akũ odela onaatamo ode? Baakena nõ ne kayo flee onawo kanõkpade! Kitonekĩ awāwā fotsa a kĩ bekena ne nõ kame a mo Sodom bekena foe

ni, kufe omato a buki edei mo nvia kii! **XXIV** Mabi mi ne onokoli kame ki ne Kadze Luwi a akui ni, Baguma aamo Sodom omato a konya eba no."

Miya Ne Yi Sekē Miyaaweya.

XXV Ne loko a na kame a, Yesu le ki, "Nda, tite mo ode Olate, manye no kole ki onye fotsa a ki bekoa bekola tuvoli banyine mo anyansafo a otsa babise. **XXVI** Oo! Nda, ade foe awo no ane a.

XXVII "Nda koa letsa nye letsa edo ne yi awe. Odima linyina Obi a mboente Olega a odi, ade odima leme linyina Olega a mboente Obi a odi, mo bikii Obi a awe ki yanye ye etsa a.

XXVIII "Miya ne yi sekē, mi flee a ki mikena adzuma, minone fotsa mo olome ki kipiia mi a, lokoa maakpa mi kaweya. **XXIX** Miboe yi somo akui otse a mite ne mi akui, mikole fotsa mitomena yi sekē, lokoa mina kaweya, kitoneki yi foletsada, ade ndola yi akui ne owole kame a. **XXX** Kitoneki yi somo akui otse a kalo lēlā osi, ade yi fotsa a ki maalola mi a adā faafaa a."

XII

Farisifo Via Yesu Foletsada Ne Kaweya Luwi a Akui.

I Ne loko a na kame a, Yesu natsa fughano koba kudi kame ne Kaweya Luwi akui. Kole kako ye fotsa bakolene a, foesu biveli fudi betse beba. **II** Ki Farisifo mo foe a, bibi Yesu ki, "Dā, no fotsa bakolene akena letsa a ki boe mbla takpa osi ki bekena ne Kaweya Luwi akui!"

III Ade Yesu kpa be mbuaye ki, "Mbōe mitakā tō letsa a ki Dawid kena ne loko a ki kole ko bemo

bati a kī bitomō ye a? ^{IV} Ewo ne Baguma kōla a kame ade bemō ye bati a benya abodoo a kī bekōa bebōa afōlie bekpa Baguma a, titō kī mbla tākpa osi kī benya ye malo. Basōfo odi bekpa osi kī benya abodoo a na. ^V Mbōeε mitākā ne Mose mbla ovoli a kame kī ne Kaweya luwi nye luwi akū ni, basōfo a kī basum ne Asōli Kōla kame a afum Kaweya Luwi mbla a, leme baákō be foe kōtō? ^{VI} Mabi mi kī letsa a kī lete kōya lēba Asōli Kōla a deī ne awī. ^{VII} Katsēle Kpalēwa a le kī, ‘Seme kale mawe, nné bayae afōlie.’ Nte kanu minu fōletsa kī kayō ni, kufe miláako bikī betáfum a kōtō, ^{VIII} kitonekī Otidziwa Obi a nye Kaweya Luwi a ɔlate.”

Yesu Tsa Onyole Odi Kī Ye Kōkpō Ku.

^{IX} Yesu dzakū ne awā enaa Yudafo katsenakō kadi, awā kī ^X onyole odi kī ye kōkpō ku leme na. Bati badi kī bewē kī babōε fōletsa ne Yesu akū na ne awā, foesū bivia ye kī, “Boe mbla kpa osi kī betsa fōsō ne Kaweya Luwi akū?”

^{XI} Yesu kpa be mbuaye kī, “Nte mi kame odi deī kuveli mōa mō kōka kuwo ne leke kame ne Kaweya Luwi akū a, eláado awe epi koe enye? ^{XII} Ade oti deī kōya ebē kuveli a! Foesū boe mbla kpa osi kī bekēna tuwī ne Kaweya Luwi akū.”

^{XIII} Adeke ebi onyole a kī ye kōkpō ku a kī, “Yo nō kōkpō.” Eyo kōkpō a ade kubuki kōna ɔsī nde kōyade a. ^{XIV} Ade Farisifo a dzakū benapi adzuni kī baako Yesu a.

ɔsumunε a Kī Baguma Pau a.

^{XV} Kī Yesu nu kī bisui ne ye akū a, edzakū ne lōpō a na kame, leme bati kōdabu baū tomō ye.

Ɛtsa basone a flee, ^{XVI} ade esi be mbla kī betabi bati kadima ne ye akū. ^{XVII} Ɛle fukī ayekī folets a kī Baguma le ɛtsāmena ye Onukpē Ōnyene Yesaya akū a aaya ne foe kame kī,

^{XVIII} “Ade yī osumune a kī mpau ne awī a.

Ɛnye oti kī mawe kale, ade yawo yī ane a.

Maakoa yī Hūhū nko ne ye akū,

lokōa ede letsā ne yī folets a kadze akū ekpa fude fude.

^{XIX} Ɛlāavele folets a, iye ebōa fowōla,

iye binu ye odo ne tōblōnu ane.

^{XX} Yaana owole bōee ekpa bikī belá kōbē a,

ade yaakena seme kale ekpa bikī belá kabumena a.

Yaadza pintii kēnaawo kī ɛfō kadze ne osi kpī akū anya akū,

^{XXI} ade bati flee aakōa ane bite ne ye akū a.”

Yesu Mō Hūhū Kpa Legā a.

^{XXII} Ke liti a, bati badi kpā oti odi kī hūhū kpa deī ne ye kame, kī enye onekune mō omumu bema Yesu. Yesu tsa oti a, epuli ɛle kōdzela emō fokō leme. ^{XXIII} Letsa a kī Yesu kēna a, kēna bati kōdabu a flee a saa, ade bivia kī, “Mbōee nné Dawid Obi a ne awī a?”

^{XXIV} Kī Farisifo nu fukī a, bele kī, “Yablomena hūhū kpa kitonekī hūhū kpa legā Beelzebul akpa ye kōbē kī ekēna foe.”

^{XXV} Yesu nyi letsa a kī bekakōna a, foesū ebi be kī, “Ōmaī odi nye odi kī ɛsē ye akū ne kutsu kutsu kame, mō tēdze deī ne ye kame ni, ɛlāadzi gēlēlē. Ade aye a nte omato iye kola kudi bati sē ne kutsu kutsu kame mō tēdze deī ne be kame ni, kaku omato a iye kola a aaku. ^{XXVI} Foesū

nte katsu moa kadi ne Abonsam legākanyakō ano mo kabebā ni, foatsa kī ye legākanyakō a sē kutsu kutsu kōkōe, ade kōayale a. ^{XXVII} Nte miale kī Beelzebul lekpa yī kōbē nneε mablōmena hūhū kpa a ni, owei lekpa bati a kī bitomō mi a kōbē benεε bablōmena hūhū kpa? Letsa a kī mi moawe bati a kī bitomō mi akena a, aako mi koto. ^{XXVIII} Oowo! Nné Beelzebul kōbē nneε, mbom Baguma Hūhū kōbē nneε mablōmena hūhū kpa, kī foatsa kī Baguma legākanya a ya ne mi akū kōkōe.

^{XXIX} “Odima lelāapuli ewo ne obelebe kola kame efila ye akū foatsa, mbōente enya loto esuli oti a edo ne towē kame fomō yaapuli epasa toto a kame efila ye foatsa.

^{XXX} “Odi nye odi kī edzé ne yī liti ni, eyidza ne yī akū, ade odi nye odi kī yaábumō yī boakpota ni, kayale yayale kawula. ^{XXXI} Ade foesū mabi mi kī baakōa tokpa nye tokpa mo fubusuotsa fudi nye fudi kī bati ale a bite be, lemε odi nye odi kī yaale fubusuotsa ne Hūhū Kpalēwa a kō akū ni, belāakōa bite ye. ^{XXXII} Odi nye odi kī yaale kodzela etia Otidziwa Obi a ni, baakōa bite ye, lemε odi nye odi kī yaale kodzela etia Hūhū Kpalēwa a ni, belāakōa bite ye finyaa iye ne loko a kī laya a kame.

Kutse Nye Kutse Mō Koe Babi Kī Kōawū.

^{XXXIII} “Fomō aana kutse libi wī ni, kenε kī ana kutse wī, ade nte odeī kutse kpa ni, kutse libi kpa aana. Babi a kī kutse awū a bakōa kanyi kutse a odu. ^{XXXIV} Mi bati ndε bōε babi! Nde míapuli milε foletsa wī kī minye tokpa

bakenanɛ? Kitonɛkĩ lɛtsa a kĩ liyi oti ɔwɔlɛ kame ni, ade foe anɛ nɛ ye onukpɛ̃ a. ^{XXXV} Oti wĩ anyɛ fɔtsa wĩ kanya katomena ye fɔtsa wĩ kakɔlakɔ̃, ade oti kpa lɛmɛ anyɛ fɔtsa kpa kanya katomena ye fɔtsa kpa kakɔlakɔ̃ a. ^{XXXVI} Mite mido kĩ nɛ Kadzɛ Luwi a akũ ni, odi nyɛ odi aanyɛ ye akũ onukpɛ̃ nɛ kalɛ pupulidza kadi nyɛ kadi kĩ ɛlɛ tɔ̃ a akũ. ^{XXXVII} Nɔ mɔawɛ onukpɛ̃ kame fɔlɛtsa baakɔa bɛdzɛmɔ nɔ bɛkpa nɔ ɔtɔbɛ ãyɛ bɛkɔ nɔ kɔtɔ.”

Mbla Batsanɛ Mɔ Farisifo Via Awāwā Fɔtsa Bitomena Yesu Sekɛ̃.

^{XXXVIII} Ade mbla batsanɛ mɔ Farisifo badi bi Yesu kĩ, “Fɔtsa ɔtsanɛ, boawɛ kĩ kena nsentseleni adi bɔdā.”

^{XXXIX} Yesu kpa be mbuayɛ kĩ, “Nviā babi kpa mɔ bati kĩ binyína Baguma! Miavia yĩ kĩ nkɛna awāwā fɔtsa midā? Oowo! Awāwā fɔtsa a kĩ baanyɛ bɛtsa mi nyɛ Baguma Onukpɛ̃ ɔnyɛnɛ Yona fude a. ^{XL} Nɛ ayekĩ Yona dzi fuwi ɛlɛlɛ lɛnyɛ mɔ suwa nɛ kafɔabi kpale lupu kame a, ade aye Otidziwa Obi a lɛmɛ aatɛ fuwi ɛlɛlɛ lɛnyɛ mɔ suwa nɛ tite kame a. ^{XLI} Nɛ Kadzɛ Luwi a akũ ni, Ninivefɔ aayidza mɔ mi bidzi bɛkɔ mi kɔtɔ, kitonɛkĩ bɛdani tɔwɔlɛ kame kĩ binu Baguma fɔlɛtsa a kĩ Yona lɛ a. Midā, litsedi dɛĩ nɛ awĩ kĩ lɛbɛ̃ Yona. ^{XLII} Nɛ Kadzɛ Luwi a akũ a, Seba Lɛgātsole aayidza ɛdza ɛkɔ mi kɔtɔ, kitonɛkĩ ɛtsā osi gɛlɛlɛ eto ye ɔmaĩ kame ɛyatse Lɛgā Salomo nyansā fɔtsa katsa, ade mite yĩ mido kĩ odi dɛĩ nɛ awĩ kĩ ɛbɛ̃ Salomo.

Hũhũ Kpa Kabuki Kamuniki Kaya.

XLIII “Nte hũhũ kpa né ne oti kame a, yanaatsã kamini ne foko wɛlɛwa kawɛ kadzikõ. Nte etána kadzikõ ni, XLIV yabi ye akũ kĩ, ‘Maamuniki nnaa yĩ kɔla kɔɛ a kame.’ Foesũ nte eyamɔ kĩ beyɔ koe kame belɔla koe kame yededeede a, XLV yanaa kanaakpã hũhũ kpa bebã evũkɔnɔ kĩ bideĩ ɔsĩ bebẽ ye kayamena. Bawo ne oti a kame kadzi ne awã, ade oti a kadzi kame abu kade kaba ayekĩ fona ne kayokayi a. Ade aye fɔaya fɔkpa nviã bati kpa kĩ a.”

Yesu Oma Mo Yesu Bawaɛnyole.

XLVI Kĩ Yesu kale kɔdzela mɔ bati a, oma mɔ bawaɛnyole yawo awã. Bedza ne kanya bewɛ kĩ bale kɔdzela mɔ ye. XLVII Foesũ bati a kame odi bi ye kĩ, “Dã, ama mɔ awaɛnyole amɛ dzẽ ne kanya bawɛ kĩ bale kɔdzela mɔ nɔ.”

XLVIII Yesu kpa be mbuayɛ kĩ, “Owei nyɛ mma? Bawei nyɛ nwaɛ amɛ?” XLIX Ade eyo awɛ etsa ye fɔtsa bakɔlɛnɛ a ɛlɛ kĩ, “Midã, ade mma mɔ nwaɛ amɛ ne awĩ a! L Odi nyɛ odi kĩ yakena ne Nda ne ode kawɛ akũ ni, ade ye nyɛ nwaɛnyole, mɔ nwaɛtsole mɔ mma a.”

XIII

Yesu Bɔa Legbã Ne Kamɔnɛ Odunɛ Akũ.

I Luwi mɔapɛ a, Yesu né ne toto kame, enadzi ne ɔwɔ lutubu baũ a abuĩ ɛkatsa fɔtsa. II Ayekĩ bati kɔdabu a kĩ kɔtsena ne ye akũ a tɛnɛ kapɔ sũ ni, ewo edzi ne ɔkɔlɔ kame ade kɔdabu a dza ne ɔwɔ abuĩ a.

III Etsa be fɔtsa pii ne fɔgbã kame ɛlɛ kĩ, “Luwi a onyole odi naasã kamɔnɛ. IV Kĩ ɛkasã babi a ne

koba kame a, badi to ne osi owẽ ade kowolabi yafila be bemena a. ^V Babi a badi to ne apibo akũ awã kĩ tite lepõne ne boe a ane. Babi a me moatse kitonekĩ tite a kame tãdzũ. ^{VI} Foesũ kĩ suwa yata a, sipila te teve ade tivio moatse a, kitonekĩ te tunu a tanaa kame dzununu. ^{VII} Babi a badi to ne fu tuwĩ kame ade kĩ beme bade a tuwĩ a bo ane temena be. ^{VIII} Leme babebã to ne tite wĩ akũ ade biwũ babi a, badi wũ babi oha, badi wũ babi aduesia, ade babebã leme wũ babi taale a.”
^{IX} Yesu wũna kĩ, “Oti a kĩ edeĩ soto ni, etse!”

Letsa Sũ Kĩ Yesu Kabõa Fõgbã a.

^X Ade fõtsa bakolene a ya ne Yesu sekẽ bivia ye kĩ, “Nde sũ abi bati a fõletsã ne fõgbã kame?”

^{XI} Yesu kpa mbuaye kĩ, “Mi kõ benye ode legãkanyakõ a fõletsã kolawa kame betsa mi, leme, betánye foe kame betsa be. ^{XII} Kitonekĩ oti a kĩ edeĩ fõtsa ni, baakpa ye fudi bibu lokõa fõpõ fubu, leme oti a kĩ elã letsama ni, baate foe kabii a kĩ edeĩ a malo ne ye awe. ^{XIII} Letsa sũ a kĩ male kodzela ne fõgbã kame mo be nye kĩ bamõ mo ane leme baámõ kayi osũ, batse leme baánu foe kayõ. ^{XIV} Foesũ Baguma Onukpẽ Onyene Yesaya fõletsã a kĩ ele eyi a ya ne foe kame kĩ,
 ‘Bati kĩ aanu bibuki binu leme beláanu foe kayõ.
 Ade baamõ bibuki bemó leme beláamõ biyi osũ.

^{XV} Kitonekĩ be adzuni adã yududu,
 ade be ato lãnu kanu wĩ a,
 ade bisua be ane a.
 Nte nné aye ni, be ane aamõ fõkõ,
 be ato aanu,
 be adzuni aanu fõletsã kayõ!

Ade baadani beya ne yĩ sekẽ,

lokɔa ntsa be fɔsɔ!’

XVI Lemɛ mi kɔ̃ Baguma hila mi! Mi anɛ amɔ ade mi atɔ lemɛ anu fɔkɔ a. **XVII** Mabi mi ne ɔnɔkɔali kame kĩ, Baguma onukpẽ banyɛnɛ mɔ bati kpĩ pii we mɔ ɔsĩ kĩ bamɔ letsa a kĩ miamɔ a, lemɛ betápuli bemó foe, ade bewɛ lemɛ kĩ banu letsa a kĩ mianu a lemɛ betánu foe.

Yesu Nye Legbã Ne Kamɔnɛ a Odunɛ Akũ a Kayɔ.

XVIII “Foesũ finyaa mitse ãnyɛ legbã ne kamɔnɛ odunɛ akũ a kayɔ minu. **XIX** Odi nye odi kĩ yanu ode legãkanyakɔ̃ fɔletsɔ lemɛ yaánu foe kayɔ a, la ndɛ babi a kĩ biwula ne osi ɔwẽ a. Oti Kpa a ayawãnɛ letsɔ a kĩ bidu ne ye kame a. **XX** Babi a kĩ betɔ ne apibɔ akũ a nye oti a kĩ nte esila enu fɔletsɔ a, yate foe mɔatse mɔ kawɔle, **XXI** lemɛ fɔáwo kanaa ye ɔwɔle kame dzununu, ade fɔábuna owi ne ye kame a. Foesũ nte ɔhau ãye bati liti katomena ya ne fɔletsɔ kĩ sũ ni, yamuniki liti mɔatse. **XXII** Babi a kĩ betɔ ne fu tuwĩ kame a nye oti a kĩ yanu fɔletsɔ a, lemɛ katinya kame ɔhau mɔ akũ kana fɔtsɔ liti katomena anya fɔletsɔ a akũ, foesũ fɔáwũ babi. **XXIII** Ade babi a kĩ betɔ ne tite wĩ akũ a nye oti a kĩ yanu fɔletsɔ a, kanu foe kayɔ lemɛ. Bawũ babi, badi ɔha, badi aduesia babebã lemɛ be taale.”

Yesu Bɔa Legbã Ne Tuwĩ Wuluwulu Akũ.

XXIV Yesu bɔa be legbã bebã kĩ, “Ode legãkanyakɔ̃ a la ndɛ oti odi kĩ esã kamɔnɛ babi wĩ ne ye kɔba kame. **XXV** Ne lenye mɔa lidi, kĩ odi nye odi wa tida a, ye okesĩnɛ nasã tuwĩ wuluwulu

ne kamone a kame edzakū. ^{XXVI} Kī kamone a bo ane kido kaye awe a, tuwī a leme né tedza ne ke kame.

^{XXVII} “Oti a basumune ya ne ye sekē bibi ye kī, ‘Boe ɔlate, nné funitsā wī odu ne kɔba a kame, mo ndia tuwī kpa to teyame ne ke kame?’

^{XXVIII} “ɔlate a kpa mbuaye kī, ‘Okesīne odi lekēna fukīna.’

“Adeke bivia ye kī, ‘Awe kī bɔnaabɔle tuwī a ne ke kame?’

^{XXIX} “Ebi be kī, ‘Oowo! Kitonekī nte minaabɔle tuwī a ni, miabɔle kamone a kadi mo te. ^{XXX} Mifō kamone a mo tuwī a flee fɔdza fubo ane kēnaawo lɔkɔ a kī baanena kamone a. Ade lɔkɔ a na maabi kamone banenane a kī benya lɔtɔ bebɔle tuwī a bisui te fudzu fudzu lɔkɔa bipila te, ke liti bekpɔta kamone a bifila bēnaako ne yī oli kame.’”

Yesu Bɔa Legbā Ne Kutse Libi Kabii Akū.

^{XXXI} Yesu bɔa be legbā bebā kī, “Ode legākanyakō a la nde kutse libi kabii kī oti odi nadu ne ye kɔba kame. ^{XXXII} Lenye kutse libi kabii flee ne kutse babi kame, leme nte libo ane ni, kɔapɔ lububu kaba futse flee, ade kɔvɔlabi ayakēna fɔtsɔe ne koe tenane kame a.”

Yesu Bɔa Legbā Ne Oyila Fɔtsa Akū.

^{XXXIII} Yesu buki ebɔa be legbā bebā kī, “Ode legākanyakō a la nde oyila fɔtsa kī otsole odi pɔtɔ edo ne mawe fɔwɔda kakɔna elale kame kenawo kī mawe a flee vuya.”

Ayekī Yesu Kena Ye Fɔgbā Akū Adzuma.

^{XXXIV} Yesu bi bati kodabu a fɔletsa kī flee ne fɔgbā kame, ade yaále fɔletsa fudima nte nné ne

fɔgbã kame. **XXXV** Ekena fukĩ kĩ Baguma onukpẽ onyene fɔlets a foya ne foe kame kĩ,
 “Maale kɔdzela ne fɔgbã kame,
 ade maanye fɔtsa a kĩ bekɔa bekɔla kito ane
 katinya kayɔkayi a ntsa a.”

Yesu Nye Legbã Ne Tuwĩ Wuluwulu Akũ a Kayɔ.

XXXVI Kĩ Yesu nye bati kɔdabu a osi a, eya ne kɔla kame ade ye fɔtsa bakɔlene a ya ne ye sekẽ beyavia ye kĩ, “Nye legbã a kĩ ɔbɔa ne tuwĩ wuluwulu ne kamɔne kame a kayɔ katsa boe.”

XXXVII Yesu kpa mbuaye kĩ, “Oti a kĩ edu fudutsa wĩ a nye Otidziwa Obi a. **XXXVIII** Kɔba a nye katinya kame, fudutsa wĩ a nye bikĩ benye ode legãkanyakɔ a bade, ade tuwĩ a lemɛ nye bikĩ benye Okesĩne a bade a. **XXXIX** Okesĩne a kĩ esã tuwĩ a nye Abonsam. Fudutsa kakkɔta a nye katinya kame kawũna lɔkɔ, ade fudutsa bakpɔtane a nye ode fɔtɔ banyane a.

XL “Nde ayekĩ bakpɔta tuwĩ kapila te a, ade aye fɔana ne katinya kawũna lɔkɔ a. **XLI** Otidziwa Obi a aado ye ode fɔtɔ banyane beyaakpɔta be a kĩ befɔ bati kena tɔkpa mɔ be a kĩ bekɛna tɔkpa a flee benemena ne Baguma legã kanyakɔ a kame. **XLII** Baata be bido ne fi luwotu kame, ade awã baabe beba adɔ a. **XLIII** Baguma bade a kɔ akũ aakpale nde suwa aye ne be ɔlega legãkanyakɔ a kame. Oti a kĩ edeĩ sɔtɔ ni, etse!

Yesu Bɔa Legbã Ne Akũ Kana Fɔtsa Kɔlawa Akũ.

XLIV “Ode legã kanyakɔ a la nde akũ kana fɔtsa fudi kĩ bekɔa bekɔla ne kɔba kame. Oti odi nake

foe, εdani εκολα foe. Εmó kawολε paa, foesũ enano letsa nye letsa kĩ edeĩ a emuniki enaya koba a.”

Yesu Bɔa Legbã Ne Litsabi Kĩ Latε Kɔya Akũ.

^{XLV} Yesu buki ελε kĩ, “Ode legākanyakō a la nde kɔyaato onyane odi kĩ etsẽ yawε fulitsa babi wĩ.

^{XLVI} Kĩ enatselamo lidi kĩ lideĩ kɔya paa a, enano fotsa a kĩ edeĩ a flee εκɔa εya fulitsa libi a.

Yesu Bɔa Legbã Ne Asawu Kĩ Beta Akũ.

^{XLVII} “Ode legākanyakō a buki lεla nde asau kĩ beta bido ne mpo kame benye kɔfoabi ahɔlo ahɔlo pii. ^{XLVIII} Kĩ asau a yi mɔ kɔfoabi a, bevele ye beyamena ne mpo abuĩ, bidzi besa kɔfoabi a kame. Bekɔa kɔfoabi wĩ a biko ne fowɔda kame ade betale kɔkpa a biwula a. ^{XLIX} Ade aye fɔana ne katinya kawũna lɔko a. Ode foto banyane a aayasa bati kpa benye ne bati wĩ kame, ^L ade baata be bido ne fi luwotu kame, awã kĩ baabe beba adɔ a.”

Yesu Tsa Fɔtsa Ne Ɔnɔkɔali Fɔletsa Vɔẽ Mɔ Fɔkɔε Akũ.

^{LI} Yesu via be kĩ, “Minu fɔletsa kĩ flee kayo?”

Bituno kĩ, “Oo.”

^{LII} Foesũ ebi be kĩ, “Fukĩ atsa kĩ mbla ɔtsane odi nye odi kĩ εdani ekena fotsa okolene ne ode legākanyakō a akũ la nde ɔtolate odi kĩ yanye fotsa vɔẽ mɔ fɔkɔε kanya katomena ye fotsa kakolakō.”

Bisĩ Yesu Ne Nazaret.

^{LIII} Kĩ Yesu bɔa fɔgbã kĩ eyua a, edzakũ ne awã, ^{LIV} enaa ye mɔawe ɔmato kame, enatsa fotsa ne be katsenakō a. Bati a kĩ binu ye fotsa katsa a

kɛna saa, ade bivia akũ kī, “Ndia εκολε kadikanyi kīi etomɛna? Ndia awāwā fotsa a lɛmɛ to? ^{LV} Nnɛ ye nyɛ titse fotsa ɔmɛnɛ obi a mbɔɛɛ? Nnɛ ɔma nyɛ Maria, ade nnɛ bawāɛnyole nyɛ Yakobo, Yosef, Simon mɔ Yuda a? ^{LVI} Nnɛ bawāɛtsole lɛmɛ deī nɛ boe kamɛ nɛ awī a? Ndia etomɛna fotsa kīi bamɛ flee?” ^{LVII} Ade ɛdani oti kī ye akũ ado be kalokpa a.

Yesu bi be kī, “Baguma onukpɛ ɔnyɛnɛ deī obu nɛ kako nyɛ kako mbɔɛntɛ nɛ ye mɔawɛ ɔmatɔ mɔ ye kola bati kamɛ mɔ ɛlá obu.”

^{LVIII} Ayekī betátɛ bido sũ ni, Yesu tákɛna awāwā fotsa pii nɛ awā.

XIV

Yohanes Mui Ɔwolane a Wuda.

^I Nɛ lokɔ a na kamɛ a, Herodes, Galilea tite akũ ɔnyanɛ a, nu Yesu nkā. ^{II} Ebi ye banokɔɛ a kī, “Yohanes Mui Ɔwolane a liyidza eto kanokpa edzi nkpā, ade foesũ edeī kobɛ kīi ɛnɛɛ yakɛna awāwā fotsa a.”

^{III} Herodes nya lotɔ ɛfɔ bipi Yohanes bisui ye bɛkɔa bido nɛ kola. Ɛkɛna fukī nɛ Herodia, ɔwāɛ Filipino ɔtsɔ sũ. ^{IV} Letsa a kī leya nyɛ kī Yohanes Mui Ɔwolane a bi Herodes kī, “Mose mbla a tákpa osi kī akɔā Herodia.” ^V Foletsa kīi sũ Herodes wɛ kī yako Yohanes, lɛmɛ evila Yudafɔ a kitonɛkī babu ye ndɛ Baguma onukpɛ ɔnyɛnɛ aye.

^{VI} Nɛ luwi a kī Herodes anya ye lɛmawi a, Herodia obitsole yato nɛ bati a flee anɛ. Ye kuto a lɛ Herodes kadā paa, ^{VII} foesũ ɛlɔ fubo ɛkpa

oyitsõ a kī, “Maakpa nɔ letsa nye letsa kī aavia yī!”

VIII Oyitsõ a ɔma fõ ebi Herodes kī, “Kɔa Yohanes Mui Ɔwɔlanɛ a lolɔ kate nɛ tsensi akū kakpa yī finyaakī!” IX Kale a wo legã a kalɔɛ, lemɛ nɛ fubo a kī ɛlo nɛ obu bati a kī ɛvɛ a anɛ sū ni, ɛkpa osi kī bɛkɛna nɛ oyitsõ a kawɛ akū. X Foesū ɛfõ benatsua Yohanes lolɔ nɛ kola a kamɛ. XI Bite oti lolɔ a nɛ tsensi akū bɛyamɛna, ade bɛkɔa bɛkpa oyitsõ a, ade ye malo ɛkɔa de ɛma ɔma a. XII Yohanes fɔtsa bakɔlɛnɛ a nabɔɛ ɔnɔkpa a benabila, ade benabɔa Yesu amandis a.

Yesu Kpa Bati Mpim Elo Funitsã Benya.

XIII Kī Yesu nu Yohanes fɔletsã kī a, ewo nɛ ɔkɔlo kamɛ ɛdzaku ɛnaa kakɔ kadi kī bati lelãa. Lemɛ bati nu ye nkã, foesū bɛtsã abɔa bito be temato kamɛ bitomɔ ye liti. XIV Yesu né nɛ ɔkɔlo a kamɛ, ade kī ɛmɔ bati kɔdabu a, be akū kɔ ye kɔnya, ade ɛtsa be kamɛ basɔnɛ a.

XV Ke olobe a, ye fɔtsã bakɔlɛnɛ a fuã ye, ade bibi ye kī, “Kade dɔ kiyua ade awī táfuã ɔmato kamɛ a, foesū fɔnɛ bati a awɛ bɛdzakū benaa tukula kamɛ bɛnaaya funitsã benya.”

XVI Yesu kpa be mbuayɛ kī, “Fɔtásī kī badzakū. Mi mɔawɛ a mikpa be litsedi benya!”

XVII Fɔtsã bakɔlɛnɛ a kpa mbuayɛ kī, “Abodoo fɔbɔ elo mɔ kɔfɔabi nviã pɛ bɔnɛɛ nɛ awī.”

XVIII Ade Yesu bi be kī, “Mikɔa foe mima yī nɛ awī.” XIX ɛfõ bati a flee dzi nɛ tuwī akū nɛ awã, ade ɛbɔɛ abodoo elo mɔ kɔfɔabi nviã a, ɛdã ode, ehila foe. Ke liti a, ɛyɛɛ abodoo a, ɛkɔa ɛkpa ye fɔtsã bakɔlɛnɛ a, ade be bɛsẽ bɛkpa bati a. XX Odi

nye odi nya ewĩ. Ke liti a, ye fotsa bakolene a fila fuwuliwa a kĩ fute a biyula tətsetse ewua-nviã. **XXI** Bati a kĩ benya funitsã a lidede aawo banyole mpim elo, kĩ betákã batsole mo babisẽ bido ne be kame.

Yesu Tsã Mui Anɛ.

XXII Yesu fõ ye fotsa bakolene a wo ne okolo kame kĩ binyina benaa owɔ lutubu baũ seke sitide a, lokoa enye bati a osi. **XXIII** Kĩ enye bati a osi eyua a, ede enaa otɔ akũ ye odi kĩ yanaaboa mpaɛ. Kĩ kade do a Yesu odi lite ne awã. **XXIV** Ne lokɔ a na kame a, okolo a naa mo lugo flee ade mpo akũ owe kaboa ye kato katɛmena, kitonekĩ owe mo osĩ kavũ katselamo ye.

XXV Odenyinawi tɔdɔũ elale kame a, Yesu tsẽ ne mui ane yaya ne ye fotsa bakolene a sekẽ. **XXVI** Kĩ bemó ye etsẽ ne mui ane a, fute boe be bele kĩ, “Ɔnokpa yanɛ!” ade beboa fowola kooba mo libe a.

XXVII Deedimɔape Yesu lemɔ be kodzela kĩ, “Mi owɔle eka edzi. Yĩ manɛ. Mitavila!”

XXVIII Ade Petro le kĩ, “Boe Ɔlate, nte nuwĩ no ane ni, fõ ntsã mui a ane ãya ne no sekẽ.”

XXIX Yesu bi ye kĩ, “Ya!”

Ade Petro né ne okolo a kame etsã mui ane yanaa Yesu sekẽ a. **XXX** Lemɛ kĩ emó ayekĩ owe lamɔ kavũ kooba a, libe wo ye ade edo kayela awe ne mui a kame a. Adeke eboa fowola kĩ, “Boe Ɔlate, te yĩ!”

XXXI Deedimɔape Yesu yo awe epi ye ne kɔkpo, ele kĩ, “No katekado adã kabii. Nde sũ otɛ atsindze?”

XXXII Kĩ be nviã a biwo ne okolo a kame a owe a fõ kavũ. **XXXIII** Fotsa bakolene ne okolo a kame

a ke aduli bisum Yesu, ade beɛ kī, “Nuwīnuwī Baguma Obi ane!”

Yesu Tsa Basone Ne Genezaret.

XXXIV Kī binyina ɔwɔ lutubu baũ a, beyaduma ne Genezaret tite akũ. XXXV Awā bati mó Yesu biyi ɔsũ, foesũ benakpã basone ne kayite a flee beyamena ne ye sekẽ. XXXVI Bike ye aduli kī efɔ basone a beta ye atadie ato odi pɛ. Ade bati a kī beta ye a flee akũ de ɔsĩ a.

XV

Mi Bawanyɔ Fɔtsa Katsa.

I Ade Farisifo mo mbla batsane badi to Yerusalem beya ne Yesu sekẽ bivia ye kī, II “Nde sũ no fɔtsa bakolene a lakena ne fɔtsa katsa a kī boe bawanyɔ kɔa biyi boe a akũ? Baávole awe ne osi wĩ akũ fɔmo banya!”

III Yesu leme via be kī, “Nde sũ mi malo miafum Baguma mbla mo miakena ne miawe fɔtsa katsa a akũ? IV Mbɔɛ Baguma tále kī, ‘Bu aga mo ama,’ ebuki ele kī, ‘Odi nye odi kī edumu ɔlega iye ɔma ni, kene kī beko ye?’ V Leme mi kɔ miatsa fɔtsa kī nte odi deĩ fɔtsa fudi kī yaapuli ekɔa ebumo ɔlega iye ɔma, mo ele kī, ‘Nkɔa foe nkpa Baguma’ ni, VI fɔtábuki fusĩ kī oti a abu ɔlega iye ɔma. Ne osi kī akũ mitábu Baguma mbla ayekĩ míatomɔ mi bawanyɔ fɔtsa katsa a sũ. VII Mi ane kame keke fɔtsa bakenane! Fɔlets a kī Baguma Onukpẽ ɔnyene Yesaya le ne mi akũ a ya ne foe kame nuwĩ. VIII Baguma le kī, ‘Omaĩ kī asum yĩ mo onukpẽ kame fɔlets menemene,

leme be towole deĩ mo lugo ne yĩ sekẽ.

IX Pupulidza basum yī,
kitonekī batidziwa mbla batsa
ne Baguma mbla a kadokō! ”

Fōtsa a Kī Fōado Oti Efī.

X Ade Yesu ve bati kōdabu a ekpota ne ye sekē ebi be kī, “Mitse lokoa minu fōletsā kayo! XI Nné letsa kī lawo ne oti onukpē kame a ado ye efī, mbom letsa a kī lane kato ye onukpē kame a, ado ye efī.”

XII Adeke ye fōtsa bakolene a ya ne ye sekē beyabi ye kī, “Onyina kī fōletsā a kī ole a wo Farisifo a kaloe?”

XIII Yesu kpa be mbuaye kī, “Kutse nye kutse kī nné Nda ne ode lidu ni, baabole koe bimuni. XIV Foesū mifone be awe. Benye banekune kī bakpā banekune, ade nte onekune akpā onekune ni, be nviā a flee baato ne leke kame.”

XV Petro bi ye kī, “Nye legbā kī kayo katsa boe.”

XVI Yesu bi be kī, “Mbōe mi malo bati kī baānu fōletsā kayo mibuki miane? XVII Mitānu foe kayo kī letsā nye letsā kī lawo ne oti onukpē kame a kanaa ye lupu kame, ke liti yanaanye ne koboa kayo kame? XVIII Leme fōtsa a kī fōane kato oti onukpē a, ato ye owole kame ade foe ado oti efī a. XIX Kitonekī oti owole kame adzuni kpa, oti kaka, adōpaa kaboa, bayitsō mō bapopo kawa katē, kaye, fōvā adansie kadi, mō bati buī kanye ane kato. XX Ade fōtsa kī bame ado oti efī a, leme kī okoa awe kī otāvole anya nde ayekī Farisifo atsa a, lādo oti efī.”

Otsole Odi Katekado.

XXI Yesu dzakū ne awã enaa kayite a kī kifuã Tiro mo Sidon temato kpale a kame. **XXII** Awã naa, Kanan otsole odi kī edzi ne kayite a na ya ne Yesu sekē mo fowola kī, “Boe ɔlate, Dawid Obi, mo yī konya! Yī obitsole lamena lubo kamo mo osi mo osi ne hūhū kpa awe kame!”

XXIII Leme Yesu tále kadima. Ye fotsa bakolene a nake ye aduli bele kī, “Blomena ye edzakū, kitonékí etomo boe mo fowola!”

XXIV Yesu kpa mbuaye kī, “Baveli a kī beyela ne Israelfo kame odi sekē bido yī.”

XXV Leme otsole a yato ne Yesu aboa kame ele kī, “Boe ɔlate, bumo yī!”

XXVI Yesu kpa ye mbuaye kī, “Fonéne kī bata babisē funitsā biko bakpete.”

XXVII Otsole a kpa mbuaye kī, “Boe ɔlate, fudei lomo kō, leme bakpete a malo anya funitsā wuliwa a kī futo be ɔlate opunu akū foto a.”

XXVIII Kī Yesu nu foe a, ekpa ye mbuaye kī, “O, boe oma, no katekado pone! Letsa a kī awe a leya lekpa no.” Ne loko a na kame pɛpɛɛɛ a obitsole a akū de osi.

Yesu Tsa Bati Beblebee.

XXIX Yesu dzakū ne awã etsã Galilea ɔwo lutubu baū a abuī. Ede enaa katobii kadi akū ade ekena akū edzi a. **XXX** Ade bati kodabu baū kpā abafā ame, banekune, bamumu, mo basone bebā pii beyamena ne ye sekē a. Bekoa be biko ne ye ane kame ade etsa be a. **XXXI** Kī bati kodabu a mó kī bamumu kale kodzela, abafā ame kayidza katsā, bikī bene lekpe akū dani fuyo, banekune kamo foko a, fokena be wāwā, ade bimu Israel Baguma a.

Yesu Kpa Bati Mpim Ena Funitsã Benya.

XXXII Yesu ve ye fotsa bakolene a beya ne ye sekẽ ade ebi be kĩ, “Bati kĩ akũ ako yĩ konya, kitonekĩ bena ne yĩ sekẽ fuwi elale flee, leme belá letsama kĩ banya. Ntawe kĩ manye be osi benaa mo kole, ane lenaasinya be ne osi.”

XXXIII Ye fotsa bakolene a via ye kĩ, “Ne ndia bóana funitsã ne kosa kame ne awĩ kĩ fóato bati kodabu kĩ odu benya?”

XXXIV Yesu via be kĩ, “Abodoo eni mine?”

Bibi ye kĩ, “Abodoo evũkono mo kofabi wuluwulu sukuloo deĩ.”

XXXV Ade Yesu fõ bati kodabu a kena akũ bidzi ne tite a. XXXVI Ade kĩ ebwe abodoo evũkono mo kofabi a enye Baguma kole a, ebulibuli ye mo koe ekwa ekpa ye fotsa bakolene a, ade be malo besẽ bekpa bati a. XXXVII Be flee benya biwĩ. Kĩ fotsa bakolene a fila fuwuliwa a kĩ fute a, fuyi tetsitse evũkono. XXXVIII Bati a kĩ benya funitsã a nye banyole mpim ena, kĩ betákã batsole mo babisẽ bibu. XXXIX Ke liti a, Yesu nye bati a osi ade edzi okolo ena Magadan amantam kame a.

XVI

Farisifo Mo Zadukifo Via Yesu Kĩ Ekena Awãwã Fotsa Etsa Be.

^I Farisifo mo Zadukifo badi kĩ beya ne Yesu sekẽ a we kĩ baso ye bedã, foesũ bivia ye kĩ ekena awãwã fotsa kĩ futo ode etsa be.

^{II} Leme Yesu kpa mbuaye kĩ, “Nte suwa anaa katomukõ a, miale kĩ, ‘Foko aakpale kunya, kitonekĩ odetó kame yole.’ ^{III} Ade ayea onone leme miale kĩ, ‘Nviã oni aako kitonekĩ odetó

kame yoole foko leme kena tũũ.' Miayi ane kadã odetó kame kapuli kale ayekĩ foko aana, leme miápuli minyi nviã nsentseleni a kĩ yaaya a kayo. ^{IV} Nviã babi kpa kĩ binyína Baguma! Miavia yĩ awãwã fotsa? Oowo! Beláakpa mi awãwã fotsa fudima keba Yona fude a."

Ade ke edzakũ efone be a.

Yesu De Ye Fotsa Bakolene a Ne Farisifo Mo Zadukifo Fuyilatsa a Akũ.

^V Kĩ fotsa bakolene a nyina owó lutubu baũ benaa seke sitide a, beyate ane kĩ betábóe abodoo adima bele. ^{VI} Yesu bi be kĩ, "Mite ane, midã kadã wĩ ne Farisifo mo Zadukifo fuyilatsa a akũ."

^{VII} Ade bido kale ne be neene kame kĩ, "Ayekĩ botábóe abodoo adima bole sũ mo ele foe."

^{VIII} Yesu nyi letsa a kĩ bekalé a foesũ evia be kĩ, "Nde sũ mialomona ne abodoo katabóe akũ? Mi katekado adã kabii! ^{IX} Foesũ mitámó miyi osũ tó? Mitáte ane kĩ nsẽ abodoo elo nkpa bati mpim elo benya a? Tetsitse eni kame mifila fuwuliwa a miyula? ^X Litsa miale ne abodoo evũkonó a kĩ nsẽ nkpa banyole mpim ena benya a akũ? Tetsitse eni kame miko fukĩ fute a? ^{XI} Nde sũ mo miámó kĩ nné abodoo foletsa nlamena mi kabi? Midã kadã wĩ ne Farisifo mo Zadukifo fuyilatsa akũ!" ^{XII} Ade finyaa fomó fotsa bakolene a yanu foe kayo kĩ nné fuyilatsa a kĩ bakóo kado ne mawe kame a akũ yade be, mbom kade ede be ne Farisifo mo Zadukifo fotsa katsa a akũ.

Petro Nye Yesu Etsa Nde Oti a Kĩ Bepau a.

XIII Kĩ Yesu wo kako a kĩ kifuã Kaisarea Filipi omato a, evia ye fotsa bakolene a kĩ, “Owei bati ale kĩ Otidziwa Obi a ane?”

XIV Bekpa mbuaye kĩ, “Badi ale kĩ Yohanes Mui Owolanɛ a anɛ. Babebã ale kĩ Eliya, ade badi lemɛ ale kĩ Yeremia iye Baguma onukpɛ banyene a kame omɔa anɛ.”

XV Yesu via be kĩ, “Adeke mi malo, owei miale kĩ ye manɛ?”

XVI Ade Simon Petro kpa mbuaye kĩ, “No nye Kristo a, Baguma kĩ edzi nkpã a Obi.”

XVII Yesu bi ye kĩ, “Simon, Yona obi, Baguma hila no, kitonekĩ nné otidziwa odima letsa no foe, mbom Nda ne ode a lenye foe etsa no. XVIII Ne foesũ, Petro, mabi no ne onokɔali kame kĩ no dĩ kayo nye de mo osĩ a, ade de kĩĩ akũ maayi yĩ asoli a. Wuda malo lelãapuli enya ye akũ da.

XIX Maakɔa ode legãkanyakɔ a tesafi ndo no ne awe. Letsa nye letsa kĩ osĩ ne tite akũ ni, baasĩ foe ne ode, ade letsa nye letsa kĩ okpa osi ne tite akũ ni, baakpa de osi ne ode.” XX Adeke Yesu si ye fotsa bakolene a mbla kĩ betabi odima kĩ ye nye Kristo a.

Yesu Le Kodzela Ne Ye Lubokamɔ Mo Wuda Akũ.

XXI Kito luwi a, Yesu do ye fotsa bakolene a kabi awe pefee kĩ, “Kene kĩ nnaa Yerusalem, nnaamɔ lubo paa ne banokɔẽ, basofonokɔẽ mo mbla batsane a awe. Baako yĩ, lemɛ ne luwi lelalɛde akũ ni, Baguma aadzela yĩ ndzi nkpã.”

XXII Petro kpã Yesu benaadza ne owɛ, ade edo ye anɛ kakã awe ele kĩ, “Boe Olate, Baguma esua foe osi. Fukĩnaa lelãaya ne no akũ da!”

XXIII Yesu dani etselamɔ Petro ebi ye kī, “Sataana, dzakū ne yī akū! Ɔnye letsa a kī lasua yī osi kitonekī nɔ kakɔna táto Baguma sekē mbom futo otidziwa sekē.”

XXIV Ade Yesu bi ye fɔtsa bakɔlene a kī, “Nte odi we kī yatomɔ yī ni, etatsela ye mɔawe akū lɔkɔa ebɔe ye asendua etomɔ yī. XXV Kitonekī odi nye odi kī yawe kī yapili ye nkpā ni, yaayela ye, lemɛ odi nye odi kī eyela ye nkpā ne yī sū ni, yaana ye. XXVI Nte katinya kame fɔtsa flee dani odi fude mɔ eyela ye nkpā ni, litsa nfasɔ yaana? Mbɔɛɛ litsedi deī kī oti aakɔa evemena mɔ ye nkpā? XXVII Kitonekī Otidziwa Obi a aaya ne Ɔlega kukūkpale kame mɔ ye ode fɔto banyane, lɔkɔa yaase odi nye odi kɔto ne ayekī edzi nkpā a onukpē. XXVIII Mabi mi pipiipi kī badi deī ne mi kame ne awī kī beláaku kenaawo kī bemó Otidziwa Obi a kī eya nde Legā aye.”

XVII

Yesu Kutitse Dani.

I Ne fuwi evū liti a, Yesu kpā Petro, Yakobo mɔ ɔwaē Yohanes bide benaa ɔto geī odi kalete, awā kī be odi benadzi. II Kī bekadā ye a, Yesu akū dani ne be anɛ kame. Ye anɛ kame kata nde suwa aye, ade ye tetadie lemɛ kena fitaa nde ɔhaī aye a. III Adeke fɔtsa bakɔlene elale a mó Mose mɔ Eliya kī bekale kodzela mɔ Yesu a.

IV Foesū Petro dzela odo ebi Yesu kī, “Boe Ɔlate, fɔnɛne paa kī budeī ne awī! Nte awe ni, maabɔa fɔpe elale ne awī, nɔ lide lɔmɔa, Mose lide lɔmɔa lɔkɔa Eliya lemɛ lide lɔmɔa.”

^V Kĩ ekale kodzela a, luflututu fitaa ka letsa be, ade odo né eto de kame ele kĩ, “Ade yĩ Obi kĩ maátuno ye kale a, yawo yĩ ane. Mitse ye!”

^{VI} Kĩ fotsa bakolene a nu odo a libe wo be paa, foesũ beka betsa ane ne tite. ^{VII} Yesu ya ne be sekẽ ekwa awe eta be, ade ebi be kĩ, “Miyidza! Mitavila!” ^{VIII} Foesũ bedzela ane ne ode, leme betámɔ odima ne awã keba Yesu.

^{IX} Kĩ beka oto a baya a, Yesu si be mbla kĩ, “Mitabi odima letsa a kĩ benye betsa mi ne awĩ a, kenaawo kĩ bedzela Otidziwa Obi a bitomena kanokpa.”

^X Adeke fotsa bakolene a via Yesu kĩ, “Nde sũ mbla batsane a ale kĩ kene kĩ Eliya enya loto eya?”

^{XI} Yesu kpa be mbuaye kĩ, “Ɔnokwali foane kĩ Eliya enya loto eya, eyaalola letsa nye letsa eyi.

^{XII} Mabi mi kĩ Eliya ya kokwe leme bati támɔ ye biyi osũ, foesũ bekena letsa a kĩ bawe ne ye akũ. Ade ayea baakena Otidziwa Obi a leme awoda a.”

^{XIII} Ade awã mɔ fotsa bakolene a nu foe kayo kĩ Yohanes Mui Ɔwolane a akũ kodzela ekale.

Yesu Tsa Kanyolebi Kadi Kĩ Hũhũ Kpa Na Ne Ke Kame.

^{XIV} Kĩ Yesu mɔ ye fotsa bakolene a muniki beya ne bati kodabu a sekẽ a, onyole odi ya ne Yesu sekẽ eyake aduli ne ye ane, ^{XV} ade ele kĩ, “Boe Ɔlate, mɔ yĩ obinyole konya! Odetó foso deĩ ne ye akũ foamona ye lubo mɔ osĩ mɔ osĩ. Fofõ yawe kato ne fi iye mui kame. ^{XVI} Nkpã ye mma no fotsa bakolene a leme betápuli betsa ye.”

^{XVII} Yesu kpa mbuaye kĩ, “O mi nviã babi kpa kĩ milá katekado. Mbɔee maana ne mi sekẽ

daa? Loko loodabe kame maana owole nvele mi nnaawo? Mikpa kanyolebi a mima yi ne awi!”

XXIII Adeke Yesu wuni ne huhu kpa a aku mo ene ne kanyolebi a kame, ade kena aku osi ne loko mape a na kame a.

XXIX Ke liti a, ye fotsa bakolene a ya ne ye sekẽ ne kabela kame bivia ye ki, “Nde su boe ko botapuli boblomena huhu kpa a bonemena?”

XX Yesu kpa be mbuaye ki, “Kitoneki mi katekado lepone. Mabi mi ne onokoli kame ki nte midei katekado nde kutse libi kabii ni, miapuli mibi oto ki ki, ‘Bole ne awi kanaa aki,’ ade yaabole a. Letsama lelala ki milaapuli mikena. **XXI** Leme huhu kpa ki odu lelanae mbente fotsẽ mpaebõ mo, onukpẽ kasui kame.”

Yesu Buki Ele Kodzela Ne Ye Wuda Akũ.

XXII Ki fotsa bakolene a flee yakpota ne Galilea a, Yesu bi be ki, “Baako Otidziwa Obi a bido ne bati awe. **XXIII** Baako ye, leme ne luwi lelalede aku a, Baguma aadzela ye edzi nkpã.”

Ne foesu fotsa bakolene a wo oblo paa.

Yesu Mo Ye Fotsa Bakolene a Se Asoli Kola Ogole.

XXIV Ki Yesu mo ye fotsa bakolene a wo Kaper-naum a, biki bate Asoli Kola ogole a ya ne Petro sekẽ bivia ye ki, “Mi fotsa otsane a ase Asoli Kola ogole?”

XXV Petro kpa mbuaye ki, “Oo, yase.”

Ki Petro wo enaa toto kame a, Yesu nya loto evia ye ki, “Simon, litsa nye no adzuni? Baade ase dute iye togole kakpa katinya kame fogã? Kade a bati ase mbeẽ ki banõõ?”

XXVI Petro kpa mbuaye kī, “Banonɔ̃ a.”

Ade Yesu kpa mbuaye kī, “Kekɔ̃ fɔatsa kī kade bati a weya. XXVII Leme boáwe kī boafum bati kīi, foesũ naata dalewa ne ɔwo lutubu baũ a kame. Kafɔabi katɔnyade a kī aanye a ni, dae ke onukpẽ, aamɔ sika ovoe kī saato bomɔ no Asoli Kɔla ɔgɔle kase. Kɔa se kanaase be bomɔ no togole.”

XVIII

Owei Nye Oti a Kī Ebẽ Flee?

I Ne lɔkɔ a na kame a, fɔtsa bakɔlene a ya ne Yesu sekẽ, bivia ye kī, “Owei bẽ flee ne ode legākanyakɔ̃ a kame?”

II Ne foesũ Yesu ve kabisẽẽ kadi eyadzela ne be kayite, III ade ebi be kī, “Mabi mi ne ɔnɔkɔali kame kī nte mitádani mikena nde babisẽ aye ni, miláapuli miwo ne ode legākanyakɔ̃ a kame da.

IV Oti kī ebẽ flee ne ode legākanyakɔ̃ a nye oti a kī edola ye akũ, edani ekena nde obisẽ kīi aye.

V “Odi nye odi kī yaakena seme kale ekpa obisẽ kīi odu ne yī dī akũ ni, yī ekena ekpa.

Takpã Odima Odo Ne Tɔkpa Kame.

VI “Nte oti odi aakpã babisẽ kīi, kī bete yī bido a kame ɔmɔa edo ne tɔkpa kame ni, fɔnene fɔkpa ye fɔbẽ kī bekɔa kɔwɔle kpale bevela ne ye somɔ beta bido ne mpo kame emɔa mui eku.

VII “Bɔbɔe makpa katinya kame bati ne fɔtsa a kī foe avele oti kado ne tɔkpa kame a akũ. Kene kī sohuiẽ kīi odu eya kokooko, leme bɔbɔe makpa oti a kī ye akũ fɔatsã fɔya!

VIII “Foesũ nte no awe ãye no koboa aafõ okena tokpa ni, tsua koe kata kamuni! Fõnenẽ fokpa no kã aana nkpã mo awe moa ãye koboa moa, keba kã aana akpo mo aboa lemẽ beta no bido ne fi a kã foádĩ da a kame. IX Ade ayea nte no linebi aafõ okena tokpa ni, bole de kanye kata kamuni! Fõnenẽ fobẽ kã aana linebi moa odzi nkpã, keba kã aana banebi nviã lemẽ beta no bido ne fi a kã foádĩ da a kame a.

Yesu Bõa Legbã Ne Kuveli Kĩ Koyela Akũ.

X “Midã kadã wĩ, ayekĩ miláasupa babisẽ kã kame odima. Mabi mi ne onokõali kame kã be ode foto banyane ne ode adza ne Nda ane kame luwi daa, XI kitonekĩ Otidziwa Obi a ya kã yaate bikĩ beyela a bena nkpã.

XII “Mikõna fukĩ akũ midã. Nte odi deĩ baveli oha mo komõa yela ne be kame a, yaáfõne be aduekrõũ-evedi a ne katõbii akũ bekade, enaatsã ewe komõa a kã koyela a? XIII Nte emó koe ni, yamo kawõle paa ne komõa a akũ kaba be aduekrõũ evedi a kã betáyela a. XIV Ade ayea mi Olega ne ode a láwe kã babisẽ kã kame odima eyela a.

Kena Omõa Mõ Awaẽ Kĩ Efum Nõ.

XV “Nte awaẽ fum no ni, naa ye sekẽ kanaanye ye mfumsu katsa ye, lemẽ kena foe ne kabela kame ne mimõ ye odi kayite. Nte enu foe kayõ ekpa no ni, odani õte awaẽ. XVI Lemẽ nte etãnu ye akũ kayõ ni, kpã oti moa ãye bati nviã kabumõ no akũ minaa ye sekẽ, ayekĩ foletsã a flee aane fowa ne adansifo ane. XVII Lemẽ nte esĩ etátse be malo ni, kõa foletsã a kama asõli a, ade nte

ɛtátse asɔli bati a lɛmɛ ni, bu ye ndɛ ɔmamuni
ĩye ɔgɔlɛ ɔtɛnɛ aye.

Yesu Kpa Fɔtsa Bakɔlɛnɛ a Otumi.

XVIII “Foesũ mabi mi flee kĩ letsa nyɛ letsa kĩ
mitákpa osi nɛ tite akũ ni, beláakpa de osi nɛ
ode, ade letsa nyɛ letsa kĩ míakpa osi nɛ tite akũ
ni, baakpa de osi nɛ ode.

XIX “Mabi mi mbu kĩ nte mi kame bati nviã
mikɛna ɔmɔa nɛ litsedi akũ nɛ tite akũ, mɔ
mibɔa mpɛ mivia de ni, Nda nɛ ode a aakɛna
foe ɛkpa mi. **XX** Kitonɛkĩ awã kĩ bati nviã ĩye be
ɛlale tsɛna nɛ yĩ dĩ akũ ni, ndeĩ nɛ be kayite.”

*Legbã Nɛ Ɔsumunɛ Kĩ Ɖtámɔ Ɖkɔba Kɔnya a
Akũ.*

XXI Ke liti a, Petro yavia Yesu kĩ, “Boe Ɖlate, nte
nwaẽ dzɛmena tɔkpa kakɛna nɛ yĩ akũ ni, titi eni
kɛnɛ kĩ nkɔa nte ye? Titi evũkɔnɔ mbɔɛɛ?”

XXII Yesu kpa ye mbuaye kĩ, “Oowo, nné titi
evũkɔnɔ, mbom aduesũ titi evũkɔnɔ.

XXIII “Kitonɛkĩ ode legãkanyakɔ a la ndɛ legã
lidi kĩ lɛwɛ kĩ lakɛna akunta mɔ de basumunɛ.
XXIV Kĩ esila eyi kayɔ a, bɛkpã be kame ɔmɔa
kĩ edzimɔ ye sika mpim mpim kɔtɔ bɛyamɛna.
XXV Ɖsumunɛ a lɛlá sika kĩ yaase kɔtɔ a, foesũ
legã a kpa kɔbɛ kĩ bɛnɔ ye mɔawɛ a ndɛ ɔsate,
ye ɔtsɔ mɔ babi, mɔ letsa nyɛ letsa kĩ edeĩ a bɛkɔa
bise kɔtɔ a.

XXVI “Ɖsumunɛ a ke aduli nɛ legã a anɛ eke ye
aduli kĩ, ‘Na ɔwɔlɛ bɔɛɛ kakpa yĩ. Maase nɔ se
flee.’ **XXVII** Ye akũ kɔ legã a kɔnya foesũ ɛfɔnɛ ye
awɛ ade ɛkɔa kɔtɔ a kĩ edzimɛna a flee ete ye a.

XXVIII “Ade kī ὄsumunε kīī né edzakū a, enamo ὀkoba ὄsumunε bebā odi kī edzimō ye sika ovoe ὀha mōa kōto. Epi ὀkoba a ne somō emenana ye odomena kōba, ebi ye kī, ‘Se yī kōto a kī odzimō yī a!’

XXIX “Ḫkoba a tō ne ye abōa kame eke ye aduli ele kī, ‘Na ὀwōle bōεε kakpa yī! Maase nō kōto a!’

XXX “Leme etátunō, mbom efō bido ye ne kōla kenaawo lōkō a kī yaase kōto a. XXXI Kī basumunε bebā a mō letsa a kī lēya a, fuwo be kalōε ade benabi legā a letsa a kī lēya a flee a.

XXXII “Foesū legā a ve ὄsumunε a eya ne ye sekē ade ebi ye kī, ‘Nō ὄsumunε kpa! Nkōa kōto beblebee a kī odzimō yī a nte nō ne kī oke yī aduli sū. XXXIII Ketáfeta kī amō nō ὀkoba ὄsumunε kōnya ndε ayekī mmó nō kōnya a?’ XXXIV Ade legā a na kalōkpa mō ὀsī efō benado ye ne kōla kī bemōna ye lubo kenaawo kī ese kōto a flee.”

XXXV Yesu wūna kī, “Ade aye Nda ne ode a aakena mi kame odi nye odi kī etákōa ete ὀwaē etomena ye ὀwōle kame a.”

XIX

Yesu Tsa Fōtsa Ne Kōtsō Mō Kōnyō Kasī Akū.

^I Kī Yesu le fōletsa kīī eyua a, edzakū ne Galilea enaa Yudea amantam ne Yordan ὀwo liti a. ^{II} Bati kōdabu pii tomō ye benaa ade etsa be fōtsa ne awā a.

^{III} Farisifo a badi ya ne ye sekē, ade bewε kī basō ye bedā, foesū bivia ye kī, “Boe mbla kpa onyole osi kī esī ὀtsō ne kalε nye kalε kī yawε a akū?”

^{IV} Yesu kpa be mbuaye kī, “Mitákā ne Katsɛɛ Kpalɛwa a kame kī ne kayɔkayi a, otsole mo onyole Ɔboane bɔa? ^V Ade Baguma le kī, ‘Ne fukī sū onyole aafɔne ɔlega mo ɔma eyi ekɔa akū emena mo ɔtsɔ, lokɔa be nviā a baakena oti moa.’ ^{VI} Foesū bibuki benyé bati nviā mbom bekena oti moa. Ne foesū otidziwa etasē letsa a kī Baguma boomu a kame.”

^{VII} Ade Farisifo a via ye kī, “Mo nde sū Mose kpa osi kī onyole ekpa ye ɔtsɔ kasī ovoli lokɔa efɔne ye awe?”

^{VIII} Yesu kpa be mbuaye kī, “Ade mi atɔ osī sū mo Mose kpa mi osi kī misī mi batsɔ a, lemɛ fɔtána lomɔ ne kayɔkayi a. ^{IX} Lemɛ finyaa mabi mi kī nte onyole odi sī ɔtsɔ kī nné kane ene ye liti sū, mo enakɔā otsole bebā ni, ebɔa adɔpaa.”

^X Ye fɔtsa bakɔlene a bi ye kī, “Nte aye onyole mo otsole kayite fɔletsa la kɔ ni, fɔnéne kī bekɔā ɔtsɔ.”

^{XI} Yesu kpa be mbuaye kī, “Nné odi nye odi aapuli enu fɔletsa kī kayɔ, mbɔente bikī Baguma kpa be foe a. ^{XII} Kitonekī kayɔkanye futefute deī kī foe sū banyole leláapuli bekɔā batsɔ. Badi bema be basae, babebā bati lekɛna be basae, ade badi lemɛ lákɔā batsɔ ne ode legākanyakɔ a sū. Oti a kī yaapuli ete fɔtsa katsa kī ni, ete foe.”

Yesu Hila Kubisēē.

^{XIII} Bati badi kpā babisē bema Yesu kī ete awe ne be akū, ebɔa mpaɛ ekpa be, lemɛ ye fɔtsa bakɔlene a wūni ne be akū.

^{XIV} Lemɛ Yesu le kī, “Mifɔ babisē a beya ne yī sekē, mitasua be osi, kitonekī ade bikī bame odu

lá ode legākanyakō a.” ^{XV} Adeke Yesu te awe ne be akū ehila be, ade edzakū ne awā a.

Opopo Osikani a.

^{XVI} Luwi a onyole odi ya ne Yesu sekē evia ye kī, “Fōtsa Ōtsane, letsa wī loodabe kene kī nkena mō maana daa nkpā a?”

^{XVII} Yesu kpa ye mbuaye kī, “Nde sū avia yī kale ne fōtsa wī kakena akū? Oti mōape nye owī. Leme nte awe kī awo ne nkpā kame kō ni, kena ne tebla a akū.”

^{XVIII} Oti a via ye kī, “Tebla tewodabe?”

Yesu kpa ye mbuaye kī, “Takō oti, tabōa adōpaa, taye, tadi adansie klumu, ^{XIX} bu aga mō ama, kawē nō okōba kale nde ayekī awe nō akū kale a.”

^{XX} Ade opopo a kpa mbuaye kī, “Nkena ne tebla kī flee akū. Litsa libuki lisī kī nkena?”

^{XXI} Yesu bi ye kī, “Nte awe kī akpōla ni, naa kanaanō nō akū fōtsa flee, kakōa sika a kate ahiāfō, lokōa aana akū kana fōtsa ne ode. Ke liti muniki kayaatomō yī.”

^{XXII} Kī opopo a nu fōletsā kī a, edzakū mō ayōlohō, kitonekī edeī akū fōtsa beblebee.

^{XXIII} Adeke Yesu bi ye fōtsa bakolene a kī, “Mabi mi ne onokōali kame kī fōana osī paa fōkpa osikani kī yaawo ne ode legākanyakō a kame.

^{XXIV} Mbuki mabi mi kī fōadā bōee fōkpa opōnko mō kane mō lōpō kī yaatsā onobō ōke kame ené keba kī osikani aawo ne Baguma legākanyakō a kame.”

^{XXV} Kī fōtsa bakolene a nu kale kī a, akū dzuli be, ade bivia kī, “Kekō oweī aapuli ena kate?”

XXVI Yesu dā be kenanaana ade ελε κῆ, “Otidziwa lēláapuli ekēna fukĩ, lēme Baguma kō apuli kakēna letsa nye letsa.”

XXVII Ade Petro dzela odo ελε κῆ, “Dā κῆ bōfōne boe fōtsa flee awε bōya butomō nō, litsa kou aanya boe fude?”

XXVIII Yesu bi be κῆ, “Mabi mi ne onokwali kame κῆ nte Otidziwa Obi a kēna akū edzi ne ye legākpo kpalewa a akū ne katinya vōē a kame ni, mi bati ewua-nviā a κῆ mitomō yī a lēme miadzi ne fōgākpo ewua-nviā akū midzemō Israel futete ewua-nviā a. XXIX Ade odi nye odi κῆ εfōne fola, bawaēnyole, iye bawaētsōle, balēga iye bama iye babi, iye fōba biyi ne yī sū ni, Baguma aakpa ye foe titi oha mō nkpā κῆ εla kawūna a. XXX Lēme bati pii κῆ benye batōnyade finyaa a, aakēna liti bade, ade liti bade a aakēna batōnyade a.”

XX

Adzuma Bakēnane Badi Ne Waī Kōba Kame Akū Fōletsā.

I “Ode legākanyakō a la nde okuani odi κῆ eyidza mō onone tutuutu enabōe apaafō badi κῆ beyaakēna adzuma bekpa ye ne ye waī kōba kame. II Bemō apaafō a benya kōya, etunō κῆ yaase be sika ovoe sōmōa sōmōa κῆ fōnye luwi mōa kōtōkase, ade edo be ne ye waī kōba a kame a.

III “Kῆ onone tōdōū evedi bōa a, onyole a buki ene enaa kōya ade enamō banyole badi κῆ bedzē, κῆ belá adzuma kenawa adima. IV Foesū ebi be κῆ, ‘Mi malo minaakēna adzuma ne yī waī kōba

kame, maase mi koto kī kefeta a.’ V Ade benaa koba a.

“Ebuki ene ne tōdōū ewua-nviã mō olobe tōdōū elale kame enakena nde fōtōnyade a. VI Kī tōdōū elo anaa kabōakō a, enaa kōya enamō banyole bebã kī bedzē pupulidza. Evia be kī, ‘Nde sū midzē ne awī luwī a flee kī miákēna letsama?’

VII “Bekpa ye mbuaye kī, ‘Odima táboe boe kī bōkena adzuma bōkpa ye.’

“Foesū ebi be kī, ‘Nte aye ni, mi malo mi-naakena adzuma ne yī koba a kame.’

VIII “Kī olobe wo oto a, koba olate a bi ye adzuma akū odāmenane a kī, ‘Ve adzuma bakēnane a kase be koto, kayi kayo katomena bikī beya nkae a akū kanaawūna ne batōnyade a akū.’

IX “Bikī biyi adzuma kayo ne olobe tōdōū elo kame a kame odi nye odi te sika owoe sōmōa sōmōa. X Foesū kī bati batōnyade a yaate be kotokase a, bekona kī baase be beba lomō, lemē be malo betē sika owoe sōmōa sōmōa. XI Kī betē be sika a biyua a, bena kalōkpa bekakena hūhūhūhū ne olate a akū. XII Ade bele kī, ‘Bati a kī obōe nkae a kēna adzuma dōūhuile mōape, ade boe kō bōdza ne suwa kpa kame luwī a flee bōkena adzuma a, lemē ose boe flee koto tsetse!’

XIII “Koba olate a kpa be kame omōa mbuaye kī, ‘Okoba, dā ntāsisi nō. Nné sika owoe sōmōa akū bōnya kōya? XIV Kōa nō kotokase kanaa kōla. Yī lewe kī mase bati nkae kī koto nde ayekī nse nō a. XV Ndeī osi kī makēna yī sika akū adzuma nde ayekī mawe. Mbōee ayekī nkēna seme kale a sū ane abeēle nō?’ ”

XVI Ade Yesu wūna kī, “Foesū bati a kī bekpa liti a, aadani batonyade, ade bikī benyaa loto a aadani batide a.”

Yesu Le Kɔdzela Lelalɛde Ne Ye Wuda Akū.

XVII Kī Yesu yeɛ yanaa Yerusalem a, ɛve ye fɔtsa bakolene ewua-nviã a ne ɔwɛ, **XVIII** ade ebi be kī, “Mitse letsa a kī male a! Bɔanaa Yerusalem, awã kī baakɔa Otidziwa Obi a bido ne basɔfɔnɔkɔɛ, mo mbla batsane a awe. Baako ye koto bekpa wuda, **XX** bekɔa ye bido bikī benyé Yudafo a ne awe kī bidi ye nsekuo. Baabo ye, ke liti baabɔa ye ne asendua akū, leme ne luwi lelalɛde akū a, Baguma aadzela ye edzi nkpã.”

Obima Odi Yakɔa Ye Kawe Eyi Ne Yesu Anɛ.

XX Adeke Zebedeo ɔtsɔ kpã ye babinyole nviã ɛyamena ne Yesu sekɛ, ɛyake aduli ne ye anɛ kame evia kabumena a.

XXI Yesu via ye kī, “Litsa awe?”

Otsole a kpa mbuaye kī, “Kpa yī bohe kī aafɔ yī babinyole nviã kī kame ɔmoa lidzi ne no somona, oyade a leme lidzi ne no seba, ne no legākanyakɔ a.”

XXII Yesu kpa mbuaye kī, “Minyina letsa a kī de milamena kavia a. Míapuli mimɔa lubo kamo kɔɔpu a kī maamɔa a?”

Bekpa mbuaye kī, “Oo, bóapuli.”

XXIII Ade Yesu bi be kī, “Ɔnɔkɔali fɔane kī míapuli mimɔa foe, leme nlá osi kī manye oti a kī ye aadzi ne yī somona iye yī seba. Fudzikɔ a na nye bikī Nda mane foe eyi a fude.”

XXIV Kī fɔtsa bakolene nkaɛ ewua a nu folets a kī a, bena kalokpa ne bawaɛ nviã a akū.

XXV Foesū Yesu ve be flee ekpota ade ebi be kī,

“Minyina kī fōgā a kī fōanya amamufō akū a deī kōbē nē be akū, ade be banokōē lemē deī otumi baū a nē be akū a. ^{XXVI} Lemē ketānē kī fōana lomō nē mi kamē. Ntē mi kamē odi awē kī yanya ɔnokōē ni, kenē kī enya mi ɔsumunē. ^{XXVII} Ade ayea ntē mi kamē odi awē kī yanya ɔtonyade ni, kenē kī enya mi ɔsumunē, ^{XXVIII} ndē Otidziwa Obi a kī etāya kī bisum ye, mbom kī yaasum ekōa ye nkpā ekpa enye bati pii.”

Yesu Tsa Banekunē Nviā.

^{XXIX} Kī Yesu mō ye fōtsa bakōlenē a né bito Yeriko ɔmatō a kamē banaa ni, bati kōdabu baū tomō be. ^{XXX} Banekunē nviā kī bidzi nē osi ɔwē nu kī Yesu yaatē, foesū biyi fōwōla kabōa kayō kī, “Lēgā Dawid Obi, mō boe kōnya!”

^{XXXI} Bati kōdabu a wūni nē be akū kī befō fōwōla kabōa, lemē bebōa fōwōla a kōōba bebā bēlē kī, “Boe ɔlate, Dawid Obi, mō boe kōnya ni!”

^{XXXII} Yesu fō edza evē be kī bēya nē ye sekē. Evia be kī, “Litsa miawē kī nkēna nkpa mi?”

^{XXXIII} Bēkpa ye mbuayē kī, “ɔnokōē, fō boe anē ebinya.”

^{XXXIV} Be akū kō Yesu kōnya, ade ekōa awē etā be banēbi a. Deedimōapē be anē binya bēmō fōkō ade bitomō ye a.

XXI

Yesu Wo Nē Yerusalem ɔmatō Kamē Ndē Lēgā Aye.

^I Kī Yesu mō ye fōtsa bakōlenē a fuā Yerusalem, biwo Betfage kī ewaa nē Kugua Futse ɔtō akū a, edo ye fōtsa bakōlenē nviā kī benya lotō. ^{II} Ebi

be kī, “Minaa akula a kī ewaa ne mi loto a kame. Nte misila miwo awã a, míamɔ kī bido aflimu mɔ obi ɔwẽ bedzela. Miwũnya be mikpã mima yĩ. ^{III} Nte odi via mi kadi ni, mile kī, ‘Boe ɔlate a sī be,’ lokɔa yaafɔne be awe ekpa mi letaleta.”

^{IV} Bekena fukĩ ayekĩ folets a kī Baguma onukpẽ ɔnyene le eyi a aaya ne foe kame kī,

^V “Bi Zion ɔmato a kī,

‘Dã kī nɔ legã aya ne nɔ sekẽ!

Edɔla ye akũ, edzi ne aflimu mɔ obi akũ
yaya.’ ”

^{VI} Ade fɔtsa bakolene a naa benakena nde ayekĩ Yesu bi be kī bekena a. ^{VII} Bekpã aflimu mɔ obi a beyamena, bekɔa be tilima betetete ne be akũ ade Yesu de edzi a. ^{VIII} Bati kɔdabu a dzele be tetadie wulaa biko ne osi a akũ, ade badi lemɛ pãã pãã futse tenane biko ne osi a akũ a. ^{IX} Bati kɔdabu a kī benya Yesu loto mɔ bikĩ bitomɔ ye ne liti a kabɔa fɔwɔla kī,

“Mitu osee ne Legã Dawid Obinyole a akũ!

Baguma ehila oti a kī yaya ne boe ɔlate dī akũ a!
Mimu Baguma ne ode!”

^X Kī Yesu wo ne Yerusalem ɔmato a kame a, ɔmato a flee bɔa obũ, ade bati via kī, “Owei ne awĩ a?”

^{XI} Bati kɔdabu a kpa mbuaye kī, “Ade Baguma Onukpẽ ɔnyene Yesu kī eto Nazaret ne Galilea tite akũ a.”

Yesu Blɔmena Fɔtsa Banɔne Ne Asɔli Kɔla Kame.

^{XII} Ade Yesu nawo ne Asɔli Kɔla a kame, eblɔmena bati a kī bekanɔ fɔtsa mɔ bikĩ bekaya fɔtsa a ne awã enemena. Edu bikĩ babẽ sika a tupunu mɔ bikĩ banɔ mbloduma a fukpo ewula,

XIII ade ebi be kī, “Betselē ne Katselē Kpalēwa a kame kī Baguma le kī, ‘Baave Yī Asoli Kola a kī mpaē kabōakō’ lemē mi kō mikōa koe mikēna bayekpane kabelakō!”

XIV Ade banekune mō abafā ame ya ne ye sekē ne Asoli Kola a kame ade etsa be fōso a. XV Kī basōfōnokōē mō mbla batsane a mō awāwā fōtsa a kī ekēna a, mō ayekī babisē kabōa fōwōla ne Asoli Kola a kame kī, “Mitu osee ne Legā Dawid Obinyole a akū!” a ni, bēna kalōkpa paa.

XVI Foesū bivia Yesu ne kalōkpa kame kī, “Anu letsa a kī belamēna kalē a?”

Ade Yesu kpa be mbuaye kī, “Oo, manu. Mbōee mitākā tō ne Katselē Kpalēwa a kame kī, ‘Babisē mō bakōkōa onukpē kame kamu kī kekpolā ane kato’ a?”

XVII Ke liti a, Yesu dzakū efōne be, ene ne omato a kame ade enaa Betania enawa ne awā a.

Yesu Dumu Kutse Kudi Kī Kotāwū Babi.

XVIII Ne kadekanyina onone a, kī emuniki yanaa omato a kame a, kolē kō ye. XIX Emō kutse kī kōawū babi kī kōdzē ne osi oowē ade ebēle enaa koe kayō a, lemē etāmō babi badima ne koe akū kēba tōta nene. Foesū ebi kutse a kī, “Olāabuki owū babi dadaada.” Deedimōape kutse a tōta ve.

XX Kī ye fōtsa bakōlene a mō fukī a, fōkēna be wāwā, foesū bivia ye kī, “Nde fōya mō kutse a tōta ve mōatse lomō?”

XXI Ade Yesu kpa be mbuaye kī, “Mabi mi pipiipi kī nte mite mido, mō mitāte atsindze ni, miapuli mikēna letsa a kī nkēna kutse kī. Nné fukī odi malo, miapuli mibi oto kī kī, ‘Bōle kanaato ne mpo kame,’ ade yaabolē a. XXII Nte

mideĩ katekado ni, letsa nye letsa kĩ míavia ne mpaebɔ kame ni, míana foe.”

Bati Via Yesu Awã Kĩ Etomena Ye Otumi.

XXIII Kĩ Yesu muniki eya ne Asɔli Kɔla kame ekatsa fɔtsa a, basɔfɔnɔkɔẽ mɔ ɔmaĩ banɔkɔẽ ya ne ye sekẽ bivia ye kĩ, “Otumi ɔdabe ɔnɛɛ akena fɔtsa kĩ bame? Owei lekpa nɔ osi a?”

XXIV Yesu kpa be mbuaye kĩ, “Maavia mi kale mɔape ade nte mikpa yĩ ke mbuaye ni, maabi mi otumi a kĩ nɛɛ nkɔa makena fɔtsa kĩ. XXV Owei sekẽ Yohanes te otumi etomena mɔ ewɔla bati mui? Baguma sekẽ ete ye etomena mbɔɛɛ kĩ batidziwa sekẽ?”

Ade bido foe kame kasa awe ne be kame kĩ, “Litsa bóale? Nte bóle kĩ, ‘Eto Baguma sekẽ’ ni, yaavia boe kĩ, ‘Mɔ nde sũ mitáte Yohanes mido?’ XXVI Ade nte bóle kĩ, ‘Eto bati sekẽ’ ni, bɔavila letsa a kĩ bati a aakena, kitonɛkĩ be flee betɛ bido kĩ Yohanes nye Baguma onukpẽ ɔnyɛɛ.”

XXVII Foesũ bekpa Yesu mbuaye kĩ, “Bunyína.”

Ade Yesu lemɛ bi be kĩ, “Kekɔ yĩ malo nláabi mi awã kĩ ntomena otumi nɛɛ makena fɔtsa kĩ.”

Yesu Bɔa Legbã Ne Babinyole Nviã Badi Akũ.

XXVIII “Nde mikɔna ne kale kĩ akũ? Onyole odi deĩ babinyole nviã. Enaa ɔnɔkɔẽde a sekẽ ebi ye kĩ, ‘Yĩ obi, naa yĩ waĩ kɔba kame nviã kanaakena adzuma kakpa yĩ.’

XXIX “Ye obi a kpa mbuaye kĩ, ‘Nláanaa,’ lemɛ ke liti a, fuwo ye kalɔɛ ade enaa kɔba a.

XXX “Ɖlega a naa obi ɔyade a sekẽ ebi ye kale mɔape a. Ekpa mbuaye kĩ, ‘Awoo, papa maanaa,’ lemɛ etánaa.

XXXI “Bati nviã kīĩ kame ɔɔdabe lekɛna ne ɔlega a kawɛ akū?”

Bekpa mbuayɛ kī, “Ɖɔkɔẽde a.”

Ade Yesu bi be kī, “Mabi mi ne ɔnɔkɔali kame kī tɔgɔle batɛnɛ mɔ adɔpaafɔ nya mi lɔtɔ benaa ne Baguma legākanyakɔ a kame. XXXII Kitonɛkī kī Yohanes Mui Ɖwolane a ya kī yatsa mi osi wī a kī míatsã midzi nkɔpã a, mitáte ye mido. Mbom tɔgɔle batɛnɛ mɔ adɔpaafɔ kɔ tɛ ye bido. Ade titɔ kī mimó fukīĩ malo ni, ke liti a mitádani adzuni mite ye mido.”

*Yesu Bɔa Legbã Ne Waĩ Kɔba Akū
Badāmenane a Akū.*

XXXIII Yesu bi be kī, “Mitse legbã bebã lidi lemɛ. Kɔba ɔnɛnɛ odi né waĩ kɔba, ade edzi kɔbã emini koe a. Enyɛ lekɛ ekpa waĩ mui a kakã kako, ade eke kola geĩ kī oti aana ne awã ekadã kɔba a akū. Ke liti ekɔa kɔba a edo ne waĩ kɔba banɛnɛ awɛ edzakū enaa osi akū. XXXIV Kī kutse babi a kana a wo ɔtɔ a, edo ye basumunɛ ne waĩ kɔba banɛnɛ a sekẽ kī benaate ye kanyakɔ bema ye.

XXXV “Kɔba akū badāmenane a pi ye basumunɛ a, bibo ɔmɔa, bekɔ ɔbebã ade betale ɔlalede a boe a. XXXVI Ke liti a, kɔba ɔlate a buki edo basumunɛ bebã kī bepɔnɛ bebẽ batɔnyade a, lemɛ kɔba akū badāmenane a kɛna be letsa mɔape a. XXXVII Ne foe kawūna kame a, edo ye obi ne be sekẽ, elɛ kī, ‘Mate kado kī baanyɔã yī obi.’

XXXVIII “Lemɛ kī kɔba akū badāmenane a mó obi a, bibi akū kī, ‘Ade fɔtsa ɔnyane a ne awī a. Miya bɔkɔ ye, ye adzapadiɛ a edani boe ade.’ XXXIX Foesū bipi ye bevelɛ benɛmena ne kɔba a kame, ade bekɔ ye a.”

XL Yesu via kī, “Finyaa, nte waĩ koba ɔlate a ya ni, litsa yaakena koba akū badāmenane kī a?”

XLI Bekpa ye mbuaye kī, “Ne ɔnokɔali kame ni, yaawɔla bati kpa a na, lokɔa ekɔa koba a edo ne koba akū badāmenane bebā awe, bikī baakɔa ye kanyakō bema ye ne fudutsa kakpota lokɔ kame pɛpɛpɛ.”

XLII Ade Yesu bi be kī, “Mitākā tō letsa a kī Katsɛle Kpalewa a le a?”

‘De a kī fɔla bakene sī a,
ade de ledani kola akū de titiliwu a.
Boe ɔlate a lekɛna fukī.
Fɔkɛna boe wāwā!’ ”

XLIII Yesu le ebu kī, “Foesū mabi mi kī, baate Baguma legākanyakō a ne mi awe bekɔa bekpa kade a kī kaawū babi wī a. **XLIV** Odi nye odi kī yaane eto ne de kī akū ni, yaaveli gblegblegble, lemɛ owula kī ye akū laaato ni, laabubuli ye kpetekpetekpete.”

XLV Kī basɔfɔnokōɛ mo Farisifo a nu Yesu fɔgbā kī a, bemó kī be akū fɔletsa ekale, **XLVI** foesū bewɛ kī bapi ye. Lemɛ bivila bati kodabu a, kitonekī bati a bu Yesu ndɛ Baguma onukpɛ ɔnyɛne aye.

XXII

Yesu Bɔa Legbā Ne Obolitsō Opunu Kate Akū.

I Yesu buki ele kodzela mo be ne fɔgbā kame kī,
II “Baguma legākanyakō a la ndɛ fukī. Legā lidi te opunu ekpa obinyole ne ye obolitsō kapi luwi akū. **III** Lemɛ kī edo ye basumune kī benaave bati a kī ekpa kanyi a kī beya ne kanyakō, bisī kaya.

IV “Foesũ ebuki edo basumune bebã ne bikĩ beve a sekẽ mo ɔledo kĩ, ‘Beto yĩ funitsã a biyua, beko yĩ banantsuenyole mo banantsue babi doliwa, bemanɛ letsa nye letsa biyua. Miya ne obolitsõ luwi kanyakõ a!’

V “Leme bati a kĩ beve a tákpeti ye kave a, mbom bedzakũ benaa be tudzuma kame. Oti moa naa ye koba, obebã naa koyaato, VI bati nkaɛ a pili basumune a bekena be tenya ade beko be a. VII Legã a na kalokpa paa, foesũ edo ye sodzafõ benako awudifo a, bipila be ɔmato a leme.

VIII “Ke liti a, eve ye basumune ebi be kĩ, ‘Biyua obolitsõ kapi funitsã a kato, leme bati a kĩ nve a táfeta obu a kĩ nkpa be a. IX Foesũ finyaa minaa ɔmato a toblonu kpale akũ minaa ve odi nye odi kĩ míamo eya ne kanyakõ a.’ X Ade basumune a ne benaa toblonu akũ benakpã odi nye odi kĩ bemó, bati wĩ mo bati kpa flee, ade obolitsõ kapikõ a yi mo bati a.

XI “Kĩ legã a nawo kĩ yadã bikĩ beve a, emó onyole odi kĩ étádo obolitsõ kapi atadie ne awã. XII Ade legã a via ye kĩ, ‘Okoba, nde okena owo ne awĩ kĩ otádo obolitsõ kapi atadie?’ Leme onyole a to lumumu.

XIII “Foesũ legã a bi ye basumune a kĩ, ‘Misui ye akpo mo aboa mita ye mimuni ne kanya ne otũ kame, awã kĩ yaabe eba adõ.’ ”

XIV Yesu wũna kĩ, “Bati beblebee have, leme be sukuloome bapau.”

Bivia Yesu Kale Ne Abãã Ogole Kase Akũ.

XV Farisifo a nanaa adzina ayekĩ banaĩ Yesu betsãmena foletsa kavia kame, bena ye ne ye

ƙoɗzɛla ƙalɛ ƙamɛ. ^{XVI} Foesũ bido be ƙɔtsa bakɔlenɛ mo bikĩ bitomɔ Herodes a ƙamɛ badi ne ye sekẽ beɛ ƙĩ, “Ƙɔtsa Ƙtsanɛ, bunyina ƙĩ odeĩ ɔnɔkɔali, atsa Baguma osi a ne ɔnɔkɔali ƙamɛ, ade ɔtsɛla odima akũ, kitoneƙĩ aádã oti anɛ. ^{XVII} Foesũ bi boe no adzuni. Boe mbla kpa osi ƙĩ bute tɔgɔle bɔkpa Roma Legãnɔkɔẽ, mbɔɛɛ ƙĩ ɛtãkpa osi?”

^{XVIII} Lɛmɛ Yesu mó be adzuni kpa a ƙĩ beɓɔɛ a eyi ɔsũ, foesũ ebi be ƙĩ, “Mi anɛ ƙamɛ ƙɛƙɛ ƙɔtsa bakenanɛ! Nde sũ miasɔ yĩ midã? ^{XIX} Mikɔa sika a ƙĩ miakɔa kase ɔgɔle a mitsa yĩ.”

Bekɔa sika a bɛma ye, ^{XX} ade evia be ƙĩ, “Owei lolɔ kata mo dĩ teĩ ne se akũ?”

^{XXI} Bekpa ye mbuayɛ ƙĩ, “Roma Legãnɔkɔẽ fude ƙɔanɛ.”

Foesũ Yesu bi be ƙĩ, “Ƙɛkɔ mikɔa letsa a ƙĩ lenye Roma Legãnɔkɔẽ lide mikpa ye, ade mikɔa letsa a ƙĩ lenye Baguma lide lɛmɛ mikpa Baguma.”

^{XXII} Ƙĩ binu ƙɔletsa ƙĩ a ƙɔƙɛna be saa, ade beƙɔnɛ ye awe bedzakũ a.

Bivia Yesu Ƙɔletsa Ne Banɔkpa Kayidza Kadzi Nƙpã Akũ.

^{XXIII} Luwi mɔape a, Zadukifo ƙĩ bale ƙĩ banɔkpa kayidza lelãa ƙamɛ badi ya ne Yesu sekẽ beyavia ye ^{XXIV} ƙĩ, “Ƙɔtsa Ƙtsanɛ, Mose bi boe ƙĩ nte onyole odi ƙĩ ɛtãma ku ni, ƙɛnɛ ƙĩ ɔwaɛnyole ɛkɔã okunawa a lokɔa bɛma bido ye lolɔ. ^{XXV} Finyaa bawaɛnyole evũƙɔnɔ badi dzi ne boe ƙamɛ tɔ ne awĩ. Ƙnɔkɔẽde a ƙɔã ɔtsɔ lɛmɛ bɛmo ye betãma fomɔ eku, foesũ ɛƙɔnɛ ye okunawa a eyi ɛkpa ɔwaɛnyole a. ^{XXVI} Ade letsa mɔape a leya ne

oyade a, mo olalède a, kenawo ovũkõnõde a akũ a. ^{XXVII} Ne foe kawũna kame a, otsole a lemè ku. ^{XXVIII} Finyaa, ne luwi a kĩ banõkpa aayidza bidzi nkpã akũ a, be kame òdabe òtsõ yaanya, kitonekĩ banyole evũkõnõ a flee kã ye tõ a?”

^{XXIX} Yesu kpa be mbuaye kĩ, “Mikena mfumsu, kitonekĩ minyĩna Katselè Kpalèwa a fõletsã mo Baguma kòbè a. ^{XXX} Kitonekĩ ne banõkpa kayidza kadzi nkpã kame ni, beláakõã batsõ ìye bidzi fonyõ, mbom baana nde ode foto banyane aye. ^{XXXI} Mbõee mitákã tõ letsã a kĩ Baguma le ne banõkpa kayidza kadzi nkpã akũ a? Èle kĩ, ^{XXXII} ‘Yĩ nye Abraham Baguma, mo Isak Baguma mo Yakob Baguma.’ Nnè banõkpa Baguma yane, mbom batidziwa ade yane.”

^{XXXIII} Kĩ bati kòdabu a nu fõletsã kĩ a, akũ dzuli be ne ye fõtsã katsã a akũ.

Yesu Tsa Mbla a Kĩ Ebè Flefle a.

^{XXXIV} Kĩ Farisifo a nu kĩ Zadukifo a tãpuli bẽdza ne Yesu ane a, benakpõta ne kakõ moa, ^{XXXV} ade be kame omõa kĩ enye mbla òtsane so Yesu edã ne fõletsã kavia kame kĩ, ^{XXXVI} “Fõtsã òtsane, Mose mbla aádabe bè ne te kame?”

^{XXXVII} Yesu kpa ye mbuaye kĩ, “Wè boe òlate, nõ Baguma a kalè mo nõ òwõlè flee, mo nõ òkla flee, mo nõ adzuni flee. ^{XXXVIII} Ade mbla kĩ nye atonyade mo ekĩ ebè flefle a. ^{XXXIX} Mbla ayade a la nde ye, ‘Wè nõ òkõba kalè nde ayekĩ awe nõ moawe akũ kalè.’ ^{XL} Ade tebla nviã kĩ akũ Mose mbla a mo Baguma onukpè banyene fõtsã katsã a flee dzè a.”

Owei Nye Kristo a?

XXI Kĩ Farisifo a yakpota a, Yesu via be kĩ,
XXII “Litsa nye mi adzuni ne Kristo akũ? Owei obinyole yane?”

Bekpa mbuaye kĩ, “Legã Dawid kasinu kame owa yane.”

XXIII Ade Yesu via be kĩ, “Kekõ nde sũ Dawid tsã Hũhũ kame eve ye kĩ, ‘Olate’? Kitonekĩ Dawid le kĩ,

XXIV ‘Boe Olate bi yĩ Olate a kĩ,

“Dzi ne yĩ somona

kenaawo kĩ maakoa

no bakesine ndo ne no aboa kayo.” ’

XXV Nte Dawid ve Kristo kĩ Olate a ni, nde Kristo aapuli enya Dawid obinyole?” XXVI Be kame odima tãpuli ekpa Yesu mbuaye, ade kito luwi a kanaa a, odima tãdo owole ebuki evia ye kale kadima.

XXIII

Yesu De Bati Ne Mbla Batsane Mo Farisifo Akũ.

I Ke liti a, Yesu bi bati kodabu mo ye fotsa bakolene a foletsa kĩ, II “Mbla batsane mo Farisifo a bekpa kobẽ kĩ banye Mose mbla a kayo. III Foesũ mikena letsa nye letsa kĩ bibi mi kĩ mikena a mipi foe midomo akũ. Leme mitadã be fokelatsa mikena, kitonekĩ baákena ne letsa a kĩ bale a akũ.

IV “Bisuli fotsa mo olome kĩ fudeĩ osĩ mo kalo belola bati, leme be moawe a kõ baáwe kĩ bayo lawobi malo bibumena bati foe kalo.

V Bakena letsa nye letsa ayekĩ bati bemo be keke. Bakoa fumake kĩ fosa a kĩ betsele Baguma foletsa bite kaboa ne nnye mo akpo. Ade bakena be

tetadie wulaa ato tesa, tevane mo mpesempese geleelegelēle a! ^{VI} Bawe kī badzi ne banokōē fudzikō ne kanyakō, mo banokōē fudzikō ne Yudafō fotsenakō. ^{VII} Bawe kī bati bewōna be mo obu ne kōyaato, beve be kī Fōtsa Ōtsane mo obu.

^{VIII} “Ketāne kī have mi kō kī Fōtsa Ōtsane, kitonekī Fōtsa Ōtsane moape mideī, ade mi flee minye bawaē a. ^{IX} Ade ayea mitave odima ne tite akū kī mi Ōlega, kitonekī Ōlega moape mideī ne ode. ^X Mitafō odima leve mi kī Ōkpāne malo, kitonekī okpāne moape mideī, kī enye Kristo. ^{XI} Oti a kī enye onokōē ne mi kame ni, enya mi osumune. ^{XII} Odi nye odi kī yadela ye akū ne ode ni, baakena ye ne kayo, ade odi nye odi kī edola ye akū ni, baadela ye ne ode.

Yesu Kó Mbla Batsane Mō Farisifō Koto.

^{XIII} “Leme makpa mi mbla batsane mo Farisifō bobōe! Ane kame keke fōtsa bakenane! Mibale ode legākanyakō a onyukpē a mido bati. Mi moawe a miáwo, ade miákpa bikī bebōa mbōdi kī bawo a osi biwo a.

^{XIV} “Makpa mi mbla batsane mo Farisifō bobōe! Ane kame keke fōtsa bakenane! Miate bakunawa toto ne be awe ade miabōa mpae geleele kakōa tsa akū a. Ne fukī sū míana soto kavele mo ošī seba!

^{XV} “Makpa mi mbla batsane mo Farisifō bobōe! Ane kame keke fōtsa bakenane! Mitsā mpo akū minyina minaa fude fude kī miawe oti moape edani Yudani, leme nte midani ye a, miakena ye titi nviā ekpola ekpa fi luwotu kame kanaa nde mi aye!

XVI “Makpa mi banekune a kī bakpā bati a bɔbɔe! Miale kī, ‘Nte odi tani Asoli Kola ni, fonyé letsama, leme nte etani sika ngbā ne Asoli Kola kame kō ni, fubo a pi ye.’ XVII Banekune bakɔasia! Fɔɔdabe bē kɔya? Sika ngbā a mbɔee Asoli Kola a kī kofō sika a akū kpale a? XVIII Miatsa fɔtsa leme kī, ‘Nte odi tani Baguma afolibɔ atenyɛ a ni, fonyé letsama, leme nte etani afolie fɔtsa a ne afolibɔ atenyɛ a akū kō ni, elo fubo.’ XIX Banekune miane nuwī! Fɔɔdabe bē kɔya? Futetsa a mbɔee kī afolibɔ atenyɛ a kī ye lekpalɛ futetsa a akū a? XX Foesū nte odi tani afolibɔ atenyɛ a ni, etani ye mɔ futetsa a kī futeī ne atenyɛ a akū a flee. XXI Ade nte odi tani Asoli Kola a ni, etani koe mɔ Baguma a kī edzi ne koe kame a. XXII Ade ayea nte odi tani ode ni, etani Baguma legākpɔ mɔ Baguma a kī edzi ne de akū a.

XXIII “Bɔbɔe makpa mi mbla batsane mɔ Farisifo! Anɛ kame keke fɔtsa bakenane miane! Miakpa Baguma tuwī kī bakɔa kado funitsā olē te kame kasē katsu kawuade a pɛpɛpɛ, leme mifone mbla fɔtsa katsa sīwa, kī fonyɛ foletsa kadze ne osi kpīī, kɔnyakamɔ mɔ ɔnɔkɔali kadi awe. Ade fukīī kufe kefeta kī miakena lɔkɔa mikena fɔbɛbā a mibu a. XXIV Banekune bati bakpāne! Miasoni kɔyabi kanye ne have kame, leme miamena ɔponko mɔ kanɛ mɔ lɔpɔ!

XXV “Bɔbɔe makpa mi mbla batsane mɔ Farisifo! Anɛ kame keke fɔtsa bakenane! Miavole mi kuyei mɔ titsensi liti yededeede, leme foe kame yi mɔ fɔtsa a kī mikɔa kobē mɔ anengbā mite a. XXVI Nɔ Farisini ɔnekune, nya lotɔ kavole

kayei a kame, lókɔa ke liti lɛmɛ aakpale!

XXVII “Bɔbɔɛ makpa mi mbla batsane mɔ Farisifo! Anɛ kame kɛkɛ fɔtsa bakenane! Mila ndɛ funikɛ kɪ bikputa mɔ tite owoe kɪ fɔalɛ kadā, lɛmɛ foe kame yi mɔ banɔkpa fɔtsɔ mɔ sukɛna vɔwa. **XXVIII** Ade ayea miatsa akū nɛ bati anɛ ndɛ bati wɪ, lɛmɛ mi kame kɔ yi mɔ anɛ kame kɛkɛ fɔtsa kakɛna mɔ tɔkpa.

Yesu Lɛ Mbla Batsane Mɔ Farisifo Sɔtɔ Kavele Eyi.

XXIX “Bɔbɔɛ makpa mi mbla batsane mɔ Farisifo! Anɛ kame kɛkɛ fɔtsa bakenane! Mike funi mɔ kale mikpa Baguma onukpɛ banyɛnɛ a ade mihehe bikɪ bidzi nkpā wɪ a anɛ kate fɔtsa a. **XXX** Ade mialɛ kɪ, ‘Ntɛ budzi nkpā nɛ boe bawanyɔ lɔkɔ a ni, kufɛ bɔtākɛna ɔmɔa mɔ be bɔkɔ Baguma onukpɛ banyɛnɛ a.’ **XXXI** Ade fukɪ mikɔa midi adansie nɛ mi akū kɪ minye bati a kɪ bɛkɔ Baguma onukpɛ banyɛnɛ a bawa! **XXXII** Nɛ foesū mikɛna minaa lotɔ, lɔkɔa miyula lɛtsa a kɪ mi bawanyɔ yi kayɔ a!

XXXIII “Mi bati kɪ belɛ ndɛ bɔɛ babi! Kakɔna mikɔna kɪ mɪapuli milo, kɪ beláakɔ mi kɔtɔ bɛkpa fi luwotu kame kanaa? **XXXIV** Foosū mabi mi kɪ maado Baguma onukpɛ banyɛnɛ, anyansāfɔ, mɔ fɔtsa batsane nɛ mi sɛkɛ. Mɪakɔ badi, mibɔa babɛbā nɛ asendua akū, mɪabo badi mɔ mple nɛ mi fɔtsɛnakɔ, mitomɔ be liti kito ɔmatɔ kɛnaa ɔmatɔ. **XXXV** Nɛ fukɪ sū bati wɪ babɔanɛ a kɪ biwula a flee aaya nɛ mi akū. Fɔayi kayɔ futo oti kpɪ Abel babɔanɛ akū kɛnaawo Zakaria, Barakiya obi a kɪ mikɔ nɛ Asoli Kɔla mɔ afolibɔ atɛnyɛ a kayite a akū. **XXXVI** Mabi mi nɛ

ɔnɔkɔali kame kī sɔtɔ kavɛɛ nɛ wuda kīi flee akū aaya nɛ mi nviã babi akū!

Yesu Ɔɔɔ Kī Ena Ekpa Yerusalem.

XXXVII “Yerusalem, Yerusalem, nɔ a kī ɔkɔ Baguma onukpẽ banyɛnɛ, ade ɔnɔ fɔtɔ banyanɛ a kī Baguma do nɛ nɔ sekẽ a boe a! Titi eni nwe kufɛ kī makpɔta nɔ babi ndɛ ayekī ɔkɔkɔ bima akpɔta ye babi kado nɛ fupoki kayɔ, lemɛ ɔtátunɔ! XXXVIII Dã, baafɔnɛ nɔ toto awɛ biyi tɛdza luto. XXXIX Mabi nɔ kī kito finyaa kanaa ni, ɔláabuki ɔmó yī kɛnaawo kī aale kī, ‘Baguma hila oti a kī yaya nɛ boe Ɔlate dī akū a.’ ”

XXIV

Yesu Lɛ Kale Nɛ Asɔli Kɔla a Kabubuli Akū.

I Kī Yesu né nɛ Asɔli Kɔla kame yanaa a, ye fɔtsa bakɔlɛnɛ a ya nɛ ye sekẽ kī batsa ye ayekī bike kola a flee a. II Yesu bi be kī, “Midã fukīi flee kadã wī. Mabi mi nɛ ɔnɔkɔali kame kī beláatina de lidima nɛ lɔkɔba akū kī beláadu bimuni.”

Yesu Bi Ye Fɔtsa Bakɔlɛnɛ a Kī Baana Ɔhau Mɔ Liti Katomɛna.

III Kī Yesu nɛ edzi nɛ Kugua Futse Ɔto a akū a, ye fɔtsa bakɔlɛnɛ a bela bɔɛɛ bɛya nɛ ye sekẽ bivia ye kī, “Lokɔ lowɔdabe fɔtsa kīi aaya nɛ foe kame. Bi boe letsa a kī laanya nɔ kaya mɔ katinya kame kawūna a nsentsɛleni.”

IV Yesu kpa be mbuayɛ kī, “Midã kadã wī ayekī odima lɛláake mi. V Kitonɛkī bati pii aaya nɛ yī dī akū bele kī, ‘Yī nye Kristo a.’ Baake bati pii. VI Míanu kawū kanɔ mɔ kawū akū fɔletsa mɔ lugo. Lemɛ mitafõ fɔtsa kīi lebole mi towɔle. Kɛnɛ kī fɔtsa kīi fɔya nɛ foe kame, lemɛ fɔátsa

kĩ katinya kame kawũna a wo ɔto. ^{VII} Ōmaĩ aano mo akũ, ade fɔgã kanyakõ aayidza beno mo fɔgã kanyakõ a. Kɔle aana, ade tite aakuna mo ɔsĩ mo ɔsĩ ne fɔko pii a. ^{VIII} Fukĩ flee la nde ɔmatsõ seme kapi kawo a kayokayi aye.

^{IX} “Ne loko a na kame ni, baanye mi bekpa kĩ bekena mi awoda, beko mi malo. Batidziwa flee aakesĩ mi ne yĩ sũ. ^X Bati pii aamuniki ne be katekado liti. Baanye be akũ akũ aboa, bikesĩ akũ leme. ^{XI} Fovã onukpẽ banyene aane bekpã bati pii beyela osi. ^{XII} Tokpa kakena aade ne ode paa kĩ bati pii ɔdo onukpẽ aado. ^{XIII} Leme odi nye odi kĩ yaadza pintii enawo kawũna ni, Baguma aate ye. ^{XIV} Baale Baguma legãkanyakõ akũ Kale Wĩ a akũ foletsa ne katinya kame flee fonya adansie fokpa batidziwa flee. Ne fukĩ liti a, katinya kawũna a aaya.

Lubokamo Mo Libe Aaya.

^{XV} “Nte mimó Fɔtsa mo libe kĩ foako Ōmaĩ, kĩ Baguma Onukpẽ Ōnyene Daniel le foe akũ foletsa eyi a kĩ fɔdzẽ ne kako kpalewa a, no ovoli kĩ ɔkãne, nu foe kayo dzununuunu, ^{XVI} lokoa bati a kĩ bideĩ ne Yudea, bilo benaa toto a akũ. ^{XVII} Oti a kĩ edeĩ ne kola ode ni, etaduma eka kĩ yanaabɔe ye akũ fɔtsa enemena ne kola kame. ^{XVIII} Ade ayea oti a kĩ edeĩ ne koba leme, etamuniki eya kĩ yanaabɔe ye atadie. ^{XIX} Leme bobɔe makpa bamatsõ mo bikĩ babi ameme ne awe ne loko a na kame. ^{XX} Miboa mpae mikpa Baguma kĩ mi kalo loko letana ne osili loko iye Kaweya Luwi akũ! ^{XXI} Kitonekĩ lubo kamɔ ne loko a na kame aana ɔsĩ leba lidi nye lidi kĩ leya tõ, kito

katinya kayɔkayi keyawo nviã kĩĩ, ade de odu lemɛ leláabuki leya dadaada a. **XXII** Nte Baguma etatinya lubokamo fuwi a na akũ kɔkɔɛ ni, kufe otidziwa odima leláana nkpã. Lemɛ ne bati a kĩ epau eyi a sũ ni, Baguma aatinya fuwi a akũ.

XXIII “Foesũ nte odi bi mi kĩ, ‘Dã, Kristo deĩ ne awĩ,’ ãye ‘Amo ye ne akĩĩ’ ni, mitate foe mido. **XXIV** Kitonekĩ fɔvã kristofɔ mo fɔvã onukpẽ banyene aane, ade baakena nsentseleni mo awãwã fɔtsa kĩ nte baapuli beke bikĩ Baguma pau a malo. **XXV** Midã, mbi mi fukĩĩ ãnyamena loto fɔmo lokɔ a aawo ɔto.

XXVI “Foesũ nte bati bi mi kĩ, ‘Dã, edeĩ ne kɔsa kame’ ni, mitanaa awã. Ade ayea nte bati le kĩ, ‘Dã, edeĩ ne kola kame’ ni, mitate foe mido. **XXVII** Kitonekĩ Otidziwa Obi a kaya aana nde ayekĩ odetó kame amɔane kato suwa kadekõ kanaa suwa katomukõ a.

XXVIII “Awã kĩ fɔtsa kuwa deĩ ni, ade awã fɔpete akpota a.

Otidziwa Obi a Kaya.

XXIX “Nte lubo kamo fuwi a na yatẽ pe, suwa aake ɔtũ, odeto lemɛ leláabuki evɔle. Fusibii aato ode foto ade kɔbẽ fɔtsa a kĩ fudeĩ ne odetó kame a aakuna akũ, fɔdzakũ ne foe kadzakõ a.

XXX “Ade lokɔ a na kame mo Otidziwa Obi a nsentseleni aane ne odetó kame, ade tite akũ bati flee aabe, ade baamo Otidziwa Obi a kĩ yaya ne luflututu akũ mo kɔbẽ ne kukũkpale kpale kame. **XXXI** Baavõ kagbulɛ kpale a, lokɔa yaado ye ode foto banyane benaa katinya tukonto ena a akũ, benaakpota ye bati a kĩ epau a kito katinya seke kĩĩ kenaa seke kĩĩ akũ.

Yesu Kɔa Kutse Kĩ Kɔawũ Babi Ekpa Nsentseleni.

XXXII “Mikɔle fɔtsa ne ato kutse a akũ. Nte kɔnɛ tebabɪ vɔẽ mɔ kudo tɔta blɔblɔ kanɛ awɛ ni, minyina kĩ ovio lɔkɔ fuã. XXXIII Ade ayea nte mimó fɔtsa a kĩ nle flee a ni, minyi kĩ katinya kawũna a lɔkɔ wo ɔto fuyua. XXXIV Mabi mi ne ɔnɔkɔali kame kĩ fɔtsa kĩ flee aaya ne foe kame, fomɔ nviã babi kasinu kĩ flee aaku. XXXV Tite mɔ ode aayatẽ, lemɛ yĩ fɔletsɔ a kɔ onukpẽ lelãatẽ da.

Odima Linyína Luwi a Ìye Dɔũhuilɛ a.

XXXVI “Odima linyína luwi ìye dɔũhuilɛ a kĩ fɔaya ne foe kame. Ode fɔto banyanɛ a ìye Obi mɔawɛ a malo linyína, mbɔentɛ ɔlegɔ odi keĩ nyina. XXXVII Otidziwa Obi a kaya aana ndɛ ayekĩ fɔya ne Noa lɔkɔ a. XXXVIII Nɛ fuwi a kĩ fɔnya mui kayili ne tite akũ lɔto kame a, bati kanya bekamɔa, bekakɔã batsɔ, bekakɔã banyole kenawo luwi a kĩ Noa wo ne adaka ɔkɔlɔ a kame, XXXIX lemɛ betányi letsɔ a kĩ lekaya kenawo kĩ mui kayili a yalɔ be flee enamɛna. Ade aye lemɛ Otidziwa Obi a kaya aana a. XL Nɛ lɔkɔ a na kame a, banyole nviã aakakɛna adzuma ne kɔba, baabɔɛ ɔmɔa benamɛna, befɔnɛ ɔmɔa awɛ biyi. XLI Batsolɛ nviã aakawɔlɛ onuvoɛ ne kɔwɔlɛ akũ, baabɔɛ ɔmɔa befɔnɛ ɔyade a biyi.

XLII “Foesũ mina ne kukũmanɛ kame, kitonɛkĩ minyína luwi a kĩ de akũ mi ɔlate a aaya. XLIII Nte kanyi tɔto ɔlate nyina lɔkɔ a kĩ oyekpanɛ aawo ne ye akũ ni, kufɛ esi lipe kĩ etákpa oyekpanɛ a osi ewo ne ye kɔla kame. XLIV Nɛ foesũ mi malo

mimane akũ miyi, kitonekĩ Otidziwa Obi a aaya ne loko a kũ miádã ye ane a akũ.

Ɔsumune Kĩ Edi Ɖoƚoali Mo Ɔsumune Kĩ Etádi Ɖoƚoali.

XLV “Foesũ owei nye Ɔsumune Ɖoƚoalini mo kadi onyine? Ade ye nye oti a kũ ye Ɖlate kƚa edzela ne ye basumune bebã onukpẽ kũ ekpa be funitsã ne loko wĩ akũ. XLVI Bihila Ɔsumune a kũ ye Ɖlate aato osi akũ eyaamo kũ elamena adzuma a kũ ekpa ye a kakena! XLVII Ɖoƚoali mabi mi kũ, Ɖlate a aakƚa ye edzela ne ye fotsa flee onukpẽ. XLVIII Leme nte enye Ɔsumune kpa ni, yaabi ye akũ kũ, ‘Yĩ Ɖlate a leláaya moatse!’ XLIX mo edo ye bakoba basumune a kabo awe, yanya kamoa mo have bawugane ni, L ye Ɖlate a aamuniki eya ne luwi a kũ etáte ane mo loko kũ enyina akũ. LI Ye Ɖlate a aablomena ye, ebele ye soto efõ ena tsefã mo ane kame keke fotsa bakenane. Ade awã yaabe eba adõ a.

XXV

Yesu Bƚa Legbã Ne Bayitsõ Ewua a Akũ.

I “Loko a kũ Otidziwa Obi a aaya a, Baguma legãkanyakõ a aana nde bayitsõ ewua kũ bebœ be tesedza kũ banaatselamo obolitsõ onyo. II Be elo nye bakoasia, be elo leme nye anyansãfo. III Kĩ badzimbifo a bœ be tesedza a, betábœ kugua bibu. IV Anyansãfo a kõ ko kugua ne titontolowa kame bele bibu mo be tesedza a. V Obolitsõ onyo a táya moatse, foesũ tida bœ bayitsõ a, ade bewa tida a.

VI “Ne lenye kayite a, binu fowola kī, ‘Amo obolitsō onyo a ne awī tsoo! Mine miyaatsela mo ye!’

VII “Ade bayitsō ewua a yidza betena be tesedza a. VIII Badzimbifo a bi anyansāfo a kī, ‘Mikpa boe mi kugua a kudi, kitonekī boe tesedza lamō kadī.’

IX “Leme anyansāfo a kpa be mbuaye kī, ‘Oowo, kukī bonεε a leláato bomō mi. Minaa bikī bano a sekē minaaya mi kude.’

X “Leme kī bayitsō badzimbifo a dzakū benaaya kugua a, obolitsō onyo a yaya. Bayitsō elo a kī bemanε akū a, tomō ye benaa obolitsō kapikō a, ade bebale opunu a.

XI “Ke liti a, bayitsō nkaε a muniki beya, ade bebōa fowola kī, ‘Boe Jlate, boe Jlate, binya opunu kakpa boe!’

XII “Obolitsō onyo a kpa mbuaye kī, ‘Oowo! Ne onokōali kame ni, ñnyína mi!’ ”

XIII Yesu le ewūna kī, “Ne foesū mina ne kukūmanε kame, kitonekī minyína luwi ñye dōūhuile a.

Yesu Bōa Legbā Ne Basumune Elale a Akū.

XIV “Ode legākanyakō a la ndε foletsā kī. Onyole odi manε akū kī yanaa osi akū. Eνε ye basumune ekpota ade ekōa ye fotsa kī edeī a edo ne be awe a. XV Ekpa odi nye odi ne ye mbōdibo onukpē. Foesū ekpa oti mōa sika ovoe mpim elo, ekpa obebā mpim nviā, ade ekpa olaledε a apim mōa, edzakū enaa osi akū a. XVI Jsumune a kī ete sika mpim elo a, nadani awe ne se akū ena mpim elo nfasō ete ne se akū. XVII Ade ayea oti a kī ete sika mpim nviā leme nadani awe ne se

akū ena mpim nviã ete ne se akū a. ^{XVIII} Leme ɔsumune a kī ete apim moa a, natu leke ekɔa ye ɔlate sika a ekola ne de kame.

^{XIX} “Ne loko geleele liti a, be ɔlate a muniki eya, ade ekena akunta mo be a. ^{XX} ɔsumune a kī ete sika mpim elo a kɔa se mo mpim elo kute a eyamena ele kī, ‘Boe ɔlate, sika mpim elo a kī ɔkpa yī a, dā nna mpim elo bebã nte ne se akū.’

^{XXI} “Ye ɔlate a bi ye kī, ‘Mbo, ɔsumune wī mo ɔnokɔalini! Odi ɔnokɔali ne fɔtsa kabii akū, foesū maakɔa no ndzela ne fɔtsa pii onukpē. Yaawo ne yī kawɔlekamo kame!’

^{XXII} “ɔsumune a kī ete sika mpim nviã a leme yale kī, ‘Boe ɔlate, ɔkpa yī sika mpim nviã. Dā, nna mpim nviã bebã kute nte ne se akū.’

^{XXIII} “Ye ɔlate bi ye kī, ‘Mbo, ɔsumune wī mo ɔnokɔalini! Odi ɔnokɔali ne fɔtsa kabii akū foesū maakɔa no ndzela ne fɔtsa pii onukpē. Yaawo ne yī kawɔlekamo kame!’

^{XXIV} “Ade oti a kī ete sika apim moa a yabi ye kī, ‘ɔnokɔē, ñnyina no kī oti mo ɔsī ane. Ana fɔtsa ne awã kī ɔtádu foe, ade akpɔta funitsã ne awã kī ɔtádu foe a. ^{XXV} Ne foesū nvila, ade nnakɔa no sika a nnabila ne tite kame a. Amo no fɔtsa ne awī.’

^{XXVI} “Ye ɔlate kpa ye mbuaye kī, ‘No ɔsumune kpa mo ɔnyɔnepo! Nte onyina kī mana fɔtsa ne awã kī ntádu foe, ade makpɔta fɔtsa ne awã kī ntásã foe a ni, ^{XXVII} kufe kakɔa akɔa sika a ɔnaado ne sika kakɔlakɔ ayekī nte mmuniki ñya, maate se mo se akū kute a.

^{XXVIII} “ ‘Mite sika a ne ye awe, mikɔa se mikpa oti a kī edeī sika mpim ewua a. ^{XXIX} Kitonekī

odi nye odi kī edeĩ fotsa ni, baakɔa fotsa pii bibu ye, ade yaana foe fublusu a. Leme oti a kī elá letsama ni, foe kabii a kī edeĩ a malo baate foe ne ye awe. ^{XXX} Ɔsumune kī ye akū lelá nfaso kī lenéne ekpa letsama kakena. Foesū mita ye mimuni ne ɔtū kame. Ade awã yaana ebe eba adõ a.'

Yesu Le Kɔdzela Ne Bati Kadzemeɔa Nkae a Akū.

^{XXXI} "Nte Otidziwa Obi a to ode eya ne ye kukūkpale kame, kī ode foto banyane flee a tomo ye a, yaadzi ne ye legãkpo a akū. ^{XXXII} Ade baakpota katinya kame bati flee ne ye ane kame a. Adeke, yaasẽ be ne kutsu nviã kame nde ayekĩ baveli ɔkpãne asẽ baveli mo kutukpabi kame a. ^{XXXIII} Yaakɔa bati wĩ a edzala ne ye somona, lokɔa bati kpa a anna ne ye seba.

^{XXXIV} "Legã a aabi bati ne ye somona a kī, 'Miya, mi a kī Nda hila a. Miyaawo ne legã kanyakõ a kī bemane biyi bekpa mi a kame, kito ane kī bebɔa katinya kame a, ^{XXXV} kitonekĩ kī kole ko yĩ a, mikpa yĩ litsedi ñnya. Kĩ omɔado kõ yĩ a, mikpa yĩ mui mmɔa, ade kī ñnye ɔnoɔẽ a, mite yĩ ne mi toto kame. ^{XXXVI} Kĩ ndzi ɔdzo a, mido yĩ atadiɛ, kī maso a midã yĩ akū, ade kī nwaa kola a, miyasela yĩ.'

^{XXXVII} "Ade bati wĩ a aavia ye kī, 'Boe Ɔlate, luwei bomó no kī kole ko no mo bokpa no funitsã, ñye kī omɔado ko no mo bokpa no mui omɔa? ^{XXXVIII} Luwei bomó no ɔnoɔẽ mo bote no ne toto kame, ñye luwei ɔtsã ɔdzo mo bokpa no atadiɛ odo? ^{XXXIX} Luwei ɔso mo bodã no akū, ñye luwei ɔwa kola mo boyasela no?'

XL “Legã a aakpa be mbuaye kī, ‘Mabi mi ne ɔnɔkoali kame kī letsa nye letsa kī mikena mikpa nwaẽ ame babisẽ kī kī belá obu a kame odi ni, yī mikena foe mikpa!’

XLI “Adeke mɔ Legã a aabi bikī ne ye seba a kī, ‘Mine liti ne yī akū, mi bati kī Baguma dumu! Mitɔ minaa fi kī foádī da a kī bemane bekpa Abonsam mɔ ye ode foto banyane a kame!

XLII Kɔle kɔ yī leme mitákpa yī ñnya, ɔmɔado kɔ yī leme mitákpa yī mui mmɔa. XLIII Ñnya ɔnɔvɔẽ leme mitáte yī ne mi tɔtɔ kame. Ndzi ɔdzɔ leme mitádo yī atadie. Nsɔ mitádã yī akū, ade nwa kɔla leme mitáyaasela yī a.’

XLIV “Ade be malo baakpa mbuaye kī, ‘Boe ɔlate, luwei tɔ kɔle kɔ nɔ, ñye ɔmɔado kɔnɔ, ñye ɔnya ɔnɔvɔẽ, ñye odzi ɔdzɔ, ñye ɔsɔ, ñye kī ɔwa kɔla mɔ botákena letsama bokpa nɔ?’

XLV “Legã a aakpa be mbuaye kī, ‘Mabi mi ne ɔnɔkoali kame kī letsa nye letsa kī mitákena mikpa nwaẽ ame babisẽ kī belá obu kī kame odi ni, yī mitákena foe mikpa.’

XLVI “Foesū baanamɔ bati kī lubokamɔ a kī lelá kawūna a kame, leme bati wī a aanaa nkpã kī elá kawūna a kame.”

XXVI

Yudafo Kena Nhihie Ne Yesu Akū.

^I Kī Yesu le foletsã kī flee eyua a, ebi ye fɔtsa bakolene a kī, ^{II} “Minyina kī kite fuwi nviã kī banya Wuda Katẽ luwi a. Ne fuwi a na kame, baanye Otidziwa Obi a bekpa kī beboã ye ne asendua akū.”

III Ade basofonokɔɛ mo ɔmaĩ banokɔɛ a tsena ne Ɔsofonokɔɛ Flee Kaiafa toto kame a. IV Bekena nhihie kĩ baapi Yesu ne kabela kame lokɔa beko ye. V Bele kĩ, “Ketáne kĩ boakena foe ne fuwi kanya a kame, nte nné aye ni, bati a aado ɔtutũ ne ɔmaĩ a kame.”

Betsela Yesu Kugua Mo Olɛ Ne Betania.

VI Yesu naa Simon kĩ esɔ tɔ foso ngbã a awã ne Betania. VII Lokɔ a kĩ Yesu dzi ne opunu akũ ekanya a, otsole odi kĩ enee tumpã mo kale, kĩ eyi mo kugua mo olɛ yatsokui kugua eko ne Yesu lolɔ kame.

VIII Kĩ fotsa bakolene a mó fukĩ a, bena kalokpa ade bivia kĩ, “Nde sũ yabula kugua a kade lomɔ? IX Baapuli beno koe mo koyã baũ lokɔa beko se bite ahiãfo!”

X Yesu nu letsã a kĩ bekale a, foesũ ebi be kĩ, “Nde sũ miaha otsole kĩ? Ekena fotsa wĩ ekpa yĩ. XI Ahiãfo deĩ ne mi kame daa, leme yĩ kɔ miláana yĩ ne mi kame daa. XII Letsã a kĩ otsole kĩ kena nye kĩ eko kugua ne yĩ akũ ekɔa emanɛ yĩ ekpa kabila. XIII Mabi mi ne ɔnokɔali kame kĩ kaka nye kaka kĩ baade letsã ne Kale Wĩ a akũ ni, baale letsã a kĩ otsole a kena a leme, bekoã bekaĩ ye.”

Yuda Tunɔ Kĩ Yaanye Yesu Ekpa.

XIV Adeke fotsa bakolene a ewua-nviã kame ɔmɔa kĩ baye Yuda Iskariot a naa basofonokɔɛ a sekẽ a. XV Enavia be kĩ, “Litsã miakpa yĩ nte ntsa ye liti osi?” Bekã sika ovoe fobo taale bido ne ye awe. XVI Kito lokɔ a naa, ekawe osi wĩ a kĩ yaatsã enye Yesu ekpa.

Yesu Mɔ Ye Fɔtsa Bakɔlenɛ a Nya Wuda Katẽ Funitsã a.

XVII Nɛ Abodoo Kĩ Etáyila Luwi kanya lotɔnyade akũ a, fɔtsa bakɔlenɛ a ya nɛ Yesu sekẽ bivia ye kĩ, “Nɛ ndia awɛ kĩ bɔnaamanɛ bɔkpa nɔ Wuda Katẽ funitsã a kanya?”

XVIII Ekpa be mbuayɛ kĩ, “Minaa ɔmato a kame nɛ onyole odi sekẽ, mibi ye kĩ, ‘Fɔtsa Ɔtsanɛ bo yĩ lɔkɔ fuã, foesũ bɔmɔ yĩ fɔtsa bakɔlenɛ a bɔayanya Wuda Katẽ funitsã a nɛ nɔ awã.’ ”

XIX Fɔtsa bakɔlenɛ a kɛna ndɛ ayekĩ Yesu bi be a, ade betɔ Wuda Katẽ funitsã a.

XX Kĩ olobe wo ɔtɔ a, Yesu mɔ fɔtsa bakɔlenɛ a nadzi kĩ banya. **XXI** Nɛ kanyakɔ a, Yesu bi be kĩ, “Mabi mi pipiipi kĩ mi kame ɔmɔa aanyɛ yĩ ekpa.”

XXII Fɔha fɔtsa bakɔlenɛ a paa, ade bivia ye ɔmɔa ɔmɔa kĩ, “Boe Ɔlate, yĩ manɛ mbɔɛɛ?”

XXIII Yesu kpa mbuayɛ kĩ, “Oti a kĩ bɔmɔ ye awɛ kpɔta nɛ sɔɔdaɛ kame a, ade ye aanyɛ yĩ ekpa a. **XXIV** Otidziwa Obi a aaku ndɛ ayekĩ betsele nɛ Katsɛle Kpalewa a kame, lemɛ bɔbɔɛ makpa oti a kĩ ye aanyɛ Otidziwa Obi a ekpa! Ntɛ betama oti a na malo, kufɛ fɔnɛnɛ fɔkpa ye fɔbɛ!”

XXV Ade Yuda a kĩ enyɛ ye ekpa a lemɛ via kĩ, “Fɔtsa Ɔtsanɛ, yĩ manɛ mbɔɛɛ?”

Yesu kpa ye mbuayɛ kĩ, “Nɔ mɔawɛ lɛlɛ.”

Boe Ɔlate a Olobe Funitsã Kayɔkayi.

XXVI Kĩ bekanya a, Yesu bɔɛ abodoo, ade kĩ ɛbɔa mpɛ nɛ ye akũ a, ebulibuli ye ekpa ye fɔtsa bakɔlenɛ a, ebi be kĩ, “Mite minya, ade yĩ sukɛna nɛ awĩ a.”

XXVII Ke liti a, εβσε okuluwa mo waĩ enye Baguma kole ade εκσα εkpa be a. Ebi be kĩ, “Mi flee mite mimoa. XXVIII Fukĩ nyε yĩ baboane kĩ bekoa bisipi Baguma apam mo bati a. Fonye yĩ baboane kĩ biko ne tite ne bati pii lolo kĩ Baguma εkσα be tokpa ete be. XXIX Mabi mi kĩ nláabuki mmoa waĩ kĩ kenaawo luwi a kĩ bomo mi bomoa waĩ vε ne Nda Legã kanyakõ a kame.”

XXX Kĩ besã kolekanye ono biyua a, bene benaa Kugua Futse Oto a akũ.

Yesu Le Eyi Kĩ Petro Aasĩ Kĩ Enyĩna Ye.

XXXI Ade Yesu bi ye fotsa bakolene a kĩ, “Nviã lenye, mi flee mialo mifone yĩ, kitonekĩ Katsela Kpalewa a le kĩ,

‘Baguma aako baveli okpane a
ade baveli a aagba besã a.’

XXXII Lemε nte Baguma dzela yĩ ndzi nkpã ni, maanya mi loto nnaa Galilea.”

XXXIII Petro bi Yesu kĩ, “Nte be flee aalo befone no malo ni, yĩ kõ nláalo nfone no da!”

XXXIV Ade Yesu bi Petro kĩ, “Mabi no ne onokali kame kĩ lenye kĩ fomõ okoko aabe ni, aale titi elale kĩ onyĩna yĩ.”

XXXV Petro kpa mbuaye kĩ, “Nláalo nfone no da nte kene kĩ bomo no aaku malo!” Ade ayea fotsa bakolene nkae a flee le kale moape a.

Yesu Bõa Mpaε Ne Getsemane.

XXXVI Yesu mo ye fotsa bakolene a naa kako kadi kĩ bave Getsemane. Ebi be kĩ, “Midzi ne awĩ nnaa loto nnaabõa mpaε tõ.” XXXVII Ekpã Petro mo Zebedeo babi nviã ebumo ye akũ. Ne awã naa, ayoloho pi ye edo ekatila blibli bli awe,

XXXVIII ade ebi be kī, “Ayólòhò tẹ yī kame flee nde maku. Midzi ne awī bómó mi bókáadzólẹ fókó.”

XXXIX Kī enaa lóto sukuloo a, etsa ane ne tite ebóa mpae kī, “Nda, nte fóadā bóεε fǒ lubo kamó kóopu kīi etē ne yī akū! Leme nné ne ayekī mawe, mbom nde ayekī awe.”

XL Emuniki eya ne fotsa bakolene elale a sekē eyamó kī bewaa tida, ade ebi Petro kī, “Nde sū mi elale a miápuli midzi midzole dǒũhuile moape malo mibumó yī? **XL** Mikaadzole akū, mikaaboa mpae ayekī miláawo ne sǒhuie kame. Hūhū a awe leme sukena a kǒ kena kpeteε.”

XLII Yesu buki enaa leyade enaboa mpae ele kī, “Nda, nte fonye kī lubo kamó kóopu kīi leláapuli etē ne yī akū mbóente mmóa ye ni, kekǒ kena ne no kawε akū.”

XLIII Ebuki eya eyamó fotsa bakolene kī bewa tida, kī betápuli bibinya ane. **XLIV** Yesu dzakū efone be enaboa mpae lelade, ele foletsá moape a.

XLV Ke liti a, emuniki eyabi ye fotsa bakolene a kī, “Tida miwaa miaweya? Midā, lókó a wo ọto kī baakóa Otidziwa Obi a bido ne tokpa bakenane kóbē awe. **XLVI** Miyidza, mifǒ bonaa. Midā, oti a kī yaanye yī ekpa a, fuā.”

Yudafo Banókóǒ a Pi Yesu.

XLVII Kī Yesu buki ekale kódzela a, Yuda kī enye fotsa bakolene ewua-nviā a kame ọmóa a yawo awā. Bati kódadu baū a kī basofonókóǒ mó ọmaī banókóǒ do a tomó ye, benεε fopame mó futsekpa ne awe. **XLVIII** Oti a kī enye ye ekpa a, kpa be nsentseleni kī, “Oti a kī ye onukpē maadzeme a, ade ye ne awā a. Mipi ye.” **XLIX** Yuda yele tīi

εναα Yesu sekē ade ελε kī, “Fōtsa Ōtsane, lukudo litomō nō,” ade εdzeme ye onukpē a.

^L Yesu kpa ye mbuaye kī, “Ōkoba, we sowa ne letsa a kī oyaakena a akū.”

Adeke bati a fuā bipi Yesu, bitimtim ye kōoba a.

^{LI} Bati a kī bitomō Yesu a kame omōa vele kopā enye ne sepapo kame, etsua Ōsofonokōē Flee a osumune soto emuni.

^{LII} Yesu bi ye kī, “Kōa nō kopā a kado ne koe kadokō, kitonekī odi nye odi kī εboε kopā ne oti akū ni, kopā onukpē yaato. ^{LIII} Mbōεε onyina kī kufe maapuli nwā Nda kī eyaabumō yī, kī letaleta yaado ode foto banyane sodzafō kī bebē kutsu ewua-nviā beya? ^{LIV} Leme nte foya lomō ni, nde fōletsa a kī betsele ne KatsELE Kpalewa a kame a kī kene kī foya a, aaya ne foe kame?”

^{LV} Ke liti a, Yesu via bati kodabu a kī, “Nde sū mineε apā mō futsekpa kī miayaapi yī nde oyekpane aye? Luwi daa madzi ne Asoli Kōla kame katsa fōtsa, leme mitápi yī. ^{LVI} Leme fukīī flee ya ne foe kame, ayekī fōletsa a kī Baguma onukpē banyene a tsele biyi a, aaya ne foe kame.” Ade awā naa mō ye fōtsa bakolene a flee lo befōne ye a.

Benamō Yesu Yudafō Fōletsa Badzene Ane.

^{LVII} Bati a kī bipi Yesu a, kōa ye benamena Ōsofonokōē Flee Kaiafa sekē, awā kī mbla batsane mō banokōē a natsena. ^{LVIII} Petro tomō be ne liti kōlaa enawo ne Ōsofonokōē Flee a toto kame. Ewo enadzi kī yadā fōletsa a kī foya a kawūna.

^{LIX} Basofonokōē mō Fōletsa Badzene a flee we kī bama fōvā bite ne Yesu akū ayekī baako ye.

LX Tito kī bati pii ne beyama fovā ne ye akū malo ni, betámō letsama ne ye akū.

Ne ke kawūna kame a, bati nviā ne beyadza, LXI ade beɛ kī, “Onyole kī lɛ kī, ‘Maapulī nveli Asoli Kola a, mbuki nke koe ne fuwi elale liti.’ ”

LXII Ɔsɔfɔnɔkɔɛ Flee a yidza edza, evia Yesu kī, “Ɖláanye onukpɛ ne fɔletsɔ a kī bebɔɛ ne nɔ akū a akū?” LXIII Leme Yesu tábinya onukpɛ.

Ade Ɔsɔfɔnɔkɔɛ Flee a buki ebi ye kī, “Ntani Baguma kī edzi nkpā a kī, bi boe nte nɔ nye Kristo, Baguma Obi a.”

LXIV Yesu kpa ye mbuaye kī, “Ade aye ɔle a. Leme mabi mi kī kito finyaa kanaa ni, míamɔ Otidziwa Obi a kī edzi ne Baguma Kpale sɔmɔna, ade yaya ne ode luflututu akū a!”

LXV Mɔ ye onukpɛ kato pɛ, Ɔsɔfɔnɔkɔɛ Flee a yeɛ ye atadiɛ ele kī, “Onyole kī lɛ fubusuotsa! Bɔtábuki busī adansifo badima! Minu fubusuotsa a kī ele a! LXVI Litsa nye mi kakɔna?”

Bekpa mbuaye kī, “Eku kɔtɔ, foesū kene kī beko ye.”

LXVII Adeke bitua tane biko ne ye anɛ kame, betale ye fukpeni, ade badi leme bale bale ye toɔtɔ, LXVIII ade bivia ye kī, “Kristo, nte onye Baguma onukpɛ onyene ni, bi boe oti a kī ebɔa nɔ!”

Petro Lɛ Kī Enyina Yesu.

LXIX Kī Petro dzi ne lowabe a, Ɔsɔfɔnɔkɔɛ Flee a ɔsumunetsole mɔa ya ne ye sekɛ ele kī, “Nɔ malo otomɔ Yesu Galileani a.”

LXX Leme Petro sī ne bati a flee anɛ ele kī, “Īnyina letsama ne letsɔ a kī ale a akū.”

LXXI Kĩ eyidza etsã onyukpě yane ne kanya a, katsolebi ɔsumune bebã mo ye, ade ebi bikĩ bedzě ne awã kĩ, “Onyole kũĩ lemε na ne Yesu Galileani a sekě tō.”

LXXII Petro buki esĩ elo fubo ele kĩ, “Ĩnyĩna onyole a na!”

LXXIII Owi tábuna mo banyole a kĩ bedzě ne awã ya ne Petro sekě bibi ye kĩ, “Ɖnɔkɔali fɔane kĩ nɔ malo ɔnye be kame ɔmoa, kitonekĩ nɔ kɔdzela kale kame nye nɔ kanya!”

LXXIV Awã naa, Petro do kadumu awe, katani fɔtsa kĩ, “Ɖnɔkɔali male. Baguma evεe yĩ soto nte fɔvã mama. Ĩnyina oti a na!”

Deedimɔape ɔkɔko be. **LXXV** Adeke mo Petro kai fɔletsa a kĩ Yesu bi ye a kĩ, “Fomo ɔkɔko aabe ni, aale titi elale kĩ onyĩna yĩ.” Ade ene enaa kanya enabe a.

XXVII

Bekpã Yesu Benamena Pilato Sekě.

I Ne odenyinawi a, basɔfɔnɔkɔě mo ɔmaĩ banɔkɔě a flee tsa fɔlo bipi adzuni kĩ baaako Yesu. **II** Bisui ye bekpã ye benakɔa bido ne Roma Abãã Ɖnɔkɔě, Pilato awe.

Yuda Wuda.

III Kĩ Yuda, kĩ enye Yesu ekpa a, mó kĩ beko Yesu kɔto a, fuwo ye kalɔe ade ekɔa sika ovoe fɔbo taale a ema basɔfɔnɔkɔě mo banɔkɔě a. **IV** Ebi be kĩ, “Nkena tokpa, kĩ ĩnye oti kĩ mfumsu adima leláa ye akũ nkpa kĩ beko.”

Ade bekpa ye mbuaye kĩ, “Fukĩnaa letséla boe. Nɔ kale kanε!”

^V Ade Yuda tale sika fɔbɔ taale a eko ne Asoli Kɔla a kame, edzakũ enado ye akũ ɔwẽ a.

^{VI} Basɔfɔnɔkɔẽ a nafiɓa sika a beɓe kĩ, “Sika kĩi nye babɔane kaya sika, boe mbla tákpa osi kĩ bekoɓa se bido ne Asoli Kɔla sika adakã kame.”

^{VII} foesũ bipi adzuni ne se akũ, ade benaya Fubui ɔmene Tite kĩ tenya banɔvɔẽ kabilakõ. ^{VIII} Ne foesũ keyawo nviã bave awã kĩ, Babɔane Tite.

^{IX} Ade Baguma Onukpẽ ɔnyene Yeremia fɔletsɓa a kĩ eɓe eyi a ya ne foe kame kĩ, “Bekoɓa sika ovoe fɔbɔ taale a kĩ Israel tunɔ baase ne ye lɔlɔ a, ^X beya fubui ɔmene tite nde ayekĩ boe ɔlate we kĩ nkena a.”

Pilato Via Yesu Fɔletsɓa.

^{XI} Befõ Yesu dza ne Romafɔ Abãã ɔnɔkɔẽ a ane. Ade ɔnɔkɔẽ a via ye kĩ, “No nye Yudafɔ legã a mbɔɔɔ?”

Yesu kpa mbuaye kĩ, “No lamɔ kale.”

^{XII} Kĩ Yudafɔ basɔfɔnɔkɔẽ mo ɔmaĩ banɔkɔẽ a katsua ye onukpẽ malo ni, Yesu tále kadima.

^{XIII} Adeke Pilato via ye kĩ, “Aánu fɔletsɓa a kĩ belamɔ kate ne no akũ flee a?” ^{XIV} Lemɔ Yesu sĩ etákpa kale moape malo mbuaye, foesũ fɔkena Abãã ɔnɔkɔẽ a wãwã paa.

Pilato Kɔ Yesu Wuda Kɔtɔ.

^{XV} Ne Wuda Katẽ luwi lidi nye lidi kanya kame ni, Abãã ɔnɔkɔẽ a awe kɔla bawane a kame ɔmoa, kĩ bati kɔdabu a awe a, awe kafɔne kakpa be. ^{XVI} Ne lɔkɔ a kame a, onyole odi kĩ bave Baraba, kĩ ete dī ne fɔtsa kpa kakena kame waa kɔla. ^{XVII} Foesũ kĩ bati kɔdabu a kpɔta a, Pilato via be kĩ, “Owei miawe kĩ nfɔne awe nkpa mi? Yesu Baraba mbɔɔɔ kĩ Yesu a kĩ bave Kristo a?”

XXIII Kitonekĩ Pilato nyina pefee kĩ lineke kano sũ Yudafɔ banɔkɔɛ a kpã Yesu beyado ne ye awe.

XXIX Kĩ Pilato dzi ne fɔletsɔ kadze lukpo kame a, ɔtsɔ do lotɔ beyabi ye kĩ, “Takena otĩ kpĩ a na letsama, kitonekĩ kadzɔ lenye mmó lubo paa ne kɔda kame ne ye sũ.”

XX Basɔfɔnɔkɔɛ mo ɔmaĩ banɔkɔɛ a fɔ bati kɔdabu a wã Pilato kĩ efɔne Baraba awe lokɔa beko Yesu.

XXI Ade Pilato via bati a kĩ, “Bati nviã a kame ɔwɔdabe miawe kĩ nfɔne awe nkpa mi?”

Bekpa mbuaye kĩ, “Baraba!”

XXII Pilato via be kĩ, “Lokɔa litsa nkamo Yesu kĩ bave Kristo a?”

Be flee bekpa mbuaye kĩ, “Boa ye ne asendua akũ!”

XXIII Ade Pilato via be kĩ, “Litsa tokpa ekena?”

Ade bido fɔwɔla kabɔa kɔɔba awe kĩ, “Boa ye ne asendua akũ!”

XXIV Kĩ Pilato mó kĩ letsama kakena buki leláa, mbom ɔtutũ aaya sũ ni, ebɔe mui evɔle awe ne bati kɔdabu a ane ele kĩ, “Yĩ akpo mo abɔa leláa onyole kĩ wuda kame!”

XXV Bati kɔdabu a flee kpa mbuaye yoo kĩ, “Ye babɔane a beya ne boe mo boe babi akũ!”

XXVI Adeke Pilato fɔne Baraba awe ekpa be a, ade kĩ efɔ bibo Yesu mo mple biyua a ekɔa ye ekpa kĩ benaabɔa ye ne asendua akũ.

Sodzafɔ a Di Yesu Nsekuo.

XXVII Ade abãã ɔnɔkɔɛ a sodzafɔ kpã Yesu benamena Pilato lowabe ade sodzafɔ katsu a flee yadza bisinya Yesu a. **XXVIII** Benye ye tetadie ne ye akũ ade bekɔa atadie wulaa ngbã bido ye a.

XXIX Bekɔa fɔtsɔlewe beno legãbɔe betsa ye, ade

bekoa otse bido ne ye somona awe a. Bekake aduli ne ye ane kadi ye nsekuo ki, "Yiiduu! Yudafɔ legã a edzi nkpã daa!" **XXX** Bitua tane biko ne ye akũ, bete otse a ne ye awe biwula ye ne lolɔ. **XXXI** Ki bidi ye nsekuo lomo biyua a, benye atadie wulaa a ne ye akũ bebɔe ye moawe tide a bibuki bido ye. Ke liti bekpã ye benemena ki banaaboa ye ne asendua akũ.

Bebɔa Yesu Ne Asendua Akũ.

XXXII Ki bene banaa a, betselamena onyole odi ki bave Simon, ki eto Kirene. Sodzafo a he ye ki elo Yesu asendua a. **XXXIII** Ade beyawo kako kadi ki bave Golgata, ki foe kayo nye Oti Lolo Fotsõ. **XXXIV** Ade awã bekpã ye waã ki betseka mo otsonu mo onye ki emoa a, leme ki eta be onukpẽ edã a, esi be kamoa. **XXXV** Ki sodzafo a boã ye bemena ne asendua akũ biyua a, beta bavulibi ne ye tetadie akũ, besẽ bekpã akũ. **XXXVI** Ke liti a, bekena akũ bidzi ne awã bekadzole ye akũ. **XXXVII** Ade betsele ye onukpẽ katsua foletsa ne ye lolɔ nyange ki, "Ade Yesu Yudafɔ Legã a ne awi a." **XXXVIII** Bebɔa bayekpane nviã leme bemena ne asendua akũ bibumo Yesu, omoã ne ye somona, oyade ne ye seba. **XXXIX** Bati a ki betsã awã batẽ a, kakpokpa folo, kata fuvunatsa kamena Yesu, **XL** ade bekalẽ ki, "No a ki ole ki aaveli Asoli Kola a, lokoa obuki oke koe ne fuwi elale kame a, te no akũ! Nte Baguma Obi ane ni, duma ne asendua a akũ!"

XLI Ade ayea leme basofonokõẽ mo mbla bat-sane mo omaĩ banokõẽ a di Yesu nsekuo ki, **XLII** "Ete bati bebã nkpã, leme yaápuli ete ye

akū. Nné ye nye Israel legã a? Kekõ eduma ne asendua a akū finyaa, lɔkɔa bóate ye budo!
XLIII Yate Baguma kado ade yale kī Baguma Obi yane. Nte Baguma awe ye kale nuwī ni, eyaate ye finyaa!" **XLIV** Ade ayea bayekpane nviã a kī bebɔa ne asendua akū a malo vūna Yesu a.

Yesu Wuda.

XLV Kī kito suwa tɔdɔũ ewua-nviã a, katinya kame flee ke ɔtũ kenawo olobe tɔdɔũ elale kame.
XLVI Nde tɔdɔũ elale kame a, Yesu bɔa fɔwɔla kɔɔba kī, "Eli, Eli, lama sabaktani?" Foe kayɔ nye kī, "Yī Baguma, yī Baguma, nde sū ɔfɔne yī awe?"

XLVII Kī bati a kī bedzẽ ne awã a kame badi nu letsa a kī ele a, bele kī, "Onyole kī ave Eliya!"

XLVIII Ade deedimɔape be kame ɔmɔa wula atse enabɔe ɔsape edo ne waī yilawa kame ekɔa evela ne otse onukpẽ, edela ete ye ne onukpẽ kī emɔa.
XLIX Lemɛ bati bebã a le kī, "Dza tō. Mifõ bodã nte Eliya aayanye ye mbɔee?"

L Yesu buki ebɔa fɔwɔla kɔɔba, ade emena onukpẽ a.

LI Adeke lima kpale a kī bevɛla ne Asoli Kɔla kame a bẽ fɔke nviã, kito nyange keyawo kayɔ. Tite kuna boe bakpale bakpale yeɛ, **LII** funike binya ade bedzela bati kpalewa pii kī biku a bidzi nkpã a. **LIII** Kī Yesu yidza eto kanɔkpa liti a, bati kpalewa a né ne funike a kame benaa Yerusalem, ɔmato kpalewa a kame, awã kī bati pii mɔ be.

LIV Kī sodzafɔ ɔnɔkɔẽ a mɔ bikī bibumɔ ye bekadzɔle Yesu akū a mó tite kakuna mɔ fɔtsa bebã kī fɔya a, libe wo be paa ade bele kī, "Ɔnɔkɔali obi kī nye Baguma Obi!"

LV Batsole pii kī bito Galilea, kī bitómɔ Yesu bekabumɔ ye a, dza mɔ lugo bekadã. LVI Be kame badi nye Maria Magdalani, Maria kī enye Yakobo mɔ Yosef ɔma, mɔ Zebedeo ɔtsɔ.

Yesu Kabila.

LVII Kī olobe wo ɔto a, onyole osikani odi kī bave Yosef, kī eto Arimatia, kī ye malo enya Yesu fɔtsa bakɔlene a kame ɔmɔa a yane eta. LVIII Enaa Pilato sekẽ enawã ye kī ekɔa Yesu ɔnokpa a ekpa ye. Ade Pilato kpa osi kī befɔne ɔnokpa a awe bekpa ye a. LIX Foesũ Yosef bɔe ɔnokpa a, ade ekɔa aklala fitaa vɔẽ esuli ye, LX ekɔa enado ne ye mɔawe linike vɔẽ kī efɔ benye ne de kpale ɔke kame a. Emininya de kpale esua linike a onukpẽ ade edzakũ a. LXI Maria Magdalani mɔ Maria kī a dzi ne awã betselamɔ linike a bekadã.

Badzɔlene Na Ne Kuni a Ɔwẽ.

LXII Ne luwi leyade, kī lenye Kaweya Luwi ɔnɔne a, basɔfɔnokɔẽ mɔ Farisifo yatsena ne Pilato sekẽ, LXIII bibi ye kī, “Ɖnokɔẽ, bute ane kī, kī ɔvãlevã a na dzi nkpã a, ele kī, ‘Maayidza ndzi nkpã ne fuwi elale liti.’ LXIV Foesũ kpa mbla kī bedzɔle ye kuni a akũ kadzɔle wĩ kenaawo luwi lelaledede a akũ. Nte nné aye ni, ye fɔtsa bakɔlene a aapuli benaaye ɔnokpa a lɔkɔa bibi bati kī bedzela ye bitomena banokpa kame. Nte fɔya lɔmɔ ni, liti fɔvã a aaba fɔtonyade a.”

LXV Pilato bi be kī, “Mikpã badzɔlene mi-namena, midzɔle kuni a akũ ayekĩ míapuli.” LXVI Foesũ bedzakũ benatim de a ne kuni a onukpẽ kɔɔba, ade bedzela de akũ badzɔlene ne awã a.

XXVIII

Yesu Kayidza Kato Kanokpa.

^I Kĩ Kaweya Luwi a tẽ, ne ekwansieda a luwi lotonyade kĩ lenye Ekwansieda odenyinawi a, Maria Magdalani mo Maria kĩ a naa kĩ banaadã Yesu kuni a.

^{II} Letaleta tite kuna mo osĩ mo osĩ, kitonekĩ ode foto onyane to ode eka eyamininya de ne linike a onukpẽ a eyi, ekena akũ edzi ne de akũ. ^{III} Ye akũ flee la nde odetó kame kamõane aye, ade ye tetadie voe fitaa nde aklala aye a. ^{IV} Libe wo bikĩ badzole fokõ a paa, bekatila blibli, bekena nde banokpa.

^V Ade ode foto onyane a bi batsole a kĩ, “Mitavila! Ìnyina kĩ Yesu a kĩ bebõa ne asendua akũ a miawe. ^{VI} Eláa awĩ, kitonekĩ bedzela ye edzi nkpã nde ayekĩ ele eyi a. Mifuã miyaadã awã kĩ ewa a. ^{VII} Miwe sowa minaabi ye fõtsa bakõlene a kĩ, ‘Eyidza eto banokpa kame. Enyaa mi loto yanaa Galilea. Ade awã míamo ye a!’ Mite ane ne letsa a kĩ mbi mi a akũ.”

^{VIII} Foesũ batsole a dzakũ moatse ne linike a owẽ, ade bekõa libe mo kawõle, biwula atse kĩ banaabi ye fõtsa bakõlene a letsa a kĩ leya a. ^{IX} Letaleta Yesu tselamo be ade ebi be kĩ, “Lukudo litomo mi.” Bifuã beyapili ye ne foneta, bike aduli bisum ye. ^X Ade Yesu bi be kĩ, “Mitavila, mbom minaabi nwaẽ ame kĩ benaa Galilea, lokõa baamo yĩ ne awã.”

Badzõlene a Nale Letsa a Kĩ Bemó.

^{XI} Kĩ batsole a dzakũ banaa a, kuni a akũ badzõlene a kame badi naa omato kame benabi basõfonokõẽ a letsa a kĩ leya a flee. ^{XII} Kĩ

basɔfɔnɔkɔẽ mɔ ɔmaĩ banɔkɔẽ a tsa folo a, bipi adzuni ade bekpa badzɔlenɛ a sika baũ, ^{XIII} bibi be kī, “Mile kī, ‘Lenye a kī bɔwa tida a ade ye fɔtsa bakɔlenɛ a yaye ɔnɔkpa a bedzakūmena a.’ ^{XIV} Adeke mɔ nte fɔletsa kī wo Abãã ɔnɔkɔẽ soto kame ni, bɔapi foe onukpẽ kī fɔláanya ɔhau fɔkpa mi.” ^{XV} Badzɔlenɛ a te sika a, benakena ndɛ ayekī bibi be a. Foesũ ade fɔletsa kī legba ne Yudafɔ kame benɛɛ bale keyawo nviã kī a.

Yesu Nye Ye Akū Etsa Ye Fɔtsa Bakɔlenɛ a.

^{XVI} Ne foe kame a, fɔtsa bakɔlenɛ ewua-odi a naa Galilea ne ɔto a kī Yesu tsa be kī benaa a akū. ^{XVII} Kī bɛmó ye a, bike aduli bisum ye, lemɛ be kame badi te atsindze. ^{XVIII} Yesu fuã be ɛɛ kī, “Baguma kɔa tite mɔ ode otumi flee edo ne yĩ awɛ. ^{XIX} Foesũ minaa fude flee kame ne kako nye kako, minakena bati a bedani yĩ fɔtsa bakɔlenɛ. Miwɔla be mui ne ɔlega a, Obi a mɔ Hũhũ Kpalɛwa a dī akū. ^{XX} Mitsa be kī bidi ne letsa nye letsa a kī nhe mi a akū. Midã, ndeĩ ne mi sekẽ luwi daa kenaawo katinya kawũna.”

Baguma Apam Vɔɛ a Tuwuli
Tuwuli: Baguma Apam Vɔɛ a Tuwuli New Testament
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

68df0193-2981-5275-8994-8f743fe01e5e